

## **MATTHAI** **(The Gospel According to** **Matthew)**

*Jisuh a tâconae*

*Luk 3:23-38*

<sup>1</sup> Abraham hoi Devit e catoun lah kaawm e, Jisuh Khrih a thonae lairui cauk teh, <sup>2</sup> Abraham capa Isak, Isak capa Jakop, Jakop capa Judah hoi a hmaunawngna naw. <sup>3</sup> Judah ni Tamar hoi a khe e capa Perez hoi Zerah, Perez capa Hezron, <sup>4</sup> Hezron capa Aram, Aram capa Amminadab, Amminadab capa Nahshon, Nahshon capa Salmon, <sup>5</sup> Salmon capa Boaz, Rahab hoi a khe e. Boaz capa Obed, Ruth hoi a khe e. Obed capa Jesi, Jesi capa Devit siangpahrang.

<sup>6</sup> Devit capa Solomon, Uriah e a yu hoi a khe roi e, <sup>7</sup> Solomon capa Rehoboam, Rehoboam capa Abijah, Abijah capa Asaph, <sup>8</sup> Asaph capa Jehoshaphat, Jehoshaphat capa Joram, Joram capa Uzziah, <sup>9</sup> Uzziah capa Jotham, Jotham capa Ahaz, Ahaz capa Hezekiah, <sup>10</sup> Hezekiah capa Manasseh, Manasseh capa Amon, Amon capa Josiah, <sup>11</sup> Josiah capa Jekhoniah hoi a hmaunawngnanaw, Babilon lah a kampuen tawmlei vah a khe e ca catounnaw doeh.

<sup>12</sup> Babilon kho lah a kampuen awh hnukkhu, Jekhoniah capa Shealtiel, Shealtiel capa Zerubbabel, <sup>13</sup> Zerubbabel capa Abiud, Abiud capa Eliakim, Eliakim capa Azor, <sup>14</sup> Azor capa

Zadok, Zadok capa Akhim, Akhim capa Eliud,  
<sup>15</sup> Eliud capa Eleazar, Eleazar capa Matthan,  
 Matthan capa Jakop, <sup>16</sup> Jakop capa, Meri e a vâ  
 Joseph, Khrih tie Jisuh teh Meri koehoi a khe.  
<sup>17</sup> Abraham koehoi Devit totouh a se hlaipali,  
 Devit koehoi Babilon kho lah a kampuen aw  
 totouh a se hlaipali, Babilon kho lah a kampuen  
 aw hoi Khrih totouh a se hlaipali touh a pha.

*Jisuh khenae*

*Luk 1:35*

<sup>18</sup> Jisuh Khrih a khenae teh, hettelah ao. A  
 manu Meri teh Joseph yu lah pacei lah ao  
 navah tak cungtalah a hmawng roi hoehnahlan,  
<sup>19</sup> Kathoung Muitha e camo teh a vawn toe. A  
 vâ Joseph teh tamikalan lah ao dawkvah, Meri  
 kaya sak hane a ngai hoeh dawkvah, arulahi  
 ma hanlah a kâcai.

<sup>20</sup> Hottelah a kâcai navah, a manglah Bawipa  
 e kalvantami, ahni koe a kamnue pouh teh,  
 Devit capa Joseph, na yu Meri paluen hane hah  
 na lungpuen hanh, atu e a vawn e camo teh  
 Kathoung Muitha lahoi doeh a vawn. <sup>21</sup> Ahni ni  
 Ca tongpa a khe vaiteh, Jisuh telah na phung han.  
 Bangkongtetsawiteh, a taminaw yon thung hoi a  
 rungngang han dawkvah atipouh.

<sup>22</sup> Hete akong teh Bawipa ni profetnaw  
 hno lahoi sutdeilawk akuep nahane doeh.  
<sup>23</sup> Sutdeilawk teh, Khenhaw! tanglakacuem ni  
 vawn vaiteh ca tongpa a khe han. A min teh  
 Emmanuel telah a phung han. Emmanuel tie teh  
 Cathut maimouh koe ao tinae doeh.

<sup>24</sup> Joseph a kâhlaw teh, Cathut e kalvantami  
 ni lawk a poe e patetlah a yu teh a paluen.

<sup>25</sup> Hatei, camin a khe hoehroukrak tak cungtalah hmawngkhai hoeh. Hote capa hah Jisuh telah a phung.

## 2

### *Jisuh a bawk awh*

<sup>1</sup> Herod teh siangpahrang lah ao navah, Judah ram Bethlehem kho dawk Jisuh teh a khe. Hatnavah âsikathoumnaw teh Jerusalem vah a pha awh. <sup>2</sup> Ahnimouh ni, kanîtholah amae Âsi ka hmu awh dawkvah, ama bawk hanelah ka pâtam awh. Judah siangpahrang ka khe e teh na maw ao telah a pacei awh.

<sup>3</sup> Hote lawk hah a thai awh navah, Herod siangpahrang hoi Jerusalem e tami pueng a tâsue awh. <sup>4</sup> Vaihma bawi kalennaw hoi cakathutkungnaw pueng a pâkhueng teh, Khrih teh na maw a khe han telah a pacei. <sup>5</sup> Hotnaw pueng niyah, Profet buet touh ni sut a thut e teh, <sup>6</sup> Oe, Judah ram Bethlehem kho, nang teh Judah ram khopuinaw hlak vah na thoungca hoeh. Bangkongtetpawiteh, ka tami Isarelnaw kaukung Bawipa teh nathung hoi a tâco han, ahni ni Isarelnaw teh a khoum han, hettelah Cakathoung dawk ao. Hatdawkvah Judah ram, Bethlehem kho dawkvah Khrih teh a khe han atipouh awh.

<sup>7</sup> Hahoi, Herod ni âsikathoumnaw hah a ru lah a kaw teh, Âsi a kamphawngnae atueng hah kahawicalah a pacei hoiyah cet a nateh camo ca hah kahawicalah tawng awh <sup>8</sup> Na hmawt awh pawiteh kai hai ka bawk van nahan, bout na

thaisak awh, telah lawk a thui teh Bethlehem lah a patoun.

<sup>9</sup> Siangpahrang e a lawk hah a ngai awh teh a cei awh navah, kanitholah a hmu e âsi teh ahnimaie hmalah a cei dawkvah camo ca a onae lathueng a pha teh a kâhat. <sup>10</sup> Hote âsi bout a hmu awh toteh a konawm awh teh puenghoi a lunghawi awh. <sup>11</sup> Im thung a kâen awh navah a manu Meri hoi camo ca teh a hmu awh, a tabo awh teh camo a bawk awh. Amamae hno tabunaw a paawng awh teh sui, frankinsen hoi murah poehnonaw hoi a bawk awh. <sup>12</sup> Herod siangpahrang koe bout ban hoeh nahanlah a manglah Cathut ni kâhruetcuetae a poe dawkvah, alouke lam lahoi amamouh kho lah a ban awh.

### *Jisuh Izip ram lah a yawngkhai*

<sup>13</sup> Ahnimanaw a cei awh hnukkhu, Cathut e kalvantami teh Joseph e a mang lah a kamnue teh, thaw nateh camo hoi a manu hah Izip ram lah yawngkhai leih. Lawk bout ka dei hoehroukrak hote ram dawkwah awh. Herod siangpahrang ni camo hah thei hanlah a tawng han toe atipouh.

<sup>14</sup> Hahoi, Joseph a thaw teh, camo hoi a manu hah a hrawi teh, karum vah Izip ram lah a yawngkhai. <sup>15</sup> Herod siangpahrang a due ditouh hote ram dawkvah ao awh. Het hateh, Ka Capa hah Izip ram hoi ka kaw toe, telah Cathut ni Profetnaw hno lahoi a dei tangcoung e a kuep nahane doeh.

### *Herod ni camonaw a thei*

<sup>16</sup> Âsikathoumnaw ni na dum awh toe tie Herod ni a panue navah, a lung puenghoi a phuen. Tami lungkaangnaw koe a pacei tangcoun e âsi a kamphawngnae koehoi, Bethlehem hoi a tengpam kho daw k e camo tongpa kum hni touh hoi a rahim pueng hah tami a patoun teh a thei sak. <sup>17</sup> Profet Jeremiah ni a dei e, <sup>18</sup> Ramah kho thungvah khuika hoi hramki e lawk ka thai. A canaw ao hoeh toung dawkvah Rachel ni a khuika e cing thai hoeh, tie lawk hatnavah a kuep.

### *Nazareth kho Jisuh khosaknae*

<sup>19</sup> Hatei, Herod a due hnukkhu, Izip ram vah Joseph e a mang lah Bawipa e kalvantami teh bout a kamnue pouh teh, <sup>20</sup> Thaw nateh a manu hoi camo hah Isarel ram lah cetkhai leih, camo thei hanlah katawngnaw teh a due awh toe, atipouh.

<sup>21</sup> Joseph a thaw teh a manu hoi camo hah Isarel ram lah a ceikhai. <sup>22</sup> Hatei, Herod yueng lah a capa Akhelaus ni Judah ram daw k bawi lah ao tie a thai dawkvah, hote ram koe lah cet ngam hoeh. A mang lah Cathut ni kâhruetcuetae bout a poe e patetlah Galilee ram lah a cei. <sup>23</sup> Profetnaw ni sut a dei awh e lawk, Khrih hah Nazareth tami telah a kaw awh han, tie a kuep nahanelah Nazareth kho daw k a pha awh teh hawvah ao awh.

## 3

*Baptisma Jawhan ni lamthung a rasoun*  
*Mrk 1:3-8; Luk 3:2-17*

<sup>1</sup> Hatnah e tueng nah, Baptisma kapoekung Jawhan teh, Judah ram kahrawngum vah, <sup>2</sup> Kalvan uknaeram teh a hnai toe. Hatdawkvah, pankângai awh leih telah a pathang. <sup>3</sup> Profet Isaiah ni sut a dei e teh, Kahrawng um vah kahram e lawk ni, Bawipa e lamthung teh pathoup awh. A lamthung teh lan sak awh ati navah, hote Jawhan doeh a dei ngai nah. <sup>4</sup> Jawhan teh Kalauk muen hoi kawng e a khohna teh, a keng dawк phavuen taisawm a kâyeng teh, samtong hoi khoitui hah a canei.

<sup>5</sup> Jerusalem, Judah ram, Jordan tui teng e tami pueng ni Jawhan teh a pâm awh. <sup>6</sup> A yonnae pueng a pâpho awh teh, Jordan tui dawк Jawhan e baptisma teh a coe awh.

<sup>7</sup> Farasinaw hoi Sadusinaw, baptisma coe hanelah a tho awh e hah Jawhan ni a hmu navah, Oe, Tahrûn hrûnthoe catounnaw, ka tho hane lungkhueknae dawк hoi na hlout awh nahanelah apinimaw kâhrûetcuetae na poe a vaw. <sup>8</sup> Pankângainae hoi kamcu e tawksaknae hah sak awh. <sup>9</sup> Abraham teh kaimae na pa doeh telah pouк awh hanh. Na dei pouh awh, Cathut ni hete talungnaw hah, Abraham e a canaw lah a coung sak thai. <sup>10</sup> Thingkung koevah Cakâ sut ta lah ao toung dawкvah, a paw kahawi ka paw hoeh e akung pueng teh, tâtueng vaiteh, hmai dawк phum lah ao han. <sup>11</sup> Kai ni teh pankângainae baptisma tui dawк na poe awh. Ka hnuklah ka tho e teh kai hlak hno a sak thai. Ahnie khokkhawmruì patenghai rasu pouh hanelah kai ka kamcu hoeh. Ahni ni teh

Kathoung Muitha hoi hmai hoi baptisma na poe awn han.

*Jisuh Baptisma coenae*

*Mrk 1:9-11; Luk 3:21,22; Jhn 1:31-34*

<sup>12</sup> A kut dawak para a sin teh kacailah pheng a hut. Cakang ka tak e teh capai dawak a cui. Hatei, cahiknaw teh karoum thai hoeh e hmai hoi sawi lah ao han atipouh. <sup>13</sup> Hatnavah, Jisuh teh Galilee ram lahoi Jordan palang vah Jawhan koe baptisma coe hanelah a tho. <sup>14</sup> Jawhan ni, kai nouh nang koe baptisma ka coe hane ei, nang ni kai koe lat na tho atipouh teh a cakâ. <sup>15</sup> Jisuh ni, Cathut ni tawak sak hanlah na ngaikhai e pueng teh tawak hanelah ao dawkvah, atu baptisma na poe leih atipouh. Hahoi torei teh, Jawhan ni a tarawi pouh.

<sup>16</sup> Jisuh baptisma a coe hnukkhu tui dawak hoi a thaw navah, kalvannaw a kamawng teh, Cathut e Muitha teh Âbakhu patetlah a kum e hah a hmu teh a tak dawak a cu pouh. <sup>17</sup> Kalvan hoi e lawk ni, ahni teh ka pahren poung e hoi ka lungkuep e Capa doeh, telah a dei.

## 4

*Jisuh Tacueknae*

*Mrk 1:12-13; Luk 4:1-13*

<sup>1</sup> Hahoi, Jisuh teh kahraimathout koe tacuek sak hanelah, Kathoung Muitha ni kahrawngum vah a hrawi. <sup>2</sup> A hnin 40 rum 40 touh rawca a hai toung dawkvah kamlum hanelah ao toe. <sup>3</sup> Katakuekkung ni rek a hnai teh, hettelah ati, nang teh Cathut Capa katang lah na awm

pawiteh, hete talungnaw hah vaiyei lah a coung nahan kâ poe haw, ati pouh. <sup>4</sup> Hatei Jisuh ni, tami teh vaiyei hoi dueng hring mahoe, Cathut e lawk poe e puenghoi yah a hring han telah Cakathoung dawk thut lah ao atipouh.

<sup>5</sup> Hahoi Kahraimathout ni Jisuh hah khopui kathoung thungvah a hrawi teh, bawkim som dawk a ta. <sup>6</sup> Nang teh Cathut Capa katang lah na awm pawiteh, talai lah tâtawt haw. Bangkongtetpawiteh, kalvantaminaw hah nang han lah lawk ka thui toe. Talung dawk, na khok na hmang hoeh nahanelah, ahnimouh ni a kut hoi na tawmdawm aw h han telah Cakathoung dawk thut lah ao atipouh. <sup>7</sup> Jisuh ni, na Cathut hah na tanouk mahoe telah thut lah bout ao, ati pouh.

<sup>8</sup> Hahoi teh Kahraimathout ni Jisuh hah mon ka rasang poung koe bout a ceikhai teh, talaivan uknaeram puenghoi talai bawilennae pueng hah a patue. <sup>9</sup> Na khokcuengkhuem laihoi kai na bawk pawiteh, hete hnopai pueng hah na poe han atipouh. <sup>10</sup> Jisuh ni, Setan cet. Na Cathut dueng hah na bawk vaiteh, A thaw dueng hah na tawk han tie Cakathoung dawk thut lah ao atipouh. <sup>11</sup> Hat toteh, Kahraimathout ni a kangheng takhai. Hahoi kalvantaminaw a tho aw h teh, a khetyawt aw h.

*Jisuh kamthang lawk dei kamtawngnae*

<sup>12</sup> Jawhan thongim a pabo aw h, tie Jisuh ni a thai toteh Galilee ram lah a cei. <sup>13</sup> Nazareth kho a ceitakhai teh Zebulun hoi Naphtali ramri tuipei teng kaawm e Kapernuam kho a pha teh

hawvah ao. <sup>14</sup> Hot hateh Profet Isaiah ni sut a dei tangcoung e lawk a kuep nahane doeh. <sup>15</sup> Sut a dei e lawk teh: Zebulun hoi Naphtali ram tuipui teng ceinae lamthung, Jordan palang ran Jentelnaw e Galilee ram, <sup>16</sup> hmonae thung kaawm e tami pueng ni, angnae kalenpoung teh a hmu awh. Duenae tâhlip thung kaawm e pueng koevah, angnae teh a pha. <sup>17</sup> Hatnae tueng hoi teh, Jisuh ni, pankângai a leih. Kalvan uknaeram teh a hnai toe telah kamthang lawk dei e a kamtawng toe.

*A hnukkâbangnaw apasuek kawnae  
Mrk 1:16-20; Luk 5:2-11; Jhn 1:35-42*

<sup>18</sup> Jisuh ni Galilee tui teng a cei navah, a hmaunawngnga roi, Piter tie Simon hoi a nawngnga Andru, ahnimouh roi teh tangakamankungnaw lah ao roi teh, talî dawk tanga a heng roi lahun e hah a hmu. <sup>19</sup> Ahnimouh roi koevah, ka hnukkâbang roi haw atipouh. Tami kamankung lah na sak roi han atipouh. <sup>20</sup> Ahnimouh roi ni tamlawk a ceitakhai roi teh, a hnuk tang a kâbang roi. <sup>21</sup> Hahoi, bout a cei teh, alouke hmaunawngnga roi, Zebedee e capa Jem hoi Jawhan teh, a na pa hoi long thung vah tamlawk a cip roi e hah a hmu teh a kaw. <sup>22</sup> Ahnimouh roi nihaiyah, vai touh lahoi, a na pa hoi long hah a ceitakhai roi teh, a hnuk a kâbang roi.

*Patawnae a dam sak*

<sup>23</sup> Jisuh teh Galilee ram pueng dawk a cei teh, amamae kamkhuengnae sinakok dawkvah, a cangkhai, uknaeram kamthang kahawi a pâpho. Patawnae puenghoi patawnae ahri pueng a

roum sak. <sup>24</sup> A kamthang teh Siria ram pueng dawk a kamthang dawkvah, athung kahrai kâen e naw, kapathunaw, kamkhuennaw, puenghoi yah a cawngca e patawnae, damhoehnae kaawm e pueng hah, a thokhai awh teh, ahnimae patawnae pueng hah, a roum sak pouh. <sup>25</sup> Galilee ram e, Dikapolis ram e, Jerusalem e, Judah ram e, Jordan palang teng e tamihupui ni a hnuk vah a kâbang awh.

## 5

### *Monsom Cangkhainae Yawhawinaenaw*

<sup>1</sup> Hote tamihupui hah a hmu navah Bawipa teh mon lah a luen. A tahung navah, a hnukkâbangnaw ni rek a hnai awh. <sup>2</sup> Hahoi, a kâko a ang teh a hnukkâbangnaw a cangkhai.

### *A yawkahawinaw*

<sup>3</sup> Muitha koe lah ka mathoe e taminaw teh, a yawhawi awh, bangkongtetpawiteh, kalvan uknaeram teh ahnimae doeh. <sup>4</sup> Ka khuikap e taminaw teh, a yawhawi awh, bangkongtetpawiteh, lungpahawi e lah ao awh han. <sup>5</sup> A lung ka do, a lung ka nem e taminaw teh, a yawhawi awh, bangkongtetpawiteh, Cathut ni a kam pouh e ram a coe awh han. <sup>6</sup> Lannae hah a von lah ka hlam e taminaw teh, a yawhawi awh. Bangkongtetpawiteh, Cathut ni a lungngai akuiep sak han. <sup>7</sup> Tami kapahrennaw teh, a yawhawi awh, bangkongtetpawiteh, pahren lah ao van han. <sup>8</sup> A lung kathounge taminaw teh a yawhawi, bangkongtetpawiteh, Cathut a hmu awh han. <sup>9</sup> Rounnae ka sak e taminaw teh a yawhawi

awh, bangkongtetpawiteh, Cathut e canaw telah kaw lah ao aw h han. <sup>10</sup> Lannaec kecu daw k rektap lah kaawm e taminaw teh a yawhawi aw h, bangkongtetpawiteh, kalvan uknaeram teh ahnimaec lah ao.

<sup>11</sup> Kai kecu daw k tami pueng ni yon na pen aw h teh na rektap aw h navah, a yawkahawi e lah na o aw h. <sup>12</sup> Na konawm aw h. Puenghoi na lunghawi aw h. Bangkongtetpawiteh, kalvan vah nangmaec taw kphu kalenpoung ao. Hettelah doeh nangmouh hoehnahlan profetnaw hai a pacekpahlek aw h.

### *Talai e palawi lah na o aw h*

<sup>13</sup> Nangmouh teh talai e palawi lah na o aw h. Palawi tie teh, a paannaec kahmat pawiteh, a paannaec hah bangtelah hoi maw bout hmu thai han toung. Tâkhawng hoi coungroe hane hloilah, banghai cungkeinaec aw m hoeh toe.

### *Talai angnaec lah na o aw h*

<sup>14</sup> Nangmouh teh talaivan e angnaec lah na o aw h. Monsom kaawm e khopui teh bang ni hai ngue thai hoeh. <sup>15</sup> Hmai paang e hah apinihai tangthung hoi ramuk boihoeh. Im thung angnaec a poe thai nahanelah, hmaiimkhok daw k doeh ouk pâhung aw h. <sup>16</sup> Hot patetvanlah, nangmaec angnaec teh tami mithmu vah ang naseh. Ahni-mouh ni nange hnokahawi na sak e hmawt aw h vaiteh kalvan kaawm e nangmaec na Pa teh a pholen aw h han.

### *Kâlawk ka kuep sak e jisuh*

<sup>17</sup> Kâlawk hoi Profet lawknaw raphoe hanelah kai teh ka tho telah pouk awh hanh. Raphoe hanelah ka tho hoeh, kuep sak hanelah doeh ka tho. <sup>18</sup> Atangcalah na dei pouh awh. Kalvan hoi talai a rawk hoehroukrak, kâlawk dawk e dekhrei e hoi calung buet touh boehai kuep laipalah awm mahoe. <sup>19</sup> Hatdawkvah, apipatet ni hai hete kâpoelawknaw dawk kathoengcae buet touh boehai a tapoe teh, hot patetvanlah, ayânaw hai cangkhai pawiteh, kalvan uknaeram thungvah kathoengcae lah ao han. Hatei, apipatet ni hai kâpoelawknaw hah a tarawi teh, hot patetvanlah, ayânaw hai cangkhai pawiteh, kalvan uknaeram thungvah ahni teh kalen lah ao han. <sup>20</sup> Nangmouh koe na dei pouh awh. Nangmae lannae teh Farasinaw hoi cakathutkungnaw e lannae hah tapuet hoehpawiteh, kalvan uknaeram thung na kâen a mahoe.

<sup>21</sup> Tami thet hanh. Apihai tami ka thet e teh, lawkcengnae a khang hanlah a kamcu tie kâlawk karuem teh na thai awh toe. <sup>22</sup> Kaie kâlawk teh, apipatet hai a hmaunawngaha koe a lung ka khuek e teh, sanhedrin lawkcengnae taki ka tho a khang han. Apipatethai a hmaunawngaha kaisue sin e teh lawk tâtuengnae koevah a pha han. Apipatethai a hmaunawngaha thoe ka bo e teh, Hell hmai dawkvah hmaikaknae a khang hanlah a kamcu. <sup>23</sup> Hatdawkvah, bawk nahanelah hnopai na sin navah, na hmaunawngaha ni na toun tie na panuek pawiteh, thuengnae khoungroe hmalah, na hnopai hah tat nateh, <sup>24</sup> na hmaunawngaha hoi hmaloe kâmai hawi ei, hahoi torei na hnopai hah thuengnae bout sak.

<sup>25</sup> Na ka toe e hoi lam reirei na cei roi lahun nah, hnâbonae hah karanglah sak leih. Hoehpawiteh, na ka toe e ni lawkcengkung koe na thak vaiteh, lawkcengkung ni karingkungnaw koe na poe vaiteh, nang teh thongim thung paung lah na o han toe. <sup>26</sup> Atangcalah na dei pouh: na laiba na patho hoehroukrak thongim hoi na tâcawt thai mahoeh.

### *Uicuk hanh*

<sup>27</sup> Na uicuk mahoeh tie kâlawk karuem teh na thai awh toe. <sup>28</sup> Kaie kâlawk teh, uicuk ngainae lungthin hoi ayâ yu ka khen e tami teh, a lungthung vah hote napui councakoelah a yonkhai toe. <sup>29</sup> Hatdawkvah, aranglae na mit ni na yon sak pawiteh, hote na mit hah cawngkhawi lawih. Na takbuem lahoi hell dawк na bo hlak teh, na tak dawк e puengcang buet touh a rawк e heh bet ahawihnawn. <sup>30</sup> Hot patetvanlah, aranglae na kut ni nakunghai na yon sak pawiteh, hote na kut hah tâtueng lawih. Na takbuem lah hell dawк na cei hlak teh, na tak dawк e puengcang buet touh a rawк e heh bet ahawihnawn.

### *Yuvâ kâkapeknae*

<sup>31</sup> Apihai a yu mat ngai pawiteh, yu manae ca poe seh tie kâlawk karuem teh ao toe. <sup>32</sup> Kaie kâlawk teh: Apihaiyah uicuknae laipalah, a yu ka mat e teh, a yu hah a yon sak. Hot dueng laipalah, ma lah kaawm e napui hah ka lat e tami hai bout a yon sak.

### *Thoebonae*

<sup>33</sup> Laithoe hoi thoebo hanh. Cathut koe thoe na kâbo e teh cak seh, tie kâlawk karuem teh

na thai aw h toe. <sup>34</sup> Kaie kâlawk teh, thoebonae khoeroe sak aw h hanh. Kalvan noe lahoi thoebo aw h hanh, hotteh Cathut e bawitungkhung doeh. <sup>35</sup> Talai noe lahoi thoebo aw h hanh. Talai teh Cathut khok toungnae doeh. Jerusalem noe lahoi thoebo aw h hanh. Jerusalem teh Siangpahrang e khopui doeh. <sup>36</sup> Na lû noe lahoi thoebo hanh. Na samrui buet touh boehai na pangaw sak thai hoeh. Na tamang sak thai hoeh. <sup>37</sup> Na lawk hah ue pawiteh ue, nahoe h pawiteh nahoe h tie lah aw m nah nei. Hethloi e lawk teh kahawihoe h doeh a tâcokhai.

### *Pathung hanh*

<sup>38</sup> Mit yueng lah mit, hâ yueng lah hâ tie kâlawk karuem teh na thai aw h toe. <sup>39</sup> Kaie kâlawk teh: na ka rek e hah cakâ aw h hanh. Na hmaibe i tambei aw h pawiteh, avanglae rek patueng pouh aw h. <sup>40</sup> Na angki na lawm aw h pawiteh, na kâkhu e hah rek poe sin aw h. <sup>41</sup> Na ka ukkungnaw ni meng touh na cet sak aw h pawiteh, meng hni touh cet pouh aw h. <sup>42</sup> Ka hete hah poe aw h. Cawi han ka ngai e tami hah pâban hanh.

### *Na taran lungpataw*

<sup>43</sup> Nama hoi kâkuen e tami hah nama patetlah lungpataw nateh, na taran hah hmuhma, tie kâlawk karuem teh na thai aw h toe. <sup>44</sup> Kaie kâlawk teh kalvan kho kaawm e nangmae Na pa e capa lah na o thai nahanlah na tarannaw hah lungpataw aw h. Thoe na ka bo e naw hah lungpataw aw h. Nangmouh na ka maithoe e hah hawinae sak pouh aw h. Nangmouh ka tarawk ni teh na ka rektap e naw hanelah Cathut

koe ratoum pouh awh. <sup>45</sup> Bangkongtetpawiteh kalvan kho kaawm nangmae na Pa ni tamikahawi hoi tamikahawihoeh e lathueng vah kaní a tâco sak. Tamikahawi hoi tamikahawihoeh lathueng vah kho a rak sak. <sup>46</sup> Nangmouh lungpataw naw koe dueng na lungpataw awh pawiteh bangmaw tawkphu kaawm. Tamuk kacawngnaw ni patenghai yah hettelah ngoun teh a sak awh nahoehmaw. <sup>47</sup> Kawibang koe dueng khetyawtnae na sak pawiteh bangmaw bet na tapuetae kaawm vaw. Kayuemhoehnaw ni patenghai yah hettelah ngoun teh a sak a nahoehmaw. <sup>48</sup> Hatdawkvah nangmae kalvanlae Na pa teh a kuep e patetlah nangmouh haiyah kuep van awh atipouh.

## 6

### *Karoedengnaw poe awh*

<sup>1</sup> Hnokahawi na sak e taminaw hmalah na tawk na sak awh hoeh nahanlah kâhruetcuets awh. Telah hoehpawiteh Kalvan kho kaawm nangmae na Pa koehoi tawkphu na coe awh mahoe.

<sup>2</sup> Hatdawkvah hno na poe awh navah ka kâsaknaw ni a sak awh e patetlah sak awh hanh. Ahnimanaw teh taminaw e barinae a ngai awh dawkvah tamikâluinae koe, lamsalunnaw koe, mongka ueng laihoi sinakok koe a sak awh e patetlah sak awh hanh. Atangcalah na dei pouh awh. Ahnimouh teh amamae tawkphu hah a hmu awh toe. <sup>3</sup> Hno na poe awh navah na poe tie a kamnue thai hoeh nahanelah aranglae na kut ni a sak e hah avoilah e na kut panuek sak

hanh. <sup>4</sup> Arulahoï na sak e kahmawtkung na pa ni tawkpheu hah kamcengcalah na poe han.

*Ratoumnae*  
*Luk 11:2-4*

<sup>5</sup> Na ratoum awh navah ka kâsaknaw patetlah ratoum awh hanh. Ahnimouh teh tami pueng ni na hmu kong titeh sinakok koe a kangdue awh teh ratoum e hah a lungpataw awh. Atangcalah na dei pouh awh. Ahnimouh teh amamae tawkpheu hah a hmu awh toe. <sup>6</sup> Na ratoum awh navah na imthungkhu kâen awh nateh takhang na khan awh hnukkhu mithmuhoehnae koe kaawm e na pa koe ratoum awh. Mithmu hoeh e kahmawt e na pa ni tawkpheu hah kamcengcalah na poe awh han. <sup>7</sup> Na ratoum awh navah Jentelnaw patetlah cungkeihoehe lawk hoi boutbout pâbo awh hanh. Ahnimouh ni teh lawk moikapap dei e lahoï mae lungngai akuep han telah a pouk awh. <sup>8</sup> Hotnaw patetlah sak awh hanh. Bangkongtetpawiteh nangmouh ni na ngai awh e hno pueng teh na hei awh hoehnahlan vah nangmae na Pa ni a panue toe.

<sup>9</sup> Hatdawkvah na ratoum awh hane teh: Kalvan kho kaawm maimae na Pa, na min barinae awm lawiseh. <sup>10</sup> Na uknaeram phat lawiseh. Na lungngainae kalvan vah akuep e patetlah talai van hai kuep lawiseh. <sup>11</sup> Von kaw k khuem rawca sahnin kaimouh na poe awh haw. <sup>12</sup> Ayâ ni ka tak daw k a yon e ka ngaithoum e patetlah kaimae yonnae hai na ngaithoum haw. <sup>13</sup> Yon tacueknae daw k ka baw k payon hoeh nahanlah a thoena e koehoi na rungngang haw.

Uknaeram, bahu, hoi bawilennae pueng teh a yungyoe nange doeh. Amen. telah ratoum awh.

<sup>14</sup> Nangmouh koe yonnae ka sak e naw hah na ngaithoum awh pawiteh nangmae kalvanlae na Pa ni nangmae yonnae hai na ngaithoum van han. <sup>15</sup> Hatei, nangmouh koe yon kasaknaw e yonnae hah na ngaithoum awh hoehpawiteh nangmae na Pa ni nangmae yon hai ngaithoum van mahoeh.

### *Rawcahainae*

<sup>16</sup> Nangmouh teh rawca na hai awh navah ka kâsaknaw e patetlah na minhmai dawak kamnuek sak awh hanh. Ahnimouh teh rawca a hai awh, tie hah taminaw hmalah a minhmai dawak a kamnuek sak awh. Atangcalah na dei pouh awh. Ahnimouh teh amamae tawkphu hah a hmu awh toe. <sup>17</sup> Hatei, nangmouh teh rawca na hai awh navah taminaw e hmalah kamnuek sak awh hanh. <sup>18</sup> Mithmuhoehnae koe kaawm e na Pa hmalah dueng kamnuek sak awh. Na lû satui kâhluk nateh na sam hak so awh. Na minhmai hak pâhla awh. Mithmu hoeh e ka hmawt e nangmae na Pa ni tawkphu hah kamcengcalah na poe awh han.

### *Kalvan vah râw pâkhueng awh*

#### *Luk 11:34-36*

<sup>19</sup> Sumei hoi khakbara ni a ca thainae koe, tamru ni a paru thainae koe talai van vah na hno pâkhueng awh hanh. <sup>20</sup> Sumei hoi khakbara ni a cathaihoehnae koe, tamru ni a paruhoeahnae koe kalvan kho vah na hno hah pâkhueng awh. <sup>21</sup> Bangkongtetpawiteh na hno aona koevah na lungthin hai ao van.

### *Tak e angnae teh mit*

<sup>22</sup> Mit teh tak e hmaiim lah ao. Na mit hawi pawiteh na tak abuemlah a ang han. <sup>23</sup> Hatei, na mit hawihoe h pawiteh na tak abuemlah a hmo han. Na tak daw kkaawm e na angnae hah hmot pawiteh hote hmonae teh banghloimaw a hmo han.

### *Cathut hoi Tangka*

<sup>24</sup> Apihai bawi kahni touh e san lah awm thai hoeh. Bawi buet touh hah pahnawt vaiteh buet touh hah a lungpataw han. Hoehpawiteh buet touh hah banglahai na pouk hoeh vaiteh, buet touh hah na kâuep han. Cathut hoi tangka san lah vai touh lahoi mek na taw k thai mahoe h.

### *Na lungpuen hanh*

#### *Luk 12:22-31*

<sup>25</sup> Hatdawkvah bangne ka canei han tihoi na hring na hanlah na lungpuen awh hanh. Bangne ka khohna han tihoi na tak hanlah na lungpuen awh hanh. Rawca hlak hringnae heh ap hu bet ao nahoe hmaw. Khohna hlak na tak ap hu bet ao nahoe hmaw. <sup>26</sup> Kahlun kamleng e tavanaw hah kenhaw. Hote tavanaw ni cati hai patûe awh hoeh, cang hai a awh hoeh, capai daw k pâkhueng awh hoeh. Hatei, nangmae kalvanlae na Pa ni hotnaw hah a kaw k. Hote tavanaw hlak nangmouh teh ap hu moi na awm awh hoeh maw. <sup>27</sup> Apimaw a lungpuenna e lahoi amae hringnae hah bet ka saw sak thai han.

<sup>28</sup> Bangkongmaw khohna hane daw k na lungpuen awh. Kahrawng e lilikungnaw hah bangtelamaw a roun g ati e hah kenhaw. Thaw hai

tawk awh hoeh. Pahla hai sawn awh hoeh. <sup>29</sup> Solomon siangpahrang e khohna e ni hote akung e khohna boehai phat hoeh. <sup>30</sup> Yuemnae kayounnaw, sahnin kahring ni teh tangtho hmai dawk phum e phonaw patenghai hottelah Cathut ni pathoup pawiteh nangmouh natawng teh hot hlak na pathoup awh mahoe na maw. <sup>31</sup> Hatdawkvah bangne ka canei han, bangne ka khohna han ti hoi na lungpuen awh hanh. <sup>32</sup> Jentelnaw ni doeh het patet e hnonaw dawk a lungpuen awh. Nangmouh ni na panki awh e hah nangmae kalvanlae na Pa ni koung a panue. <sup>33</sup> Hatei, Cathut uknaeram hoi a lanna hah hmaloe tawng awh. Hathnukkhu hote hnonaw teh na poe sin awh han. <sup>34</sup> Hatdawkvah tangtho hanelah lungpuen awh hanh. Tangtho e hnin ni nang han lah a lungpuen han doeh. Sahnin kaawm e hno kahawihoehe hah sahnin hanelah a khout.

## 7

### *Ayânaw lawkceng awh hanh.*

#### *Luk 6:41-42*

<sup>1</sup> Nangmouh teh lawkceng lah na o awh hoeh nahanlah, ayânaw hah lawkceng awh hanh. <sup>2</sup> Ayânaw lawk na ceng e patetlah nama hai lawkceng lah na o van han. <sup>3</sup> Na mit dawk e thingtaboung teh na pouk laipalah, hmaunawngaha mit dawk e songnawng teh bangkongmaw khuet na hmu vaw. <sup>4</sup> Na mit dawk thingtaboung ao nahlangva vah na hmaunawngaha koe na mit dawk e songnawng ca hah na lat pouh vai khuet na ti a vaw. <sup>5</sup> Ka

kâsak e naw : na mit dawk e thingtaboung hah hmaloe takhoe awh ei. Hat boipawiteh nouh na hmaunawnggha mit dawk e songnawngca hah kacaicalah na hmawt vaiteh na lat thai ti. <sup>6</sup> Kathoung hno hah Uinaw poe awh hanh. Pale hah voknaw hmalah tâkhawng awh hanh. A khok hoi coungroe awh vaiteh, nama koe lah kamlang awh vaiteh na kei awh han.

*Het, tawng, takhawng*

*Luk 6:41-42*

<sup>7</sup> Het awh. Poe lah na o awh han. Tawng awh, na hmu awh han. Takhawnggh awh, takhang teh nangmouh hanlah paawng lah ao han. <sup>8</sup> Apihai ka hete ni teh a hmu. Ka tawng e ni teh a pâphawng. Ka takhawng e teh paawng pouh lah ao. <sup>9</sup> Nangmouh thung dawkvah, na ca ni vaiyei a hei nah talung ka poe hane tami na o a maw. <sup>10</sup> Hoehpawiteh, tanga a hei nah tahrin ka poe hane tami na o a maw. <sup>11</sup> Nangmouh ni patenghai canaw hanelah, hno kahawi poe hanelah na panuek awh pawiteh, kalvan kho kaawm e nangmae na Pa ni natawng teh, ka hetnaw hah banghloimaw kahawi e poehnonaw hah a poe han! <sup>12</sup> Hatdawkvah, nama koe ayânaw ni hnokahawi sak sak han na ngai e patetlah, ayânaw koehai sak van. Hethateh, kâlawk pueng hoi profetnaw e lawk doeh.

*Kabueng e longkha hoi ka kaw e longkha*

<sup>13</sup> Kabueng e longkha dawk kâen awh. Rawk-nae koe ka phatkhai e longkha hoi lam teh a kaw dawkvah, ka dawn e tami apap. <sup>14</sup> Hringnae

koe ka phatkhai e longkha hoi lam teh a bueng dawkvah kâen e tami teh a youn ca.

*Thingkung hoi a paw*

<sup>15</sup> Profetkaphawknaw hah kâhruetcuwet awh. Nangmouh koe a tho awh navah, tupho a kâkhu awh teh tu patetlah a kâsak awh. Athung teh Asui ka matheng lah ao awh. <sup>16</sup> Hotnaw teh amamae a paw lahoi na nout a thai. Pâkhing tangdun dawk hoi misurpaw paw boihoeh. Pâkhingkung dawk hoi thaibunglung paw paw boihoeh. <sup>17</sup> Hot patetvanlah, thingkung kahawi ni a paw kahawi a paw teh, thingkung kahawihoehe ni a paw kahawihoehe a paw van. <sup>18</sup> Thingkung kahawi ni a paw kathout paw boi hoehe, hahoi, thingkung kathout ni a paw kahawi paw boihoeh. <sup>19</sup> A paw kahawi ka paw hoehe e thingkungnaw pueng tâtueng vaiteh hmai dawk phum lah ao han. <sup>20</sup> Hot patetvanlah profetkaphawknaw teh amamae paw lahoi nout thai e lah ao.

<sup>21</sup> Bawipa, Bawipa ka tet e pueng ni kalvan uknaeram thung a kâen awh han tinae nahoeh. Hatei, kalvan kho kaawm e a Pa lungngai ka sak e dueng ni doeh a kâen han. <sup>22</sup> Tami moikapap ni hot hnin toteh, Bawipa, Bawipa, na min lahoi Cathut lawk ka dei a nahoehmaw. Na min lahoi kahraituilinaw hai ka pâlei a nahoehmaw. Na min lahoi kângairu hnonaw hai ka sak a nahoehmaw. , telah ati awh han. <sup>23</sup> Hat toteh, kai ni nangmanaw khoeroe na panuek awh hoehe. Cet awh. Hnokahawi ka sak hoehe e naw, telah kamcengcalah ka ti pouh awh han.

*Im kasakkung**Luk 6:47-49*

<sup>24</sup> Hatdawkvah, apipatet hai ka dei e lawknaw hah a thai teh ka tarawi e tami teh, lungsong daw k im ka sak e tami a lungkaang e hoi a kâvan.

<sup>25</sup> Kho a nan, tui a len, kahlî a tho teh hote im hah a hmang. Hat nakunghai rawm hoeh. Bangkongtetpawiteh, lungsong daw k adu a ung dawkvah. <sup>26</sup> Hatei, apipatet hai ka dei e lawknaw hah a thai teh ka tarawi hoeh e teh, sadi daw k im ka sak e tami ka pathu e hoi a kâvan. <sup>27</sup> Kho a nan, tui a len, kahlî a tho teh hote im a hmang toteh kayawicalah a rawp teh peng kâraphoe teh a rawk.

<sup>28</sup> Jisuh ni hete lawknaw pueng koug a dei hnukkhu vah, tamimaya teh a cangkhai e daw k a kângairu aw h. <sup>29</sup> Bangkongtetpawiteh, cakathutkungnaw patetlah cangkhai laipalah, kâkatawnnaw patetlah a cangkhai.

**8***Hrikbei e a dam sak**Mrk 1:40-44; Luk 5:12-14*

<sup>1</sup> Jisuh mon lahoi a kumcathuk navah tami moikapap ni a hnuk a kâbang aw h. <sup>2</sup> Hatnavah ka hrikbei e tami buet touh ni a tabo teh, Bawipa na ngainae aw m pawiteh na thoung sak thai, atipouh.

<sup>3</sup> Jisuh ni, ka ngainae ao, thoungnae koe phat lawih, atipouh teh, a kut a dâw teh a tek. Dawngdengca daw k a hrikbei a kahma teh thoungnae koe a pha. <sup>4</sup> Jisuh ni, hete kong heh api koehai na dei pouh hoeh nahanlah

kâhruetcuet. Vaihmanaw koe cet nateh, na tak hah patue. Ayânaw koe lawkpanuesaknae lah ao nahan, Mosi ni kâ poe e patetlah thuengnae hah sak, atipouh.

*Ransabawi e a yuemnae*

*Luk 7:1-10*

<sup>5</sup> Hathnukkhu, Kapernuam kho lah a cei navah, ransabawi buet touh a tho teh, <sup>6</sup> Bawipa, kaie ka san buet touh teh a kutkhok roup a kamkhuen, puenghoi patawnae a khang teh im vah sut a yan telah a kâhei. <sup>7</sup> Jisuh ni, ka tho vaiteh ka dam sak han, atipouh. <sup>8</sup> Hahoi ransabawi ni, Bawipa im dawk na tho hane heh kamcu hoeh. Lawk kam touh ma na dei pawiteh kaie ka san teh a dam han doeh. <sup>9</sup> Bangnue nae lah, kai teh kâtawwnae rahim vah san lah ka o eiteh, ransanaw hah ka uk. Buet touh cet ka tet pouh pawiteh a cei, buet touh hi tho ka tet pouh pawiteh, a tho. Ka san haiyah hete tawk ka tet pouh pawiteh, a tawk telah ransabawi ni atipouh.

<sup>10</sup> Hote lawk hah Jisuh ni a thai navah a kângai lah a ru teh, atangcalah ka dei e teh, hettelah totouh e yuemnae hah Isarel miphunnaw dawk patenghai ka hmawt boihoeh rah. <sup>11</sup> Bout ka dei e teh, tami kapap ni, kanîtho, kanîloumlah hoi tho vaiteh kalvan uknaeram thungvah Abraham, Isak, Jakop tinaw hoiyah cungtalah a tahung awh han. <sup>12</sup> Uknaeram thung e naw teh hâ kata hoi khuikanae, alawilah, hmonae koe pâlei lah kaawm han telah a hnukkâbangnaw koe a dei pouh. <sup>13</sup> Hathnukkhu ransabawi hah, cet leih.

Na yuemnae patetlah nang koe awmseh, atipouh. Hatnah tahma vah a san e patawnae pueng a kahma teh damnae a hmu.

*Tami moikapap patawnae a dam sak*

*Mrk 1:29-34; Luk 4:38-41*

<sup>14</sup> Hathnukkhu vah, Piter im Jisuh a tho teh, Piter e a masei napui a pataw teh sut a yan e hah a hmu. <sup>15</sup> Hote napui e a kut hah a tek pouh navah, a patawnae a kahma pouh dawkvah, a thaw teh, Bawipa hah kahawicalah a khetyawt. <sup>16</sup> Tangmin vah, kahraikathout ni a man e taminaw hah a thokhai awh teh, a lawk hoiyah hote kahraitulinaw hah a pâlei pouh. Ka pataw e pueng hah a dam sak. <sup>17</sup> Het hateh, profet Isaiaah ni a dei e, ahni ni maimae patawnae pueng a phu toe, tie lawk a kuep nahane doeh.

*Jisuh hnukkâbang e*

*Luk 9:57-60*

<sup>18</sup> Tami moikapap ni Jisuh a kaven awh e a hmu awh navah, namran lah cei hanelah kâ a poe. <sup>19</sup> Hatnavah kâlawk ka cangkhai saya buet touh ni a teng vah a tho teh, Bawipa, na ceinae hmuen koe kâbang van han atipouh. <sup>20</sup> Jisuh ni Asuinaw ni khu a tawn. Kahlun kamleng e tawanaw ni kâhat nahane tabu a tawn awh. Tami Capa teh a lû toung nahane boehai awm hoeh atipouh. <sup>21</sup> A louk e a hnukkâbang buet touh nihai, Bawipa, ka cei vaiteh, apa e ro hah hmaloe ka pakawm ei nei, atipouh. <sup>22</sup> Jisuh ni, ka hnuk kâbang haw. Kadoutnaw ni amamae tami kadoutnaw hah pakawm a ngoun seh, atipouh.

*Tuicapa a roum sak**Mrk 4:36-41; Luk 8:22-25*

<sup>23</sup> Hatnavah, long thung a kâen teh a hnukkâbangnaw ni a kâbang awh. Talî daw k tuicapa thouk a thaw dawkvah long hah muen a khu. <sup>24</sup> Hatnavah Jisuh teh a i. <sup>25</sup> A hnukkâbangnaw ni, Jisuh hah a pâhlaw awh. Bawipa maimouh pueng teh due awh han toe hei, na rungngang awh leih atipouh awh. <sup>26</sup> Jisuh ni, yuemnae a thakayounnaw, bangkongmaw na taki awh, telah atipouh hnukkhu, a kangdue teh, kahlî hoi tuipei hah a yue teh a roum sak. <sup>27</sup> Ahnimanaw ni, bangpatetlah e tami ma aw, kahlî hoi tuicapa ni hai a lawk a ngai pouh bo aw titeh a kângai lah a ru awh.

*Kahraikathoutnaw pâleinae**Mrk 5:1-17; Luk 8:26-37*

<sup>28</sup> Namran lah kaawm e Gadarenes ram lah a pha navah, kahrai ni a man e tami kahni touh hawvah ao roi, apihai hote lam a dawn thai awh hoeh nahanlah a mathengpaan roi. Phuen hoi a tâco roi teh Jisuh a dawn roi. <sup>29</sup> Cathut Capa Jisuh, kaimouh hoi bangtelamaw na kâkuet vaw. Atueng a pha hoehnahlan kaimouh hah rektap hanelah khuet na tho vaw telah hramki laihoi ati roi.

<sup>30</sup> Ahnimouh hoi ek ahlahoehnae koe voknaw moikapap a pâ awh. <sup>31</sup> Kahraituulinaw niyah, Jisuh kaimouh na hrek pawiteh hote voknaw thungvah na kâen sak telah a kâhei awh. Jisuh ni, cet awh atipouh. <sup>32</sup> Kahrainaw hai a tâco awh teh voknaw thung a kâen awh. Vok kaawm e pueng teh tui teng pango daw k hoi a

tâto awh dawkvah tui dawk koung a due awh.  
<sup>33</sup> Vok kakhounaw khothung a yawng awh teh,  
 kahraikathout ni a man e tami roi e kong hoi a  
 hmu awh e naw pueng hah a dei awh dawkvah,  
<sup>34</sup> Khothung e taminaw pueng ni Jisuh kâhmo  
 hanelah a tâco awh. Jisuh hah a kâhmo awh  
 toteh kaimae ram thung hoi a tâco hanelah a  
 kâhei awh.

## 9

### *Kutkhok kamkhuen e a dam sak* *Mrk 2:3-12; Luk 5:18-26*

<sup>1</sup> Hahoi, Jisuh ni long dawk a kâcui teh, a  
 ma onae kho tui namran lah a pha navah,  
<sup>2</sup> a kutkhok kamkhuen e tami buet touh ikhun  
 dawk sut ka yan e hah ama koe a thokhai  
 awh. Jisuh ni hotnaw e yuemnae hah a hmu  
 navah, ka kamkhuen e tami hanelah, ka capa,  
 kângai hanh. Na yon ngaithoum lah ao toe.  
<sup>3</sup> Cakathutkungnaw tangawn ni teh Cathut ka  
 tapuet lah lawk a dei telah a pouk awh.

<sup>4</sup> Jisuh ni hotnaw e lungpouk hah a hmu  
 navah, nangmouh ni bangkongmaw utsinnae  
 lung na tawn awh. <sup>5</sup> Bang lawk maw dei bet  
 ka yawihnawn. Na yon ngaithoum lah ao toe  
 tie maw bet ka yawihnawn, nahoeh teh thaw  
 nateh cet leih tie maw bet ka yawihnawn. <sup>6</sup> Tami  
 Capa teh talaivan vah yon ngaithoum thainae  
 kâtawanna ka tawn tie nangmouh ni na panue  
 awh nahanelah, thaw leih. Na phailei hah sin  
 nateh nama im vah cet leih, telah ka kamkhuen  
 e tami hah atipouh. <sup>7</sup> Ahni ni a thaw teh a ma  
 im vah a cei. <sup>8</sup> Tami kamkhuengnaw ni a hmu

awh navah a kângairu awh teh, taminaw koevah hettelah sak thainae kapoekung kahring Cathut hah a pholen awh.

*Matthai a kawnae*

*Mrk 2:13-17; Luk 5:27-32*

<sup>9</sup> Hote hmuen koehoi Jisuh a cei navah, tamuk cawngnae im dawk ka tahung e Matthai hah a hmu navah, ka hnuk kâbang haw atipouh. Ahni hai a thaw teh, a hnuk a kâbang.

<sup>10</sup> Hathnukkhu imthung bu ca hanlah a tahung navah, tamuk kacawngnaw hoi tamikathoutnaw a tho awh teh, a hnukkâbangnaw hoi rawca reirei a ven awh. <sup>11</sup> Farasinaw ni a hmu awh toteh, a hnukkâbangnaw koe, nangmae Bawipa teh bangkongmaw tamuk kacawngnaw, tamikathoutnaw hoi cungtalah reirei a canei vaw, atipouh awh.

<sup>12</sup> Jisuh ni a thai navah, a tak kadamnaw ni tâsibawi panki awh hoeh. Kapatawnaw ni doeh a panki awh. <sup>13</sup> Thuengnae hlak hai pahrennae doeh ka ngai tie na thai panuek awh nahanlah cet a nateh kamtu awh. Tami kalannaw kaw hanlah ka tho hoeh, tamikayonnaw hanelah doeh ka tho, atipouh.

*Rawcahainae kong a pacei awh*

*Mrk 2:18-22; Luk 5:33-39*

<sup>14</sup> Hatnavah Jawhan e a hnukkâbangnaw ni ahni koe a hnai awh teh, kaimouh hoi Farasinaw ni rawca ka hai awh. Bangkongmaw na hnukkâbangnaw ni rawca a hai awh hoeh vaw, atipouh awh. <sup>15</sup> Jisuh ni, yupaluenkung teh amae a huikonaw hoi rei ao navah, ahnimouh

teh a lungmathoe a maw. Yupaluenkung hah a huikonaw hoi kapek teh alouklah ceitakhainae tue ka phat han. Hattoteh ahnimouh ni rawca a hai aw h han.

<sup>16</sup> Khohna a kapawn e hah a katha e hoi ouk bo aw h hoeh. Hottelah bo pawiteh bonae ni bo e hah vak sawn vaiteh hoe kâphi han.

<sup>17</sup> Hot patetvanlah, phaivuen um karuem daw k misurtui katha e hlun boihoeh. Hottelah hlun pawiteh, phaivuen um karuem tangpaw k vaiteh, misurtui a yu han, phaivuen um hai karaw k han. Ahruem e misurtui teh a katha e phaivuen um daw k doeh ouk hlun. Hottelah hlun to doeh kahni touh hoi a cuem han, atipouh.

*Ka dout e napui hoi thikui e napui*

*Mrk 5:22-43; Luk 8:41-56*

<sup>18</sup> Hete lawknaw a dei lahun nah, bawi buet touh a tho teh, a tabo laihoi Bawipa, ka canu teh atuhlangca a due toe. Hatei, na tho teh, a van vah na kut na toung sin pawiteh bout a hring han atipouh. <sup>19</sup> Jisuh ni a thaw teh a hnukkâbangnaw hoi ahnie a hnuk a kâbang aw h.

<sup>20</sup> Hatnavah, kum hlaikahni touh thung thikui patawnae ka tawn e napui buet touh ni, <sup>21</sup> a kâkhu e hni paw i ma hah dek ka tek pawiteh ka dam han telah a pouk daw kvah, rek a hnai teh hni paw i hah dek a tek.

<sup>22</sup> Jisuh ni a kamlang teh hote napui hah a hmu navah, ka canu, kângai hanh. Na yuemnae ni na patawnae a dam sak toe, atipouh. Hat nah hote napui teh a patawnae a dam pouh.

<sup>23</sup> Bawi im a pha aw h toteh, tapueng longpan

kakhawngnaw hoi taminaw teh ruengrueng ati aw h e a hmu navah, <sup>24</sup> na phoun aw haw, napui ca teh kadout e nahoe h, ka ip e doeh, atipouh. Hahoi ahnimanaw ni a panuikhai aw h. <sup>25</sup> Haw e taminaw hah koug a tâco sak teh, imthungkhu a kâen, napui ca e a kut daw k a tek pouh tahma vah, napui ca teh hluet a thaw. <sup>26</sup> Hote kamthang teh khoram pueng daw k a kamthang.

*A mit ka dawnaw hoi lawkanaw a dam sak*

<sup>27</sup> Jisuh ni hote hmuen koehoi a tâco navah, a mit ka dawn e tami kahni touh ni a hnuk a kâbang roi teh, Devit capa, kaimouh roi heh na pahren haw, telah a hramki roi. <sup>28</sup> Imthung a kâen navah a mit ka dawn e roi ni rek a hnai roi. Bawipa ni hete heh kai ni ka coung sak thai tie hah na yuem roi maw telah a pacei. Ahnimouh roi ni, ka yuem Bawipa ati roi.

<sup>29</sup> Ahnimouh roi e a mit daw k a tek pouh teh, na yuemnae patetlah nangmouh roi koe awmseh, atipouh navah ahnimouh roi e mit teh a ang. <sup>30</sup> Jisuh ni, apihai panuek sak roi hanh lah a, telah kâhruetcuetnae a poe. <sup>31</sup> Hatei, ahnimouh roi ni a cei roi teh, hote kamthang hah ram thung pueng a pathang roi.

<sup>32</sup> Ahnimanaw a cei a hnukkhu, kahrai ni a man e tamipathu buet touh ama koe a hrawi aw h. <sup>33</sup> A thung e kahrai a pâlei pouh toteh, hote ka pathu e ni lawk a dei. Ka kamkhueng e pueng teh a kângai lah a ru aw h teh, Isarel miphun daw k het patetlah e hmawt boihoeh rah ati aw h. <sup>34</sup> Farasinaw ni kahraituulinaw e bawi a kâuep laihoi doeh kahraituulinaw a pâlei ati aw h.

<sup>35</sup> Jisuh ni khopui khote pueng dawk a cei teh, sinakoknaw dawkvah uknaeram kamthang kahawi hah a cangkhai. Patawnae a cawngca hoi kapatawnaw a dam sak. <sup>36</sup> Ahnimanaw teh ngawt a tawn awh toung dawkvah, tukhoumkung kaawm hoeh e, pahnawt e tunaw patetlah a hmu. <sup>37</sup> Hatnavah, Jisuh ni, canga hane moi ao. Ka tawk e naw teh a younca.

*Thaw katawkkung ayounca*

<sup>38</sup> Hatdawkvah, law katawnkung koe ratoum awh, canga sak hanelah thawtawkkung a patoun thai nahanlah atipouh.

## 10

*A hnukkâbang hlaikahni touh*

<sup>1</sup> A hnukkâbang hlaikahni touh hah a kaw teh, kakhine muithanaw pâlei thainae, patawnae aphunphun dam sak thainae kê a poe. <sup>2</sup> Guncei hlaikahni touh e a minnaw teh, apasuek vah Piter telah kaw e Simon hoi a nawnggha Andru, <sup>3</sup> Zebedee e capa Jem hoi a nawnggha Jawhan, Filip hoi Bartholomew, Thomas hoi tamuk ka cawng e Matthai, <sup>4</sup> Alfe capa Jem hoi Thaddaeus telah min katha hoi kaw e Lebbeus, Kanaan tami Simon hoi Judah Iskariot, ahni teh Jisuh ka pahnawt e doeh.

*A hnukkâbang hlaikahni touh patounnae*

<sup>5</sup> Jisuh ni hete hlaikahni touh hah a patoun teh, kê a poe. Nangmouh teh Jentelnaw onae koe cet awh hanh. Samaria kho thung kêen awh hanh. <sup>6</sup> Isarel miphun kahmat e tunaw

onae koe hmaloe cet awh. <sup>7</sup> Na cei awh nah kalvan uknaeram teh a hnai toe telah pâpho awh. <sup>8</sup> Kapatawnaw hah damnae poe awh. Kadoutnaw hah thaw sak awh. Ka hrikbei naw hah thounsak awh. Kahraituulinaw hah pâlei awh. Nangmouh teh apfu laipalah na coe awh dawkvah, apfu dâw laipalah poe awh. <sup>9</sup> Sui, ngun, rahum tangkanaw hah tangkabom thung kâen awh hanh. <sup>10</sup> Kahlong na cei nah lam hanelah, yawngya, angki kahni touh, khokkhawm, sonronnaw hah kampu awh hanh. Bangkongtetpawiteh, ka tawk e teh paca hanlah a kamcu raw doeh.

<sup>11</sup> Bangpatet e khopui khotenaw dawk na kâen awh navah, api hoi maw a kamcu tie hah pacei a nateh, hote kho dawk hoi na tâco awh hoehroukrak ahnie im dawkvah awm awh. <sup>12</sup> Imthung na kâen awh nah, yawhawinae awm naseh telah pato awh. <sup>13</sup> Hote imthung ni kamcu pawiteh nangmouh ni na dei awh e yawhawi lungmawngnae teh ahnimouh koe phat lawiseh. Kamcu hoehpawiteh nangmouh koe bout ban lawiseh. <sup>14</sup> Apipatet haiyah, nangmouh na luen sak awh hoeh, nangmae lawk hai ngâi awh hoehpawiteh, ahnie im thung hoi na tâco awh navah, hoehpawiteh, hote kho thung hoi na tâco nah, na khoktabei dawk e vaiphu hah takhawng sin awh. <sup>15</sup> Atangcalah na dei pouh awh. Lawkcengnae hnin dawkvah hote kho hateh, Sodom hoi Gomorrah kho hlak hoe a khang awh han.

*Ka tho hane runae*

<sup>16</sup> Asui um vah tunaw tha e patetlah kai ni nangmouh na patoun awh. Hatdawkvah, tahrin patetlah lungang a nateh, Bakhu patetlah asue laipalah awm awh. <sup>17</sup> Taminaw hah kâhruetcueth awh. Lawkcengnae hmuen koevah na thak awh han. Sinakoknaw dawkh na hem awh han. <sup>18</sup> Khobawinaw hoi siangpahrangnaw koevah Kai kecu dawkh na thak awh han. Ahnimanaw hoi Jentelnaw koe lawkpanuesaknae lah ao nahan lah. <sup>19</sup> Hottelah na thak awh toteh bangtelamaw ka dei han tie hah kângai awh hanh. Dei hane lawk hah atueng a pha toteh na coe awh han. <sup>20</sup> Na mahmawkh na dei awh e na hoeh. Nangmae na Pa e Muitha ni nangmouh lahoi yah a dei e doeh.

<sup>21</sup> Hattoteh hmaunawngaha reira due sak hanlah a kâthak awh han. A na pa ni capa hah a thak han, canunaw ni hai manu na pa hah taran vaiteh a due sak awh han. <sup>22</sup> Taminaw ni haiyah, Ka min kecu dawkh na hmawt ngai a mahoeh. Apipatet haiyah a pout ditouh ka cak e teh rungngang lah ao han. <sup>23</sup> Kho buet touh dawkh na rektap awh pawiteh, kho buet touh dawkh yawng awh. Atangcalah na dei pouh awh. Isarel kho pueng, koung na katin awh hoehnahlan tami Capa teh a tho han.

<sup>24</sup> A hnukkâbang e ni kacangkhaikung tapuet hoeh. A san ni a bawipa tapuet hoeh. <sup>25</sup> A hnukkâbang e teh kacangkhaikung patetlah san teh a bawipa patetlah awm pawiteh a khout. Imkung hah Beelzebub telah kaw awh pawiteh a imthungnaw natawng teh hoe a kaw awh han nahoehmaw.

*Cathut takinae*

<sup>26</sup> Hatdawkvah, ahnimanaw hah taket aw h hanh. Ramuk e pueng peng kamnuek han. Arulah kaawm e pueng hai ka kamphawng han.

<sup>27</sup> Kai ni a hmonae koe na dei pouh e naw hah nangmouh ni a angnae koe dei aw h. Na hnâ koe duem ka dei teh na thai aw h e naw hah lemphu hoi hramkhai aw h, atipouh. <sup>28</sup> Tak ka thet thai niteh, muitha ka thet thai hoeh e hah taket aw h hanh. Tak hoi muitha hah hell daw k mek ka thet thai e hah hoe taket aw h.

<sup>29</sup> Pusu kahni touh hah rahum tangka phe k touh hoi ran nahoehmaw. Nangmae na Pa koehoi laipalah hote pusu buet touh boehai talai baw t mahoe h. <sup>30</sup> Na sam patenghai koun g touk e lah ao. <sup>31</sup> Hatdawkvah taket aw h hanh. Pusunaw hlak nangmouh teh aphu na o aw h.

*Tami hmalah Khrih kampangkhai nae*

<sup>32</sup> Apipatet haiyah, tami hmalah Kai na kampangkhai e teh kalvan kho kaawm e a Pa hmalah ahni hah ka kampangkhai van han. <sup>33</sup> Apipatet haiyah taminaw hmalah Kai hah na ka pahnaw t e teh, kalvan kho kaawm e a Pa hmalah ahni teh ka pahnaw t van han.

*Roumnae laipalah kâkapeknae tahloi*

<sup>34</sup> Talai van vah roumnae tho sak hanelah a tho telah pouk aw h hanh. Roumnae tho sak hanelah ka tho hoeh. Tahloi patoun hanelah doeh ka tho. <sup>35</sup> Na pa hoi capa, manu hoi canu, mani hoi langa, kâkapek sak hanelah doeh ka tho. <sup>36</sup> Imthungnaw haiyah taran lah ao aw h han.

<sup>37</sup> Apipatet haiyah, Kai hlak a manu, a na pa lungpataw pawiteh, kai hoi ka kamcu

hoeh. Apipatet haiyah, canu capa hah Kai hlak lungpataw pawiteh kai hoi ka kamcu hoeh. <sup>38</sup> Apipatet haiyah amae thingpalam hrawm hoi ka hnukkâbang hoehpawiteh kai hoi kamcu hoeh. <sup>39</sup> A hringnae ka vum e teh hringnae a sung han. Kai kecu daw k a hringnae ka sung e teh, hringnae a coe han.

### *Tawkp hu na hmu han*

<sup>40</sup> Nangmouh na ka dâw e teh Kai hai na dâw toe. Kai na ka dâw e teh kai na kapatoukung hai a dâw toe. <sup>41</sup> Profet e minhmai khet lahoi ka dâw e teh, profet e tawkp hu hah a coe han. Tami kalan e minhmai khet lahoi ka dâw e teh, tamikalan e tawkp hu hah a coe han. <sup>42</sup> Apipatet haiyah, a hnukkâbangnaw e minhmai khet laihoi hete kathoengcae tami buetbuet touh hah tui pânding manang buet touh banghai ka pânei e tami teh, atangcalah na dei pouh awh, tawkp hu coe laipalah awm roeroe mahoe h, telah lawk a thui.

## 11

### *Jisuh hoi Baptisma Jawhan*

<sup>1</sup> Hottelah a hnukkâbang hlaikahni touh hah kâ a poe hnukkhu, cangkhai hane hoi kamthang pâpho hanelah khopui khote tangkuem koe a cei. <sup>2</sup> Khrih ni a sak e pueng hah Baptisma kapoekung Jawhan ni thongim thung hoi a thai navah, amae a hnukkâbang kahni touh a patoun teh, a ka tho hane teh nang toun g na maw. <sup>3</sup> Hoehpawiteh alouke maw ka ngaihawi awh han rah, telah a pacei sak. <sup>4</sup> Jisuh ni, Jawhan koe cet roi nateh na

thai awh e hoi na hmu awh e pueng hah dei pouh awh, atipouh. <sup>5</sup> Mit kadawnnaw ni kho a hmu awh toe. Kamkhuennaw ni lam a cei awh toe. Ka hrikbeinaw ni a thoung awh toe. Hnâpangnaw ni hnâ a thai awh toe. Kadoutnaw ni a thaw awh toe. Karoedengnaw ni hai lunghawinae kamthang a thai awh toe. <sup>6</sup> Kai kecu dawk a lung ka pout hoeh e teh a yawhawi telah atipouh.

<sup>7</sup> Ahnimouh a cei a hnukkhu, Jisuh ni Jawhan deingainae lahoi rangpuinaw a dei pouh e teh, nangmouh ni bang hmu hane lahoi maw kahrawng na tâco a vaw. Kahlî ni hon a nawi e phonaw khet hanelah maw na tâco awh. <sup>8</sup> Hoeh teh, khohna kahawi ka khohnat e khet hanelah maw na cei awh. Khohna kahawi ka khonaw teh siangpahrang im doeh ouk ao. <sup>9</sup> Profet khet hanelah maw na cei awh. Bokheiyah. Profet hlak kalen e lah ka o ka ti. <sup>10</sup> Cakathoung dawk thut e teh, khenhaw! na cei nahane lamthung ka rasoun hanelah kaie patoune hah na hmalah ka patoun ati navah ahni doeh a dei ngai nah.

<sup>11</sup> Atangcalah ka dei. Napui ni a khe e naw thung dawk Baptisma Jawhan hlak kalen e buet touh boehai kamphawng hoeh rah. Hatei, kalvan uknaeram dawkvah kathoungpoung hah ahni hlak a len han. <sup>12</sup> Baptisma Jawhan koehoi kamtawng teh atu totouh kalvan uknaeram hah a kâtuk awh. Kâtuk e naw ni hai thama lah a kâen awh. <sup>13</sup> Jawhan a pha hoehnahlan totouh kâlawnaw hoi profet lawknaw ni na cangkhai awh. <sup>14</sup> Nangmouh ni ka lawk hah na thai panuek awh pawiteh ahni teh ka tho hane Elijah doeh toe. <sup>15</sup> Thai nahan hnâ ka tawn pueng ni

thai naseh.

<sup>16</sup> Hete miphunnaw hah bang hoi maw ka bangnue han vai. Pawi koe ka tahung e camonaw hoi a kâvan aw. <sup>17</sup> Kahawicalah ratoung tamawi ka tum a haiyah na lam aw. hoeh. Khuika la sak nahaiyah na kap aw. hoeh.

<sup>18</sup> Jawhan teh catnet laipalah a tho navah, kahrai ni a man e doeh bout na ti aw. <sup>19</sup> Tami Capa teh canei laihoi a tho navah, ka carawng e, misurtui kâso e, tamuk kacawngnaw hoi tamikayonnaw e huiko lah kâsak e bout na ti pouh aw. Hateiteh, a lungangnae ni, a canaw a hlout sak telah a ti.

*Pankângai hoeh e khonaw yawthoene*  
*Luk 10:13-15*

<sup>20</sup> Hatnavah, athaonae a kamnue saknae khonaw ni pankângainae a tawn aw. hoeh dawkvah, hote khonaw hah Jisuh ni a yue.

<sup>21</sup> Oe! Khorazin, na yawthoe. Bethsaida, na yawthoe. Nangmouh koe thaonae hno ka sak e naw hah Taire hoi Sidon khonaw dawkvah ka sak boipawiteh, hotnaw ni buri kâkhu hoi vaiphu kâphuen aw. vaiteh, pankângai aw. han ei nan toung mah. <sup>22</sup> Atangcalah na dei pouh aw, lawkcengnae hnin dawkvah, nangmouh teh Taire hoi Sidon khonaw hlak na khang aw. han. <sup>23</sup> Kapernuam kho, nang teh kalvan totouh tawm lah na kaawm ei nakunghai, phuen kho totouh pabo lah na o han. Na thungvah thaonae hno sak lah kaawm e naw hah Sodom kho dawkvah ka sak pawiteh, hote kho teh atu sittouh kangdout han ei. <sup>24</sup> Atangcalah na dei

pouh awh. Lawkcengnae hnin dawkvah Sodom kho hlak hoe na khang awh han, atipouh.

*Hnori kaphawtnaw tho awh*

*Luk 10:21-22*

<sup>25</sup> Hatnavah, Jisuh ni, kalvan hoi talai kaukung a Pa, nang ni a lungkaangnaw hoi kathoumnaw koe kângairu hnouaw hah na hro teh, camonaw koe na pâpho dawkvah na lungmanae teh ka pholen. <sup>26</sup> Oe apa hottelah na ngainae ao. <sup>27</sup> A Pa nang ni hnocawngca pueng kai koe na poe toe. Pa laipalah apinihai Capa panuek hoeh. Capa hoi Capa ni a kamnue pouh e hloilah apinihai Pa teh panuek hoeh.

<sup>28</sup> Hno ka ri ni teh kapatangnaw kai koe tho awh, kai ni na kâhat sak han. <sup>29</sup> Kaie kahnam hah phawt awh. Kai koe kamtu awh. Kai teh lungdonae hoi lungnemnae lah ka o. Na hringnae ni kâhatnae a hmu han. <sup>30</sup> Bangkongtetpawiteh, kaie kahnam teh phu a nep. Ka hno hai a pâhaw, atipouh.

## 12

*Jisuh teh Sabbath Bawi lah a o*

*Mrk 2:23-28; Luk 6:1-5*

<sup>1</sup> Hatnae tueng nah, Jisuh teh Sabbath hnin vah, catun lawnaw daw k a cei navah, a hnukkâbangnaw teh a vonhlam awh dawkvah, catun vuinaw hah a pahroe awh teh a bap awh.

<sup>2</sup> Farasinaw ni a hmu toteh, sabbath hnin sak hoeh hane kawihah na hnukkâbangnaw ni a sak awh, telah atipouh awh. <sup>3</sup> Jisuh ni, Devit teh a huinaw hoi a vonhlam awh navah, <sup>4</sup> Cathut e

im dawk a kâen teh, a ma ni a cakawi hoeh e, a huinaw ni hai a cakawi hoeh e, vaihmanaw ni dueng a cakawi e vaiyei a ca e hah na touk a boihoeh maw. <sup>5</sup> Vaihmanaw nihaiyah, bawkim dawk sabbath hnin a hnan awh ei, tounhoehe lah ao tie hah kâlawnaw dawk na touk a boihoeh maw. <sup>6</sup> Kai ni ka dei e teh, hie hmuen koe bawkim hlak hoe kalen e ao. <sup>7</sup> Thuengnae hlak pahrennae hah ka ngai tie Cakathoung dawk kaawm e na thai panuek awh pawiteh, yon ka tawn hoeh e naw hah yonpen awh mahoehe ei. <sup>8</sup> Tami Capa teh sabbath hnin kaukung lah ao, atipouh.

*Kutvang kamkhuen e a dam saknae*

*Mrk 3:1-6; Luk 6:6-11*

<sup>9</sup> Hote hmuen koehoi a cei teh sinakok thung a kâen. A kutvang ka khem e tami buet touh ao. <sup>10</sup> Tami tangawn ni Jisuh a yon tawngnae lah, sabbath hnin vah patawnae roum sak kawi maw, titeh a pacei awh. <sup>11</sup> Jisuh ni, tu buet touh na tawn e ca hah sabbath hnin vah, tangkom thung bawt pawiteh rasat laipalah kaawm hane tami buet touh banghai nangmouh thung dawk na o awh maw. <sup>12</sup> Tami teh tu hlak aphu ao nahoehmaw. Hatdawkvah, sabbath hnin hnokahawi sak kawi lah ao, atipouh. <sup>13</sup> Hote a kutvang kadout e koevah, na kut hah dâw haw, atipouh navah ahni ni a kut a dâw teh, avanglae kut patetlah ao. <sup>14</sup> Hattoteh Farasinaw a tâco awh teh, Jisuh bangtelah hoi maw thei han telah a kapan awh.

*Cathut thaw ka tawk e*

<sup>15</sup> Jisuh ni a panue dawkvah, hote hmuen koehoi alouklah a cei teh, moikapap e taminaw ni a kâbang aw h teh, ahnimae patawpanatnae kaawm e pueng hah a dam sak pouh. <sup>16</sup> Ahnimouh ni pung a pathang aw h hoeh nahan kâhruetcuetnae a poe. <sup>17</sup> Hot teh, profet Isaiah e lawk a kuep nahane doeh. <sup>18</sup> Isaiah ni a dei e lawk teh, thai aw h haw, ka rawi e ka san, ka pahren poung e ahni dawkvah ka lung ahawi tangngak. Ahni daw k ka muitha ka caksak han. Jentelnaw hah lawkcengnae kâ ka poe han. <sup>19</sup> Oun hoeh, hram hoeh. Hatdawkvah ahnie lawk apinihai lam daw k thai mahoe h. <sup>20</sup> Coungroe e lungpungkung khoe hoeh, hmaikhu kapap e hmaipalai dout hoeh, A lawk teh tânae koe a pha nahanlah a sak han. <sup>21</sup> A min haiyah Jentelnaw ni a kâuep aw h han, telah a pâpho.

### *Jisuh hoi Beelzebub*

*Mrk 3:23-27; Luk 11:17-22*

<sup>22</sup> Hatnavah, kahrai ni a man teh, mit ka dawn, lawk ka a e tami buet touh a ma koe a thokhai aw h. A mit bout a ang teh, lawk bout a dei thai nahanlah Jisuh ni ahawi sak. <sup>23</sup> Hawvah ka kamkhuengnaw pueng ni a kângairu aw h teh, ahni heh Devit e capa han na maw telah ati aw h. <sup>24</sup> Farasinaw ni a thai aw h navah, ahni teh kahraituilinaw e bawi Beelzebub a kâuep laihoi doeh kahraituilinaw hah a pâlei thai, ati aw h.

<sup>25</sup> Jisuh ni hotnaw e pouknae a panue pouh dawkvah, bangpatet e uknaeram haiyah amamouh hoi mamouh kâpo aw h hoehpaw-iteh, rawknae koe a pha aw h han. Bangpatet e khoram hoi imthung haiyah amamouh hoi

mamouh kâpo awh hoehpawiteh kangdout thai mahoe. <sup>26</sup> Setan ni Setan hah pâlei pawiteh, amamouh hoi mamouh kâkapek vaiteh a uknaeram bangtelamaw a kangdue thai han vaw. <sup>27</sup> Kai ni Beelzebub kâuep laihoi kahraituulinaw ka pâlei pawiteh, nangmae canaw niteh, apimaw a kâuepkhai vaiteh a pâlei awh han. Hatdawkvah ahnimouh teh nangmouh lawkcengkung lah ao awh han. <sup>28</sup> Kai ni Cathut e Muitha hah kâuep laihoi kahraituulinaw ka pâlei pawiteh, atangcalah nangmouh koe Cathut uknaeram kangdue nahane tueng teh a pha toe. <sup>29</sup> A thakaawmpounge tami, a ma hah hmaloe katek hoehpawiteh, apinimaw ahni imthung a cei vaiteh hnopainaw hah a lawp thai han. A ma hah hmaloe katek pawiteh doeh a hnopainaw hah lawp thai lah awm tih. <sup>30</sup> Kai koe lah kambawng hoeh e teh ka taran doeh. Kai hoi cungtalalah kaawm hoeh e teh kampek e lah ao.

### *Muitha ka dudam e*

<sup>31</sup> Hatdawkvah, ka dei e teh, yonnae puenghoi Cathut dudamnae yon pueng hai taminaw ni ngaithoumnae a hmu thai awh. Hatei, Kathoung Muitha dudamnae yon teh taminaw ni ngaithoumnae hmawt thai awh hoeh. <sup>32</sup> Tami Capa hah a pahni hoi ka yon e yon ngaithoum thai. Kathoung Muitha hah a pahni hoi ka yon e yon teh atu a hring na hai, due hnukkhu hring nah hai ngaithoum thai mahoe.

<sup>33</sup> A paw daw k hoi akung e coungnae a kamnue dawkvah, a paw hawi pawiteh akung hai ahawi. A paw hawihoe pawiteh a kung hai hawi hoeh.

<sup>34</sup> Hrunthoe catounnaw, laplap na thoe aw h nahlangva kahawi e lawk hah bangtelamaw na dei thai aw h han. Lungthung kakawi e patetlah doeh pahni ni hai a dei. <sup>35</sup> Tami kahawi ni teh a lungthung e kahawi e hno hah a rasa. <sup>36</sup> Ka dei e teh, taminaw ni aphu kaawm hoeh e lawk na dei e pueng hah, lawkcengnae hnin dawkvah nama ni na deicai han. Na lawknaw lahoi yah, yon hlout lah na o han. <sup>37</sup> Hoehpawiteh, na lawk dei e naw lahoi yah. yon lawkceng lah na o han, atipouh.

*Jawnah e mitnout*

*Luk 11:29-32*

<sup>38</sup> Hat torei teh, cakathutkungnaw hoi Farasinaw niyah, Bawipa kaimouh ni mitnoutnae buetbuet touh hmu han ka ngai, atipouh aw h. <sup>39</sup> Jisuh ni, tami kahawihoehnaw e catounnaw ni mitnoutnae na hei aw h nah, profet Jonah laipateh alouke bang buet touh boehai kamnuek sak mahoe h. <sup>40</sup> Jonah teh tanga von daw k hnin thum touh ao patetlah tami Capa teh talai thungvah hnin thum touh ao van han. <sup>41</sup> Lawkcengnae hnin navah, Nineveh kho e taminaw teh hete miphunnaw e a vang lah thaw aw h vaiteh ahnimanaw a sung sak aw h han. Bangkongtetpawiteh, ahnimouh teh Jawnah ni a pâpho e lawk kecu daw k pan a kângai aw h. Hie hmuen koe Jawnah hlak hoe kalen e teh ao. <sup>42</sup> Lawkcengnae hnin navah, akalah e siangpahrangnu teh hete miphunnaw e avanglah thaw vaiteh ahnimanaw hah a sung sak han. Bangkongtetpawiteh, hote siangpahrangnu teh Solomon siangpahrang e

lungangnae lawk hah thai hanelah talai poutnae koehoi a tho toe. Khenhaw! hie hmuen koevah Solomon hlak ka talue e teh ao.

*Kahrai kathout bout a ban*

<sup>43</sup> Kakhine muitha teh tami thung hoi a tâco teh duem ao nahane hmuen hah yuengyoe a tawng. <sup>44</sup> A hmu hoeh toteh ka tâconae, ouk ka onae im koe lah bout ka ban han ati teh bout a tho navah hote im teh sut ka houg e lah ao tie a hmu. <sup>45</sup> Hahoi, ama hlak hoe kathoute alouke sari touh a kaw teh, hote tami thungvah bout a kâen awh teh ao awh. Hote tami teh ahmaloe e hlak a mathoe. Kathout e hete miphunnaw koevah hot patetlah ao van han telah a dei pouh.

*Jisuh e manu hoi hmaunawngna naw*

*Mrk 3:31-35; Luk 8:19-22*

<sup>46</sup> Hottelah taminaw koevah a pâpho lahun nah a manu hoi a nawngnanaw ni pato han a ngai awh dawkvah alawilah sut a kangdue awh. <sup>47</sup> Tami buet touh ni na manu hoi na nawngnanaw ni na pato hane a ngai awh dawkvah alawilah sut a kangdue telah a dei pouh. <sup>48</sup> Ka manu ka nawngnanaw teh api nama telah a pacei. <sup>49</sup> A hnukkâbangnaw koe lah a kut a dâw teh, hetnaw teh ka manu, ka nawngnanaw doeh. <sup>50</sup> Kalvan kho kaawm, a Pa e ngainae ka sak e pueng teh ka nawngna, ka tawncanu, ka manu lah doeh ao, telah atipouh.

## 13

*Cati kaheikung bangnuenae*

*Mrk 4:1-12; Luk 8:4-10*

<sup>1</sup> Hot hnin vah Jisuh imthung hoi a tâco teh talí teng vah a tahung navah, <sup>2</sup> moikapap e taminaw ni a kalup awh teh a kamkhueng awh. Long thung a kâen teh a tahung. Rangpuinaw teh a kawngteng lah a kangdue awh. <sup>3</sup> Hatnavah, bangnuenae lawknaw hah a dei pouh e teh, thai awh haw, cati kahei e tami ni cati kahei hanelah a tâco. <sup>4</sup> Cati teh a hei navah, a tangawn teh lam teng lah a bo. Lam teng a bo dawkvah tavanaw ni a tho awh teh a pâtu awh. <sup>5</sup> A tangawn teh talai a rapamnae koe lungcarawk um vah a bo. Hawvah ka bawt e cati teh tang a paw eiteh, a khawngyang a pabo hoeh dawkvah, <sup>6</sup> Kanî a tâco toteh khumbei ni a daw dawkvah, ketkamyai teh rawknae koe a pha. <sup>7</sup> A tangawn teh pâkhing um vah a bo. Hawvah ka bawt e cati teh a paw ei pâkhing ni a katek teh a rawk awh. <sup>8</sup> A tangawn teh kahawi e talai dawk a bo. Hawvah ka bawt e cati teh a let 30, 60, 100 totouh a paw teh a pung awh. <sup>9</sup> Thai nahan hnâ ka tawn e pueng ni thai na seh, atipouh.

### *Bangnuenae akungtuen*

<sup>10</sup> A hnukkâbangnaw ni a hnai awh teh, bangkongmaw hetnaw koevah bangnuenae la-hoi na dei pouh telah a pacei awh. <sup>11</sup> Jisuh ni, nangmouh teh kalvan uknaeram hrolawknaw hah panuethainae kâ na tawn awh. Hatei, ahnimanaw teh, tawn awh hoeh. <sup>12</sup> Apipatet haiyah ka tawn e tami teh kapap a tawn nahanlah bout poe sin han. Apipatet haiyah ka mathoe e teh a tawn e ca patenghai lawp lah ao han. <sup>13</sup> Ahnimouh teh a hmu awh nahlangva

nout awh hoeh. A thai a nahlangva panuek awh hoeh. Hatdawkvah bangnue nae hoi ka cangkhai. <sup>14</sup> Isaiah ni, nangmouh teh na thai awh nahlangva vah thai panuek laipalah na thai awh. Na hmu awh nahlangva vah nout laipalah na hmu awh. <sup>15</sup> Hete miphunnaw niyah mit hmawt thai awh hoeh, hnâthai thai awh hoeh, a lungthin hoi panuek awh hoeh, a hringnae kâthung awh hoeh, a patawnae dam sak hoeh hane totouh a lungthin a hmo teh, a hnâpang awh teh, a mit a tabuem awh, telah sutdeilawk, hete miphunnaw koe a kuep. <sup>16</sup> Nangmouh teh na mit ni a hmu teh na hnâ ni hai a thai dawkvah yawhawi lah na o awh. <sup>17</sup> Atangcalah na dei pouh awh. Nangmouh ni na hmu awh e hah profetnaw hoi tami kalannaw ni hmu hane a ngai a ei hmawt awh hoeh. Na thai awh e hah thai hane a ngai a ei thai awh hoeh.

*Cati kahei e deicainae*

<sup>18</sup> Cati kaheikung bangnue nae dei ngainae teh, thai a haw. <sup>19</sup> Lam teng dawk ka bawt e cati tingainae teh, uknaeram lawk hah sut a thai ei, a thai panuek hoeh dawkvah, kahrai ni a lung dawk hei lah kaawm e cati hah yout a la pouh tingainae doeh. <sup>20</sup> Lungcarawk um ka bawt e cati tingainae teh, kamthang kahawi hah a thai navah, lunghawinae lung hoi tang a dâw eiteh, <sup>21</sup> a lungthin dawk a khawngyang a payang hoeh dawkvah, dawngdengca dueng doeh ao. Lawk kamthang kecu dawk rektapnae a khang toteh, hnuklah tang a kâhnawn tingainae doeh. <sup>22</sup> Pâkhing um ka bawt e cati tingainae teh, Lawk kamthang hah a thai eiteh, talaivan hnopai

dawk lungpuennae hoi hnopai tawntanae ni a dumyen teh, hote hno ni kamthang lawk hah a katek dawkvah, a paw paw thai hoeh tingainae doeh. <sup>23</sup> Talai kahawi dawk ka bawt e cati tingainae teh, kamthang kahawi hah a thai teh, a thai panuek dawkvah alet 30, 60, 100 totouh a pungdaw tingainae doeh atipouh.

### *Cang hoi pho mu bangnuenae*

<sup>24</sup> Alouke bangnuenae bout a dei pouh e teh, kalvan uknaeram teh, a law dawk cati kahei e hoi a kâvan. <sup>25</sup> Taminaw a i awh lahun nah taran hah a tho teh, cang hoi kâvan e pho mu hah cang um vah mak a hei sin teh yout a ceitakhai . <sup>26</sup> Cang teh a pâw, a roun, a vui a tâco toteh, phokungnaw hai a kamnue van. <sup>27</sup> Hattoteh a sannaw ni imkung koe a cei awh teh, Bawipa, cati kahawi dueng nahoehmaw na law dawk na kahei vaw, phokungnaw teh nâ e na maw. atipouh awh navah, <sup>28</sup> hethateh taran ni a sak e doeh atipouh. Hat pawiteh, ka cei a vaiteh phokungnaw hah koun, phawk sak hanelah na ngainae ao maw, telah atipouh awh navah, <sup>29</sup> Imkung ni, hottelah ka ngainae awm hoeh. Phokungnaw hah na phawng awh pawiteh, cangkungnaw haiyah mek na phawng a payon vai ti puennae ao. <sup>30</sup> Canga tue totouh teh, reirei roun na yawkaw seh. Canga tue a pha toteh, phokungnaw hah hmaloe phawk vaiteh hmai phum hanlah tangoung awh. Cakang hateh capai dawk cui awh telah ka a e naw hah ka ti pouh han telah imkung ni atipouh.

*Antam mu hoi Ton bangnueanae*  
*Mrk 4:30-32; Luk 13:18-21.*

<sup>31</sup> Alouke bangnueanae lawk a dei pouh e teh, kalvan uknaeram teh law dawk patûe e antam mu hoi a kâvan. <sup>32</sup> Antam mu teh a mu pueng hlak vah a thoung eiteh, a rounng toteh phokung pueng hlak a len dawkvah, kahlun kamlang tavanaw ni a tho awh teh a kangnaw dawk a kamcout, a kâhat thai nahan totouh e a kung lah ao telah atipouh. <sup>33</sup> Alouke bangnueanae lawk a dei pouh e teh kalvan uknaeram teh ton hoi a kâvan. Napui ni ton a la teh tavai tangthung kathum touh dawk a thum dawkvah tahawn kaawm e pueng hah a po sak atipouh. <sup>34</sup> Jisuh ni hete bangnueanae lahoi yah, rangpuinaw hah a dei pouh. Bangnueanae laipalah dei pouh hoeh. <sup>35</sup> Hot patet e lahoi yah, profet e lawk tie hateh, ka pahni ka ang vaiteh bangnueanae hah ka dei han. Talaivan pek a kamtawng hoiyah hro lah kaawm e naw hah ka pâpho han telah sut a dei e lawk hah kuepnae koe a pha.

*Cati hoi phokung bangnueanae*

<sup>36</sup> Hathnukkhu Jisuh ni tami kamkhuengnaw hah a ceisak teh, imthung a kâen hnukkhu, a hnukkâbangnaw ni a hnai aw hah teh, law dawk hei e kahrawng e pho mu hah bang tingainae maw kacaicalah na dei pouh haw atipouh. <sup>37</sup> Jisuh ni, cati kahawi kahei e teh tami Capa doeh. <sup>38</sup> Law hateh het talaivan doeh. Kahawi e cati teh uknaeram capanaw doeh. Kahrawng e pho mu teh kahrai capanaw doeh. <sup>39</sup> Kahrawng e pho mu ka hei e taran hateh Kahraimathout

doeh. Canga tue teh het talaivan poutnae doeh. Cang ka a e naw teh kalvantaminaw doeh.

<sup>40</sup> Kahrawng phokungnaw hah phawk vaiteh hmai phum e patetlah het talai apout navah kaawm han. <sup>41</sup> Tami Capa ni ama e kalvantami a patoun vaiteh, ka payon sak e naw hoi kahawihoehe hno ka sak e pueng hah A uknaeram thung hoi rawi vaiteh, <sup>42</sup> khuikanae, hâ katanae onae koe hmai dawk a pabo aw h han. <sup>43</sup> Hatnavah tami kalannaw teh kanî patetlah amae na Pa e uknaeram dawk a ang aw h han. Thai nahan hnâ ka tawn e pueng ni teh thai naseh.

*Hro e hnopai hoi aphu kaawm poung pale bangnuenae*

<sup>44</sup> Kalvan uknaeram teh law dawk hro e hno hoi a kâvan. Hote hno hah kahmawt e ni teh bout a ramuk teh, lunghawi laihoi a ban teh a tawn e pueng hah a yo hnukkhu hote law hah a ran. <sup>45</sup> Hahoi, kalvan uknaeram teh aphu kaawm poung e Pale ka tawng e hno kayawtkung hoi a kâvan. <sup>46</sup> Hote hno kayawtkung ni aphu kaawm poung e Pale hah a hmu toteh, a cei teh a tawn e pueng hah a yo hnukkhu hote Pale hah a ran.

*Tamlawk bangnuenae*

<sup>47</sup> Hahoi, kalvan uknaeram teh talî dawk heng nah aphunphun e tanganaw ka ramuk e tamlawk hoi a kâvan. <sup>48</sup> Tanga moi a kaman toteh a kongteng lah a sawn teh, a tahungkhai aw h. Kahawi e tanganaw hah a rawi aw h teh sikrei dawk a pâseng aw h. Kahawi hoeh e tanganaw teh a tâkhawng aw h. <sup>49</sup> Hot patetlah talai a pout navah kalvantaminaw ni kum

awh vaiteh, tami kalannaw um hoi tamikayon-naw teh rawi ka pek vaiteh, <sup>50</sup> khuikanae, hâ katanae onae koe hmai dawk a pabo aw h han. <sup>51</sup> Hete hnonaw pueng hah na thai panuek a ou. telah a pacei toteh, ka thaipanuek aw h toe Bawipa telah a hnukkâbangnaw ni atipouh aw h. <sup>52</sup> Hatdawkvah, kalvan uknaeram kong ka cang tangcung e kâlawk kacangkhaikungnaw, a hnukkâbang lah kaawm e tami teh, amae hno aphunphun e, a katha hoi a karuem e naw hah peng ka rasat e imkung hoi a kâvan atipouh.

*Profet ouphoehnae*

<sup>53</sup> Hote bangnue nae lawknaw hah koug a dei pouh hnukkhu hote hmuen hah a ceitakhai . <sup>54</sup> Hathnukkhu amae kothung a pha teh sinakoknaw dawkvah a cangkhai, kothung e taminaw teh a kângairu aw h dawkvah, hete tami ni hete lungangnae hoi hete thaonae heh nâ e ne a tawn. <sup>55</sup> Ahni teh lettama e capa nahoe hmaw. A manu teh Meri nahoe hmaw. A nawng ha teh Jem, Joseph, Simon, Judah tie naw nahoe hmaw. <sup>56</sup> A tawncanunaw haiyah maimouh hoi kahnai lah aw m aw h hoe h maw. Hat pawiteh hete tami ni hete hnonaw hah na e maw a hmu telah ati aw h. <sup>57</sup> A lungpout aw h. Jisuh ni profetnaw teh ama kho, amae ram alaw-ilah doeh barinae ao telah atipouh. <sup>58</sup> Kothung e naw ni a yuem aw h hoe h dawkvah, hote hmuen koe thaonae moikapap sak hoe h.

*Baptisma Jawhan duenae**Mrk 6:14*

<sup>1</sup> Hatnavah, Herod bawi ni Jisuh e kamthang hah a thai navah, <sup>2</sup> het hateh Baptisma kapoekung Jawhan doeh. Duenae koehoi a thaw toe. Hatdawkvah kângairu hnonaw hah a sak thai telah a kut rahim e naw koe a dei pouh. <sup>3</sup> Herod ni amae a nawnggha, Filip e a yu Herodias dawkvah Jawhan hah a man a katek teh thongim vah a paung. <sup>4</sup> Jawhan ni Herod koe hote napui na la e heh thoung hoeh telah Herod hah atipouh dawkvah, <sup>5</sup> Jawhan hah thei han a ngai ei rangpuinaw a taki dawkvah thet ngam hoeh. Rangpuinaw ni Jawhan hah profet buet touh lah a pouk awh,

<sup>6</sup> Herod a khenae hnin a pha teh paw i a sak navah Herodias e canu teh paw i thung a lam dawkvah, Herod lung ahaw i sak. <sup>7</sup> Na hei e pueng na poe han telah thoekâbonae hoi lawk a kam. <sup>8</sup> A manu ni a uen e patetlah Baptisma kapoekung Jawhan e a lû hah hete tongben dawk na poe telah a hei. <sup>9</sup> Siangpahrang teh a lungmathoe ei lawk yo a kam toung dawkvah a huikonaw e minhmai hah a khet teh, poe hanelah kâ a poe. <sup>10</sup> Hatdawkvah, tami a patoun teh, Jawhan e lahuen hah thongim thungvah a tâtueng sak. <sup>11</sup> A lû hah tongben dawk hoi napui ca a poe awh teh napui ca ni a manu koe a sin. <sup>12</sup> Jawhan e a hnukkâbangnaw a tho awh teh a ro hah a sin awh. A pakawp awh hnukkhu, Jisuh koe a cei awh teh a dei pouh awh.

*Tami 5000 touh rawca a paca*

*Mrk 6:32-44; Luk 9:10-17; Jhn 6:1-13*

<sup>13</sup> Jisuh ni a thai nah hote hmuen hah long hoi a ceitakhai teh kingdinae koe vah a cei. Taminaw ni a thai awh dawkvah kho thung hoi a tâco awh teh khok hoi a kâbang awh. <sup>14</sup> Jisuh ni a cei navah, taminaw a hmu nah a pahren dawkvah kapatawnaw pueng a dam sak.

<sup>15</sup> Tangmin vah a hnukkâbangnaw ni a hnai awh teh, hiteh thingyeiyawn doeh. Kho hai a hmo toe. Rangpuinaw teh canei ran hanlah khonaw dawc cetsak lawi atipouh awh. navah, <sup>16</sup> Jisuh ni ahnimouh a cei ngai hoeh. A ca awh hanelah poe awh, atipouh. <sup>17</sup> Ahnukkâbangnaw ni vaiyei panga touh hoi tanga kahni touh hoe laipateh kaimouh koe alouke rawca awmhoeh bout ati. Hahoi, Jisuh ni vaiyei hoi tanga hah hi sin awh haw atipouh. <sup>18</sup> Hattoteh rangpuinaw hah tahung hanlah kâ a poe. <sup>19</sup> Tamimaya hah pho van tahung hanelah kâ a poe. Vaiyei panga touh hoi tanga kahni touh hah a sin teh kalvan lah mounng laihoi, lunghawi lawk a dei hnukkhu, vaiyei hoi tanga hah a raen teh a hnukkâbangnaw hah a poe. <sup>20</sup> A hnukkâbangnaw ni hai rangpuinaw hah patuen a poe awh. Rangpuinaw ni kaboumlah a ca awh hnukkhu, ka cawi e a rakhun awh teh tangthung hlaikahni touh akawi. <sup>21</sup> Ka cat e abuemlah napui hoi camo dei laipalah tongpa dueng 5,000 touh hane a pha awh.

*Jisuh tui van lam a cei*

*Mrk 6:45-51; Jhn 6:15-21*

<sup>22</sup> Jisuh ni kamkhueng e taminaw hah a ban sak lahun navah, a hnukkâbangnaw hah long a kâcui sak teh namran lah hmaloe a patoun. <sup>23</sup> Kamkhueng e naw be a ceisak hnukkhu ratoum hanlah, mon lah soumtinae koe a luen teh, tangmin vah amadueng ao. <sup>24</sup> Long teh tui lungui vah kahlî ni khak a ngang dawkvah tuicipa ni a hem awh.

<sup>25</sup> Tangmin suimilam pali nah Jisuh teh ahni-mouh koe tui van vah a cei. <sup>26</sup> Hottelah tui van a cei teh a tho e hah a hmu awh navah, kahrai doeh titeh taki hoi a hramki awh. <sup>27</sup> Jisuh ni na lungpuen awh hanh. Kai doeh taket awh hanh atipouh. <sup>28</sup> Piter ni Bawipa, nang boipawiteh, tui van hoi nang koe ka tho nahanlah kâ na poe haw atipouh. <sup>29</sup> Hattoteh hi tho atipouh. Piter ni long van hoi a kum teh Jisuh koe pha hanelah tui van vah a cei. <sup>30</sup> Kahlî a tang e hah a hmu navah a taki teh tui thung lah a bo dawkvah Bawipa na rungngang haw telah a hram.

<sup>31</sup> Jisuh ni a kut a dâw teh Piter hah a kueth. Yuemnae kayoun e tami bangkongmaw oupvoutnae na tawn atipouh. <sup>32</sup> Long van a pha roi toteh kahlî a roum. <sup>33</sup> Long thung kaawmnaw ni a hnai awh teh, nang teh Cathut Capa tanggak doeh ati awh teh a bawk awh.

<sup>34</sup> Namran lah a ceiawh teh Gennesaret ram dawka pha awh. <sup>35</sup> Hot hmuen dawka e kaawm e naw ni a nout awh navah, a teng kaawm e hmuen pueng koe, tami a patoun awh dawkvah, ka pataw e pueng hah a thokhai awh. <sup>36</sup> A kâkhu e hni pawih hah, tek thai nahanlah a kâhei awh. Katek e pueng haiyah damnae a coe awh.

# 15

## *Mintoenaw e cangkainae*

### *Mrk 7:1-23*

<sup>1</sup> Hatnavah, Jerusalem e Farasinaw hoi cakathutkungnaw teh Jisuh koe a tho awh. <sup>2</sup> Ayan e kacuenaw e phung hah bangkongmaw na hnukkâbangnaw ni a tapoe awh. Ahnimouh ni kut kamsin laipalah bu a ca awh, telah atipouh awh navah, <sup>3</sup> Nangmouh ni ayan e phung hah kâuep laihoi bangkongmaw Cathut e kâpoelawk hah na tapoe van awh. <sup>4</sup> Cathut e kâpoelawk teh na manu hoi na pa bari awh. Apihai manu hoi na pa hawihoehnae ka dei e teh due totouh thei lah awmseh telah a ti. <sup>5</sup> Hatei, nangmouh ni na cangkhai awh e teh apipatet ni hai a manu na ou, a na pa na ou a poe hane hno hah, het hateh Cathut koe ka poe e doeh toe tet pawiteh, <sup>6</sup> a manu nakunghai, a na pa nakunghai bari ngai hoeh toe na ti awh. Hottelah patuen patuen na tawm awh e phung hoiyah Cathut e kâpoelawk na eknae doeh. <sup>7</sup> A lai kathout e taminaw, Isaiah ni nangmouh noe lahoi, <sup>8</sup> hete miphunnaw teh apâhni hoi na hnai awh teh apâhni hoi na bari a ei a lungthin teh kai hoi ahla. <sup>9</sup> Tami e kâpoelawk hoiyah a kâpâtu awh teh, ayawmyin lah na bawk awh toe telah sut a dei e hah a tang tanggak atipouh.

## *Khinnae*

<sup>10</sup> Hattoteh ka kamkhuengnaw hah ama koe a kaw teh, thai awh nateh panuek awh haw. <sup>11</sup> Thung lah ka kâen e ni tami heh khin sak hoeh.

Thung lahoi ka tâcawt e hno ni doeh na khin sak awh, atipouh.

<sup>12</sup> A hnukkâbangnaw ni a hnai awh teh atu na dei e lawk heh Farasinaw ni a thai awh navah a lung apout awh tie na panue maw atipouh awh. <sup>13</sup> Jisuh ni kalvanlae Apa ni a patûe hoeh e a kung kaawm e pueng hah ka phawk han. <sup>14</sup> La awm awh nah yawkaw seh. Ahnimouh teh mitdawnnaw kahrawikung mitdawnnaw doeh. A mit ka dawn reira kâhrawi pawiteh kahni touh hoi tangkom dawk ka bawt roi han doeh atipouh. <sup>15</sup> Piter ni Cathut e bangnuenae hah kaimouh koevah pâpho haw atipouh navah, <sup>16</sup> Jisuh ni nangmouh teh atu sittouh lungang laipalah maw na o a rah. <sup>17</sup> Thung lah kâen e pueng teh von dawk ka cet ni teh alawilah a tâcawt tie heh na panuek awh hoeh rah maw. <sup>18</sup> Thung lahoi ka tâcawt e hno teh lung dawk hoi ka tâcawt e a tho dawkvah tami hah kakhin sak e hno doeh. <sup>19</sup> Kahawi hoeh e pouknae, tami theinae, kamsoumhoeh napui tongpa yonnae, napui kahlout hoi yonnae, ayâ e hno parunae, kamsoumhoeh kapanuekkhaikung lah kangduenae, ayâ minhmai mathoe saknae teh lungthung hoi a tâco dawkvah, <sup>20</sup> Tami kakhin sak e hnonaw doeh. Kamsin laipalah rawca canae ni tami khinsak hoeh atipouh.

*Kanaan napui e yuemnae*

*Mrk 7:24-30*

<sup>21</sup> Hathnukkhu Jisuh teh hote hmuen koehoi a kamthaw teh, Taire hoi Sidon kholah a cei. <sup>22</sup> Kanaan napui buet touh teh a tâco teh, Devit Capa kai hah na pahren haw. Ka canu teh kahrai

ni puenghoi a rek atipouh eiteh kam touh hai pathung hoeh.

<sup>23</sup> A hnukkâbangnaw ni a hrawi awh teh, hote napui bout ban sak leih. Maimouh hnuk a kâbang teh a hram atipouh awh. <sup>24</sup> Jisuh ni Isarel miphun kahmat e tunaw hloilah alouke miphunnaw onae koe kai hah na patoun hoeh atipouh. <sup>25</sup> Hote napui ni tabo laihoi Bawipa na rungngang ei bout atipouh. <sup>26</sup> Hat toteh, Bawipa ni capa e rawca hah ui poe phung nahoeht bout atipouh. <sup>27</sup> Napui ni hai oe, Bawipa, uinaw tie teh kabawt e burameinaw hah ouk a luep phung nahoehmaw bout atipouh toteh, <sup>28</sup> Oe! napui nang teh na yuemnae a len tangngak. Na ngainae patetlah nang dawkwah awh atipouh navah, a canu teh hmawi a dam.

*Tami moikapap dam saknae*

<sup>29</sup> Jisuh ni hote hmuen koehoi a cei teh, Galilee tui koe a pha toteh, monsom a luen teh a tahung. <sup>30</sup> Tami moikapap ni khokkhem, mitdawn, lawka, kamkhuen e hoi alouke patawnae ka tawn e naw hah a thokhai awh teh a khok koevah a ta awh. <sup>31</sup> A patawnae pueng hah a dam sak dawkwah, lawkanaw ni lawk a dei thai, kamkhuennaw ni a dam awh, khokkhemnaw ni lam a cei awh, mitdawnnaw ni a hmu awh e hah ka kamkhuengnaw ni a hmu awh navah Isarelnaw e Cathut hah a pholen awh.

*Tami 4,000 touh rawca a pacanae*

*Mrk 7:31-37*

<sup>32</sup> Hattoteh Jisuh ni a hnukkâbangnaw hah a kaw teh, hete taminaw hah ka pahren poung.

Hnin thum touh thung canei tawn laipalah kai koe ao awh toe. Lam vah tawn a langvaih, ka ti dawkvah, rawca cat laipalah ceisak hane ka ngainae awm hoeh atipouh. <sup>33</sup> A hnukkâbangnaw ni, het yit touh e tami kapap e naw ni kaboumlah a ca awh hane rawca hah hi kahrawngum vah kaimouh ni bangtelamaw ka hmu thai awh han atipouh awh. <sup>34</sup> Jisuh ni nangmouh koe vaiyei na yit touh maw kaawm atipouh. Ahnimouh ni vaiyei sari touh hoi tanga youn touh ao bout atipouh awh.

<sup>35</sup> Hattoteh tami kamkhuengnaw hah talai dawk tahung sak hanelah kê a poe. <sup>36</sup> Vaiyei sari touh hoi tanganaw hah a la teh lunghawinae lawk a dei hnukkhu, vaiyei hoi tanga hah a raen teh a hnukkâbangnaw hah patuen a poe. <sup>37</sup> Rangpui ni a boum awh toteh, ka cawi e hah a racawng awh navah tangthung sari touh akawi. <sup>38</sup> Ka cat e naw abuemlah napuinaw hoi camonaw e dei laipalah 4,000 touh a pha. <sup>39</sup> Hote taminaw hah a ceisak hnukkhu Magadan kho lah long hoi a cei.

## 16

### *Kângairu mitnout a hei awh*

#### *Mrk 8:11-21*

<sup>1</sup> Farasinaw hoi Sadusinaw a tho awh teh kalvan hoi e mitnout kamnue sak hanlah a kêhei awh teh Bawipa hah a tanouk awh. <sup>2</sup> Bawipa ni ouk na dei awh e teh tangmin lah tâmai a rapam teh a paling navah kho kahawi han na ti awh. <sup>3</sup> Amom lah toteh tâmai akawi, bout a paling dawkvah kahlî ka tho han na ti

awh. A laikathoutnaw nangmouh ni teh kalvan minhmai hah na kapek panuek awa. A tu e mitnoutnaw hatteh na kapek panuek awa hoeh. <sup>4</sup> Tami kahawilah kâsak e catounnaw, noutnae na hei awa navah profet Jonah e mitnoutnae hloilah alouke noutnae bangpatet e haiyah na sak pouh awa mahoeh atipouh teh, ahnimouh onae koehoi alouklah a cei.

*Farasi hoi Sadusinaw e ton*

<sup>5</sup> Namran lah a cei awa toteh a hnukkâbangnaw ni vaiyei sin hane hah yout a pahnim awa. <sup>6</sup> Jisuh ni Farasinaw hoi Saddusinaw e ton hah kâhruetcuete nateh roun awa, atipouh. <sup>7</sup> Maimouh ni vaiyei sin awa hoeh dawkvah hete lawk heh a dei telah a hnukkâbangnaw ni buet touh hoi buet touh a kâpankhai awa.

<sup>8</sup> Jisuh ni a panue dawkvah, yuemnae dawka tha kayoun e naw, vaiyei na sin awa hoeh e dawkvah na kâpankhai a vaw. <sup>9</sup> Vaiyei panga touh hah, tami 5,000 touh ni a ca awa teh tangthung nâyittouh maw kacawi, vaiyei sari touh hah tami 4,000 touh ni a ca teh, tangthung nâyittouh maw kacawi tie hah, <sup>10</sup> na pâkuem, na pouk awa laipalah, maw na o awa rah. <sup>11</sup> Farasinaw hoi Saddusinaw e ton hah kâhruetcuete awa, ka ti navah vaiyei heh ka dei ngai e nahoeh tie hah na thai panuek a laipalah bangtelamaw khuete na o a vaw atipouh. <sup>12</sup> Hat toreiteh ton e vaiyei hah roun awa tie nahoeh. Farasinaw hoi Sadusinaw e cangkhae hah roun awa, tinae doeh telah a hnukkâbangnaw ni a thai panuek awa.

*Jisuh teh Khrih doeh telah Piter ni a kam-pangkhai*

*Mrk 8:27-29; Luk 9:18-20*

<sup>13</sup> Kaisarea Filippi ram e kho buet touh dawk a pha aw h toteh, Jisuh ni Kai heh taminaw ni api na ti a maw telah a hnukkâbangnaw hah a pacei. <sup>14</sup> Tami tangawn ni Baptisma Jawhan; a tangawn ni Elijah; a tangawn ni Jeremiah, hoehpawitech alouke profet buet buet touh doeh telah atipouh aw h. <sup>15</sup> Nangmouh ni hai Kai hah api na ti a maw telah a pacei. <sup>16</sup> Simon Piter ni nang teh kahring e Cathut Capa, Khrih doeh atipouh. <sup>17</sup> Hatnavah Jisuh ni Simon Barjonah, nang teh na yawhawi. Bangkongtetpawitech hete hno teh thi hoi tak ni nang koe a pâpho e nahoe h, kalvan kho kaawm e a Pa ni a pâpho pouh e doeh. <sup>18</sup> Nang koevah ka dei, nang teh Piter doeh. Hete lungsong dawkvah Kaie kawhmoun ka kangdue sak han. Hot teh duenae longkha ni hai tâ thai mahoe h. <sup>19</sup> Kalvan uknaeram cabinaw teh nang koevah na poe han. Talai van na katek e pueng teh kalvan hai katek lah ao han. Talai van rathap lah kaawm e naw pueng teh kalvan hai rathap lah ao han, telah atipouh. <sup>20</sup> Hahoi, Bawipa ni Kai teh Khrih doeh tie hah api koehai dei hoe h nahanelah a hnukkâbangnaw kâ a poe.

*A due hnukkhu bout thaw nahane kong, sut deinae*

*Mrk 8:31—9:1; Luk 9:22-27*

<sup>21</sup> Hahoi, Jisuh ni Jerusalem ka cei vaitech kacuenaw, vaihma bawinaw hoi cakathutkung-naw e kut daw k rektapnae moi a khang hnukkhu

a thei awh vaiteh apâthum hnin vah bout a thaw nahane kong hah a hnukkâbangnaw koe a dei pouh. <sup>22</sup> Hatnavah Piter ni Bawipa yue hanelah aloukcalah a kaw teh, nang dawk bawt nahan seh atipouh. <sup>23</sup> Hahoi, Bawipa ni a kamlang sin teh Piter koe, nang Setan ka hnuk lah kâhnawnh. Nang teh kai hanlah payonnae lah na o atipouh. Bangkongtetpawiteh nang ni Cathut hoi ka kâkuen e hno dawk na lungthin pen laipalah tami hoi kâkuen e hno dawk lung na pen.

*Nama e thingpalam hrawm*

<sup>24</sup> Hattoteh Jisuh ni a hnukkâbangnaw koe apihai ka hnukkâbang han ka ngai e teh amahoima kâpahnavt vaiteh, amae thingpalam hrawm hoi ka hnuk kâbang naseh. <sup>25</sup> Bangkongtetpawiteh apihai amae hringnae ka rungngang e teh hringnae a sung han. Kai kecu dawk hringnae ka sung e teh hringnae a hmu han. <sup>26</sup> Tami ni talaivan abuemlah koung ka coe nakunghai muitha hringnae sung pawiteh bangmaw apu kaawm. A hringnae hah bang hno hoi maw a ratang thai han. <sup>27</sup> Tami Capa teh Apa e bawilenna hoi kalvantaminaw hoi a tho han. Hattoteh tami pueng ni a tawk e phu a hmu awh han. <sup>28</sup> Atangcalah na dei pouh awh. Tami Capa amae uknaeram dawk a kum toteh hi kangdout e tami tangawn duenae kâhmo mahoe rah, atipouh.

*Jisuh mei kâthungnae**Mrk 9:2-13; Luk 9:28-36*

<sup>1</sup> Jisuh ni Piter, Jem, Jem e nawngha Jawhan tinaw hah, hnin taruk a poung hnukkhu a kaw teh ka rasang e mon dawk soumtinae koe a ceikhai. <sup>2</sup> Ahnimae hmalah a mei a kâthung pouh. A minhmai teh kanî patetlah a ang teh, a khohna e teh raeng patetlah a pangaw. <sup>3</sup> Mosi hoi Elijah hai a kamnue teh Bawipa hoi lawk a kapan awh. <sup>4</sup> Hatnavah Piter ni Bawipa hete hmuen koe o a nep. Nang hanlah buet touh, Mosi hanlah buet touh, Elijah hanlah buet touh rim kathum touh hah na ngainae awm pawitech kaimouh ni ka sak awh han atipouh. <sup>5</sup> Hottelah a dei lahun nah ka ang e tâmai ni a ramuk awh teh, het hateh ka pahren e Capa doeh, ahni dawak ka lungkuep tangngak. Ahnie lawk hah tarawi pouh awh, telah tâmai thung hoi lawk a tho.

<sup>6</sup> A hnukkâbangnaw ni a thai awh navah a taki awh teh a tabo awh. <sup>7</sup> Jisuh ni a tho teh ahnimanaw hah kut hoi a tek teh, thaw awh, taket awh hanh telah atipouh. <sup>8</sup> Ahnimouh ni a mounng awh teh a khet awh navah, Jisuh hloilah apihai hmawt awh hoeh. <sup>9</sup> Monsom hoi a kum a torei teh Jisuh ni tami Capa teh duenae koehoi a thaw hoehroukrak, atu na hmu awh e hno hah api koehai dei awh hanh telah a hnukkâbangnaw hah a kê a poe. <sup>10</sup> Hattoteh a hnukkâbangnaw ni Elijah hmaloe a tho han telah bangkongmaw cakathutkungnaw ni ati awh, telah a pacei awh. <sup>11</sup> Jisuh ni Elijah teh hmaloe a tho vaitech bangpueng hah kahawicalah a pathoup han tangngak. <sup>12</sup> Ka dei e teh Elijah a

tho toe. Taminaw ni a panue aw hoh daw k a ngai aw h e pueng patetlah a tak daw k a sak aw h toe. Hot patetvanlah tami Capa haiyah hote taminaw kut daw k a khang han atipouh. <sup>13</sup> Baptisma kapoekung Jawhan doeh a dei ngai nah tie hah a hnukkâbangnaw ni a thai panuek aw h.

*Khek ka man e tami a dam sak  
Mrk 9:14-28; Luk 9:37-42*

<sup>14</sup> Tami ka kamkhuengnaw koe a pha aw h toteh tami buet touh ni rek a hnai teh, a khokcuengkhuem teh, <sup>15</sup> Bawipa ka capa hah pahren nateh rungngang haw. Khek a man teh puenghoi a patang toe. Hmai daw k, tui daw k voutsout a rawp toe. <sup>16</sup> Na hnukkâbangnaw koe ka thokhai ei toe, ahnimouh ni hawi sak thai aw h hoh atipouh.

<sup>17</sup> Jisuh ni yuemnae ka tawn hoh e naw, lung kalen e phun, nangmouh hoi cungtalah nâ totouh maw ka o han rah. Nangmouh hah nâ totouh maw na panguiep aw h han rah. Camo hah hi thokhai aw h, atipouh. <sup>18</sup> Jisuh ni kahrai hah a yue toteh, kahrai teh hote camo thung hoi a tâco. Camo teh hmawi a dam. <sup>19</sup> Hattoteh a hnukkâbangnaw ni soumtinae koe, Jisuh a hnai aw h teh, kaimouh ni teh hote kahrai hah bangkongmaw ka pâlei thai aw h hoh vaw atipouh aw h. <sup>20</sup> Jisuh ni, nangmouh teh yuemnae na tawn aw h hoh daw kvah, na pâlei thai aw h hoh. Atangcalah na dei pouh aw h, nangmouh ni antam mu tittouh mah yuemnae na tawn aw h pawiteh, hote mon hah hmuen koehoi kâtakhoe na tetpawiteh, hmuen koehoi a kâtakhoe han.

Yuemnae na tawn awh pawiteh na tithai awh hoeh e awm mahoe. <sup>21</sup> Hatei, ratoumnae, rawcahainae laipalah hot patet e muithakathout tâcawt thai hoeh atipouh.

*Jisuh ni a due nahane kong bout a dei*

<sup>22</sup> Jisuh ni Galilee ram ao awh lahun nah, tami Capa teh taminaw e kut dawc pahdawt nahane tueng a hnai toe. <sup>23</sup> Ahnimouh ni a thei awh han. Apâthum hnin bout a thaw han telah a hnukkâbangnaw koe a dei pouh. Ahnimouh teh a lung puenghoi a mathoe awh.

*Bawkim tamuk cawngnae*

<sup>24</sup> Kapernuam kho dawc a pha toteh, bawkim dawc tamuk kacawngkungnaw Piter koe a tho awh teh, nangmae Bawipa ni cawng e tamuk poe hoeh maw atipouh awh. Hatnavah Piter ni a poe telah atipouh. <sup>25</sup> Piter ni imthung a kâen toteh, Jisuh ni Piter bangtelamaw na pouk. Talai bawinaw ni na maw tamuk a cawng awh. Ama e Capa koe maw a cawng. Ayâ koe maw a cawng telah a pacei. <sup>26</sup> Piter ni ayâ koe doeh a cawng atipouh navah, Jisuh ni hat pawiteh, Capa teh a hlout. Hatei, hotnaw ni maimouh kecu dawc a payon awh hoeh nahanlah talî koe cet nateh hradang hah sawn haw. <sup>27</sup> A pasuek na man e tanga hah lat nateh, a pahni baw pouh. Shekel tangka buet touh na hmu han. Hote tangka hah lat nateh kai hane hoi nama hane ahnimouh koe poe atipouh.

# 18

## *Apimaw ka talue poung*

*Mrk 9:33-37; Luk 9:40-48*

<sup>1</sup> Hatnavah a hnukkâbangnaw ni Jisuh koe a tho awh teh, kalvan uknaeram dawkvah apimaw kalenpoung han telah a pacei awh.

<sup>2</sup> Jisuh ni camo ca buet touh a kaw teh a hnukkâbangnaw rahak vah a ta. <sup>3</sup> Atangcalah na dei pouh awh. Nangmouh ni na kâthung awh teh camo patetlah na coung awh hoehpawiteh kalvan uknaeram daw k nâtuek hai na phat awh mahoe. <sup>4</sup> Hatdawkvah apipatet hai hete camo patetlah kârahnoum e teh kalvan uknaeram daw k kalenpoung lah ao han.

<sup>5</sup> Apipatethai ka min lahoi camo buetbuet touh ka dâw e teh, kai ka dâw e lah ao toe. <sup>6</sup> Kai na ka yuem e hete camo buetbuet touh hah ka yon sak e teh lahuen daw k talungsum awi laihoi kadung poung e talî daw k pabawt pawiteh ahni hanlah bet ahawi.

<sup>7</sup> Sak payonnae daw kvah talaivan taminaw teh a yawthoe awh. Sak payonnae kaawm han. Hatei, payonnae ka sak sak e teh a yawthoe. <sup>8</sup> Na kut khok ni na payon sak pawiteh kut khok hah tâtueng. Kut khok kuep laihoi ayungyoe hmai daw k a yungyoe na bo hlah teh kut khok kuep laipalah hringnae daw k na kâen pawiteh bet ahawi. <sup>9</sup> Na mit ni na payon sak pawiteh na mit hah cawngkhawih. Na mit kahni touh hoi hell hmai daw k na bo hlah teh mit vang dueng hoi hringnae daw k na kâen pawiteh bet ahawi.

*Tu kahmat bangnuenae*

*Luk 15:4-7*

<sup>10</sup> Nangmouh ni hete camo buetbuet touh hah na hnep awh hoeh nahanlah kâhruetcuets awh. Na dei pouh awh. Ahnimaes kalvantaminaw ni kalvan kho vah kaawm e Pa e minhmai hah pou a hmu awh toe. <sup>11</sup> Hothloilah, tami Capa teh kahmat e naw rungngang hanlah doeh a tho.

<sup>12</sup> Bangtelamaw na pouk awh. Tu 100 touh ka tawn e ni tu buet touh lam payon lah kahmat pawiteh, ahni ni tu 99 touh e hah mon vah cetakhai vaiteh, lam ka payon ni teh kahmat e tu buet touh hah tawng mahoe h na maw.

<sup>13</sup> Atangcalah na dei pouh awh. A hmu toteh lam ka payon hoeh ni teh kahmat hoeh e 99 touh hlakvah kahmat e buet touh daw k hoe a konawm. <sup>14</sup> Hot patetvanlah kalvan kho kaawm e nangmae na Pa ni hete camo buet touh boehai rawk sak hanlah a ngainae awm hoeh.

*Kawhmoun thung kâhruetcuets poenae*

<sup>15</sup> Na hmaunawngaha ni nang daw k a sakpayon e awm pawiteh cet sin nateh namamouh roi dueng a yonnae pâpho pouh nateh yue. Na lawk hah tarawi pawiteh na hmaunawngaha teh na hmu toe. <sup>16</sup> Na lawk hah tarawi hoehpawiteh tami kahni kathum touh kapanuekkhaikung lah kaw ei. Hahoi, kaawm e lawk pueng caksak awh. <sup>17</sup> Hotnaw e lawk hah tarawi hoehpawiteh kawhmoun koe dei pouh. Kawhmoun e lawk hah ngai hoehpawiteh Jentelnaw hoi tamuk kacawngnaw patetlah pouk awh.

<sup>18</sup> Atangcalah na dei pouh awh, talai van na katek awh e pueng teh kalvan kho hai katek lah ao han. Talai van rathap e pueng teh kalvan kho hai rathap lah ao han. <sup>19</sup> Bout ka dei e teh, talai van vah nangmouh thung dawk tami kahni touh ni lungkânging lahoi na ratoum awh pawiteh, na ratoum e pueng hah kalvan kho kaawm e a Pa ni na poe han. <sup>20</sup> Bangkongtetpawiteh, bangpatet e hmuen koehai ka min lahoi tami kahni kathum touh kamkhueng pawiteh ahnimae lungui kai ka o atipouh.

*Ngaithoum hoeh e san*

<sup>21</sup> Hatnavah Jisuh hah Piter ni rek a hnai teh, Bawipa hmaunawngaha ni kai dawk a sakpayon e hah avai na yit touh maw ka ngaithoum han telah a pacei teh, Jisuh ni vai sari touh na ngaithoum han ka tet hoeh. <sup>22</sup> Avai rui sari let sari totouh na ngaithoum han ka ti.

<sup>23</sup> Hatdawkvah kalvan uknaeram teh, amae sannaw hah tangka lai ka dei pouh e siang-pahrang buet touh hoi a kâvan. <sup>24</sup> Cayin koug to hoiyah tangka a thong cum touh laiba ka tawn e san buet touh hah a hmalah a thokhai awh. <sup>25</sup> Ahni ni laiba patho nahan a tawn hoeh dawkvah ama hoi a yucanaw a tawn e hnonaw pueng yawt nateh laiba patho naseh telah a bawi ni kâ a poe.

<sup>26</sup> Hote san ni a tabo teh Bawipa, na pahren ei, laiba kaawm e pueng hah na patho han atipouh navah, <sup>27</sup> A bawipa ni a pahren teh laiba kaawm e pueng hah a raphoe pouh teh a hlout sak. <sup>28</sup> Hote san teh a cei navah ama koe tangka 100 touh ka ba e san van hai a hmu

toteh, tangka na patho leih ti teh a lahuen dawk a kara pouh. <sup>29</sup> Hote san van ni hai a khok rahim a tabo pouh teh, kai hah na pahren ei, laiba kaawm e pueng hah na patho han doeh telah a kâhei ei nakunghai, <sup>30</sup> tha laipalah laiba a patho hoehroukrak thongim thung vah a paung. <sup>31</sup> Hottelah e hno hah alouke sannaw ni a hmu aw h navah, a lung puenghoi a pataw aw h teh, a sakyoe e pueng hah amamae bawipa koe a cei aw h teh a dei pouh aw h.

<sup>32</sup> Hat toteh, a bawipa ni hote san hah a kaw teh, Oe! san kathout, nang ni na kâhei dawkvah na laiba pueng hah ka raphoe teh na hlout sak. <sup>33</sup> Kai ni na pahren e patetlah nang ni na san hui hah, na pahren kaw i nahoehmaw atipouh. <sup>34</sup> A bawipa teh a lungkhuek dawkvah a laiba pueng koug a patho hoehroukrak rek-tapkungnaw kut dawk patang palai sak hanlah a poe. <sup>35</sup> Nangmouh haiyah hmaunawng ha reira hah lungthin katang hoi na ngaithoum aw h hoehpawiteh kalvanlae Apa ni hot patetvanlah nangmouh lathueng vah a sak van han.

## 19

### *Kâ kapeknae*

#### *Mrk 10:1-12*

<sup>1</sup> Jisuh ni, hete lawknaw be a dei hnukkhu, Galilee ram a ceitakhai teh Jordan tui namran, Judea ram lah a cei. <sup>2</sup> Taminaw ni a hnuk a kâbang aw h, hote hmuen koe kapatawnaw a dam sak.

<sup>3</sup> Farasinaw ni atengvah a tho aw h teh, sak payonnae pueng dawk hoi tami ni amae yu hah

ama kawi maw titeh a tanouk awh. <sup>4</sup> Bawipa ni apuengcue vah sak lah kaawm e teh tongpa hoi napui kahni touh dueng doeh sak lah kaawm. <sup>5</sup> Hote dawkvah tongpa ni a na pa hoi a manu a ceitakhai teh, a yu hoi a kâpahlawm dawkvah hote kahni touh roi teh buet touh lah ao han telah Cakathoung dawk a dei e hah na touk awh boihoeh maw. <sup>6</sup> Hatdawkvah yuvâ roi teh kahni touh nahoe, buet touh doeh. Cathut ni buet touh lah a pahlawm tangcoung e hno hateh tami ni kapek hanh naseh atipouh.

<sup>7</sup> Farasinaw ni hottelah pawiteh manae ca poe hoi ma hanlah bangkong Mosi ni kâ a poe atipouh awh. <sup>8</sup> Nangmae lungthin a pata dawkvah yu hoi kama hanlah Mosi ni a dei. Apuengcue teh hottelah na hoe. <sup>9</sup> Na dei pouh awh, uicuknae laipalah a yu heh a ma teh alouke napui ka lat e tami teh amae a yu koe a yon. Ma lah kaawm e napui hah ka lat e tami haiyah ayâ yu koe a yon atipouh. <sup>10</sup> A hnukkâbangnaw ni yuvâ dawk hettelah awm pawiteh yu lat laipalah o e heh ahawi atipouh. <sup>11</sup> Bawipa ni hote lawk hah tami pueng ni koung dâw a mahoe. Dâw thainae kâ kahmawt e ni dueng doeh a dâw thai. <sup>12</sup> Tami tangawn teh a manu von thung hoi a bokhai e lah a tho. A tangawn teh yu la hoe hanelah ayâ ni cingthui e lah ao. Atangawn teh kalvan uknaeram kecu dawk yu lat laipalah ao. Hete lawk heh ka dâw thai e teh dâw naseh atipouh.

*Camonaw yawhawi a poe  
Mrk 10:13-16; Luk 18:15-17*

<sup>13</sup> Hatnavah camonaw lathueng vah kut toung sin hoi ratoum pouh hanlah atengvah camonaw hah a thokhai aw h e hah a hnukkâbangnaw ni a yue aw h. <sup>14</sup> Jisuh ni, hote camonaw hah thokhai a ngoun seh kai koe a tho aw h hoeh nahanlah ngang aw h hanh. Kalvan uknaeram teh hot patet e camonaw e ram doeh atipouh teh, <sup>15</sup> Camonaw e van vah kut a toung hnukkhu alouklah a cei.

*Ka tangreng e thoundoun*

*Mrk 10:17-30; Luk 18:18-30*

<sup>16</sup> Hathnukkhu, tami buet touh a tho teh, Bawi kahawi, yungyoe hringnae coe thai nahanlah bangpatet e hnokahawi maw ka sak han telah a pacei. <sup>17</sup> Jisuh ni Bangkok, kai hah Bawi kahawi na tipouh. Cathut buet touh dueng doeh kahawi. Hringnae daw k kâen na ngai pawiteh kâpoelawknaw hah tarawi atipouh.

<sup>18</sup> Bangpatet e, kâlawnaw maw ka tarawi han kawi telah bout a pacei toteh, tami thet hanh, uicuk hanh, ayâ e hno parawt hanh, laithoe kampangkhai hanh, <sup>19</sup> manu na pa barih, ma hoi kâkuen e tami hah nama patetlah lung-pataw telah atipouh. <sup>20</sup> Hote tami ni, hote kâlawnaw pueng teh kanawca hoi koung ka tarawi toe. Bangmaw sak hane a panki rah atipouh. <sup>21</sup> Kuepnae koe pha na ngai pawiteh cet nateh na hnopai pueng hah yawt nateh mathoemara pueng hah kabawm. Hottelah na sak pawiteh kalvan kho vah hno na tawn han. Hathnukkhu ka hnukkâbang haw, telah atipouh. <sup>22</sup> Hote tami teh hnopai moi ka tawn

e lah ao dawkvah, hote lawk hah a thai navah lungmathoe laihoi a ban.

*Tangreng hoi Kalvan uknae ram*

<sup>23</sup> Bawi Jisuh ni atangcalah na dei pouh awh, tangka moi ka tawn e ni teh kalvan uknaeram thung a kâen han a ru. <sup>24</sup> Bout na dei pouh awh. Bawi tangreng ni Cathut uknaeram thung daw k a kâen hlak teh Kalauk ni phuengvang khu daw k a kâen heh bet a yawi. Telah a hnukkâbangnaw koe atipouh.

<sup>25</sup> Ahnimouh ni a thai awh nah a kângairu awh dawkvah, hat pawiteh apimaw hloutnae daw k ka phat thai han atipouh awh. <sup>26</sup> Jisuh ni ahnimanaw hah a khet teh, het heh tami hanlah teh coung thai hoeh, hatei, Cathut hanelah teh, a cawngca e hnopueng a coung thai atipouh. <sup>27</sup> Hattoteth Piter ni, kaimouh ni teh ka tawn awh e pueng ceitakhai hoi na hnuk ka kâbang awh toe. Bangpatet e tawkpheu maw ka coe awh han atipouh. <sup>28</sup> Jisuh ni atangcalah na dei pouh awh. A cawngca e hnopueng a katha lah pathoupnae tueng dawkvah tami Capa ni a bawilenna bawitungkhung dawkvah a tahung toteh, ka hnukkâbang e nangmouh teh tungkhung hlaikahni touh daw k tahung laihoi Isarel miphun hlaikahni touh hah lawk na ceng awh han. <sup>29</sup> Apipatethai ka min kecu daw k imlaw, hmaunawngaha, manu napa, yucanaw buetbuet touh ka cettakhai e teh a let cum touh a coe vaiteh a yungyoe hringnae râw hah a pang han. <sup>30</sup> Hnukkatengnaw ni hma ahman vaiteh hmakahmannaw ni hnuk a teng awh han.

## 20

### *Misur takha thung thaw katawknaw bangnue-nae*

<sup>1</sup> Bangnue-nae lah, kalvan uknaeram teh misur takha dawk thaw tawk hanelah, amom vah ka tâcawt ni teh thawkatawkung ka tawng e imkung hoi a kâvan. <sup>2</sup> Katawknaw hoi haiyah lawk a kâcat awh teh, hnin touh e tawk e hah tangka phek touh poe hanlah misur takha koe a patoun.

<sup>3</sup> Amom suimilam tako nah bout a tâco teh, alouke taminaw ni hno yonae koe thaw tawk laipalah sut a kangdue awh e hah a hmu dawkvah, <sup>4</sup> nangmouh hai misur takha koe cet awh, kâki lah na poe awh han atipouh. Ahnimouh ni a cei awh. <sup>5</sup> Hahoi, suimilam hlaikahni hoi tangmin suimilam kathum nah haiyah, a tâco teh ahmaloe e patetlah bout a coun. <sup>6</sup> Tangminlah suimilam panga na haiyah bout a tâco boteh, alouke taminaw sut a kangdue awh e hah a hmu navah, thaw tawk laipalah hete hmuen koe bangkongmaw sut na kangdue awh, atipouh navah; <sup>7</sup> Ahnimouh ni apinihai na coun awh hoeh atipouh awh toteh, nangmouh hai kaie misur takha koe cet awh. Kâki lah na poe awh han atipouh. <sup>8</sup> Tangmin a pha toteh misur takha katawknaw ni amae tangka ka kuenkung hah a kaw teh, thaw katawknaw heh kounng pâkhueng nateh a hnukteng ka tawk e koehoi ahmaloe ka tawk e totouh kutphu poe leih atipouh.

<sup>9</sup> Hatdawkvah tangminlah suimilam panganae koehoi katawknaw ni tangka phek touh a dâw awh. <sup>10</sup> Ahmaloe katawknaw ni teh kapap hmu

han doeh telah pouknae hoi a tho aw h eiteh, tangka phekkouh a dâw aw h. <sup>11</sup> Hottelah be a dâw a hnukkhu imkung koe a phuenang aw h. <sup>12</sup> A hnukkhu e ka kâennaw teh suimilam buet touh dueng a tawk aw h ei, kanî rui rui khumbei khang laihoi ka tawk e kaimouh hoi reikâvan lah na poe atipouh aw h.

<sup>13</sup> Imkung ni hai ka hui, nang daw k kam-soumhoeh hno ka sak hoeh. Tangka phekkouh hoi nouh kai hoi lawk kâdaw roi ei, nama e hno hah lat nateh cet leih. <sup>14</sup> A hnukkhu kâen e naw hai nang hoi reikâvan lah poe hanlah ka ngainae ao. <sup>15</sup> Kai ni kama e hno hah ka sak ngai e patetlah ka sak mahoe h na maw. Kai kahawi e heh nang ni na ut maw atipouh. <sup>16</sup> Hot patetlah hnukteng e ni hma ahman han. Hma kahman e ni hnuk a teng han. A kaw e tami apap ei nakunghai a rawi e tami ayoun atipouh.

*Jisuh ni a due nahan apâthum lah bout a dei  
Mrk 10:32-34; Luk 18:31-37*

<sup>17</sup> Jisuh ni Jerusalem lah a cei nah lam vah, a hnukkâbang hlaikahni touh hah soumatinae koe a kaw teh, <sup>18</sup> maimouh teh atuvah Jerusalem kho lah cei aw h. Tami Capa teh vaihma bawinaw hoi cakathutkungnaw e kut daw k na poe aw h han. Ahnimouh ni a due hanlah ao telah yon na pen aw h han. <sup>19</sup> Tami Capa hah panuikhainae, hema-nae, thingpalam daw k het sak hanlah Jentelnaw kut daw k a poe aw h han. Apâthum hnin vah bout ka thaw han atipouh.

*A manu ni a hei pouh  
Mrk 10:35-45*

<sup>20</sup> Hatnavah Zebedee e a canaw e a manu ni a capanaw hoi Bawipa koe a hnai awh teh, a bawk awh hnukkhu hno hah a hei awh. Bawipa ni bangpatet e hno maw na ngai telah a pacei.

<sup>21</sup> Ahni nihaiyah hete ka capa roi hah na ram thungvah aranglah buet touh avoilah buet touh tahung thinae kâ poe haw atipouh. <sup>22</sup> Jisuh ni a canaw koe, na hei e hah na panuek awh hoeh atipouh. Ka nei han kawî manang na nei thai han maw. Ka khang hane Baptisma hah na khang thai awh han maw telah a pacei navah, kaimouh roi ni ka sak thai roi han atipouh roi dawkvah, <sup>23</sup> Kaie manang teh na nei thai yawkaw han. Ka khang hane Baptisma haiyah na khang thai yawkaw awh han. Hatei, kaie avoilah aranglah tahung thinae kâ teh Pa ni a rakueng pouh tangcoung e naw koe dueng doeh poe lah awm ti atipouh.

<sup>24</sup> Alouke a hnukkâbang hra touh ni a thai awh toteh hote hmaunawngna roi koe a lungkhuek awh. <sup>25</sup> Jisuh ni a kaw awh teh na panue awh e patetlah Jentel bawinaw teh kâtawnnae a tawn awh. <sup>26</sup> Sak thinae kalen ka tawn e lah ao awh. <sup>27</sup> Nangmouh teh hottelah sak awh hanh. Tami Capa teh amae thaw hah ayâ patoun hanlah tho hoeh. <sup>28</sup> Ayâ e thaw tawk hanlah, tami kapap ratang hanlah a hringnae poe hanlah a tho dawkvah, hot patetlah nangmouh thung dawk kalen lah o ka ngai e teh nangmae thaw katawkkung lah awm naseh. Nangmouh thung dawk a lû lah tawk han ka ngai e teh nangmae san lah awm naseh atipouh.

*Jisuh ni mit ka dawn a dam sak*

*Mrk 10:46-52; Luk 18:35-43*

<sup>29</sup> Jeriko kho hoi a tâco awh navah tami moikapap ni a hnuk a kâbang awh. <sup>30</sup> Lam teng sut ka tahung e mitdawn kahni touh roi ni Jisuh a tho tie a thai roi nah, Devit Capa Jisuh, kaimouh roi hah na pahren ei telah a hram roi. <sup>31</sup> Taminaw ni duem ao roi nahanlah kâhruetcuetnae a poe awh eiteh, Devit Capa Bawipa kaimouh roi hah na pahren ei telah hoehoe a hram roi.

<sup>32</sup> Jisuh ni a kangdue teh ahnimouh roi hah a kaw. Bangmaw sak sak hane na ngai roi atipouh.

<sup>33</sup> Bawipa, kaimouh roi e ka mit hah ang sak haw atipouh roi. <sup>34</sup> Jisuh ni ahnimouh roi hah a pahren dawkvah ahnimouh roi e mit hah a kut hoi a tek pouh. Hat nah tahma vah a mit hmawi a ang roi dawkvah a hnuk a kâbang roi.

## 21

*Jerusalem vah bawilennaeh hoi a kâen*

*Mrk 11:1-10; Luk 19:29-38; Jhn 12:12-25*

<sup>1</sup> Jerusalem kho teng Olive Mon rahim kaawm e Bethphage kho a pha awh navah Jisuh ni a hnukkâbang kahni touh hmalah a patoun.

<sup>2</sup> Hmalae kho dawc cet roi nateh hawvah sut pâkhi e Lamanu hoi a ca hah na hmu roi han. Arui rasu roi nateh kai koe hrawi roi haw. <sup>3</sup> Tami buetbuet touh ni bangkongmaw na rasu tetpawiteh, Bawipa ni a panki tet pouh roi. Hottelah na tet pouh roi pawiteh ahni ni tang na poe han telah lawk a thui. <sup>4</sup> Hete hno

pueng hateh profetnaw ni sut a dei e lawk a kuep nahane doeh.

<sup>5</sup> Zion canu teh dei pouh. Kenhaw! na siangpahrang teh nang koe a tho lahun, Ama teh tami nuen kahawicalah ao teh La manu hoi Laca a kâcui.

<sup>6</sup> Jisuh ni kâ a poe e patetlah a hnukkâbang roi ni hmalah a cei roi teh a sak roi. <sup>7</sup> Lamanu hoi a ca hah a hrawi roi teh, La van vah amamae hni a phai pouh teh Bawipa ni, a kâcui. <sup>8</sup> Touk thai hoeh e tami moikapap ni amamae hninaw hah lam dawk a phai awh. Atangawnnaw ni thingbunaw a bouk awh teh lam dawk a phai awh. <sup>9</sup> A hnuk lah, a hmalah ka cet e taminaw ni Devit Capa koevah Hosanna kahring Cathut min lahoi ka tho e teh yawhawinae awm lawisih. Kalvan kadeng lah Hosanna telah a hram awh.

<sup>10</sup> Jerusalem kho thung a kâen navah kho thung abuemlah a puen awh teh hete tami heh apimaw telah a kâpacei awh. <sup>11</sup> Ka kamkhueng e taminaw ni, het hateh Galilee ram Nazareth kho e profet Jisuh doeh atipouh awh.

*Bawkim teh ratoumnae im  
Mrk 11:15-18; Luk 12:45-47*

<sup>12</sup> Jisuh ni Cathut e bawkim thung a kâen teh, bawkim thung hno kayawtnaw hoi ka ran e naw hah a hrek, tangka kathungnaw e caboinaw hoi âbakhu kayawtnaw e tungkhungnaw hai koug a tanawt pouh. <sup>13</sup> Cakathoung dawkvah ka im teh ratoumnae im telah a kaw awh han ati e, hote im hah nangmouh ni dingca im lah na sak awh, atipouh.

*Camonaw Jisuh ni a oup*

<sup>14</sup> Hatnavah, mitdawnnaw hoi a khokkhem-naw ni bawkim ama koevah a tho aw hah teh ahnima e patawpanatnae pueng a dam sak pouh. <sup>15</sup> Jisuh ni kângairu hno a sak e naw hoi camonaw ni hai bawkim vah Devit Capa teh Hosanna awmseh telah a hram aw hah e lawk hah vaihma bawinaw hoi cakathutkungnaw ni a thai aw hah navah a lungkhuek aw hah. <sup>16</sup> Hetnaw ni bangtelamaw a dei aw hah, tie hah na thai ou telah Jisuh hah a pacei aw hah. Jisuh ni oe, ka thai, sanu kanetnaw e pahni daw k hoi Bawipa pholennae hah ka rakueng tie lawk hah vai touh boehai na touk boi aw hah hoeh maw atipouh. <sup>17</sup> Hattoteh ahnimanaw hah Bethani kho lah a ceitakhai teh hote karum hah aloum sak.

*A paw ka paw hoeh e thaibunglung*

*Mrk 11:20-26*

<sup>18</sup> Amom lah khopui koe bout a ban navah a von a hlam. <sup>19</sup> Lam teng vah a hna dueng kanaw e thaibunglung kung buet touh hah a hmu. A kung koe a cei sin navah a paw banghai ao hoeh daw k atu hoi nâ tuek hai nang daw k a paw paw sak hanh lawih atipouh. Hote thaibunglung kung teh tang a ke.

<sup>20</sup> A hnukkâ bangnaw ni a hmu aw hah daw k-vah, thaibunglung kung ni tang a ke toe telah kângairu hoi a dei aw hah. <sup>21</sup> Jisuh ni, Atangcalah na dei pouh aw hah. Nangmouh ni oupvoutnae kaawm hoeh e yuemnae na tawn aw hah pawiteh, thaibunglung kung daw k sak e patetlah na sak thai a hloilah, hote mon patenghai a onae hmuen koehoi kampuen nateh tuipei daw k baw t haw na tet pouh pawiteh, na tie patetlah kaawm han.

<sup>22</sup> Yuemnae na tawn pawiteh, ratoum laihoi na hei aw h e hno pueng na hmu aw h han atipouh.

*Jisuh kâawnae*

*Mrk 11:27-33; Luk 20:27-40*

<sup>23</sup> Bawkim daw k bout a kâen teh a cangkhai lahun nah vaihma bawinaw hoi kacuenaw ni a tho aw h teh, na e kâawnae lahoi maw het patet e hnonaw hah na sak, apini maw hete kâawnae na poe, telah a pacei aw h.

<sup>24</sup> Jisuh ni buet touh na pacei a van han, na dei thai aw h pawiteh doeh hete hnonaw hah na e kâawnae lahoi maw ka sak tie hah ka dei van han. <sup>25</sup> Jawhan e Baptisma heh nâ lahoi e maw. Kalvan koehoi e maw, tami koehoi e maw telah a pacei. Hatnavah amamouh hoi amamouh a kâpacei aw h teh, Kalvan koehoi tet pouh pawiteh, nangmouh ni Jawhan hah bangkongmaw na yuem aw h hoeh telah bout na pacei han. <sup>26</sup> Tami koehoi tet pouh pawiteh tami-maya taki bout a tho, Jawhan hah tami pueng ni profet patetlah a pouk aw h dawkvah, ati aw h.

<sup>27</sup> Hatdawkvah Jisuh koe, ka panuek aw h hoeh atipouh aw h. Jisuh ni hai hot patetvanlah hete hnotithainae hah apie kâawnae lahoi maw ka sak tie hah ka dei van mahoeh.

*Capa kahni touh hoi bangnuenae*

<sup>28</sup> Bangtelamaw na pouk aw h. Tami buet touh ni capa kahni touh a tawn. Kacue koevah a cei teh, ka capa, sahnin kaie misur takha daw k cet nateh thaw taw k loe atipouh. <sup>29</sup> A capa ni ka cet mahoeh atipouh. Hatei, a hnukkhu vah pan a kângai teh bout a cei. <sup>30</sup> A na pa ni kanaw e capa

koe a cei teh ahmaloe e patetlah bout a dei pouh. Oe! Ka cei han bawipa, atipouh eiteh cet hoeh. <sup>31</sup> Hote capa kahni touh roi dawk api hah maw a na pa ngainae ka sak telah a pacei. Capa kacue e ni atipouh awh. Jisuh ni, atangcalah na dei pouh awh. Tamuk kacawngnaw hoi a tak kâyawtnaw ni nangmouh hlakvah Cathut uknaeram dawk a kâen awh. <sup>32</sup> Jawhan ni lannae lahoi nangmouh koe a tho eiteh nangmouh ni ama na tang awh hoeh. Tamuk kacawngnaw hoi a tak kâyawtnaw ni a yuem awh. Hote hah na hmu a ei teh na lungkâthung awh hoeh, yuemnae na tawn awh hoeh.

*Misur takha katawnkung bangnuenae*

*Mrk 12:1-12; Luk 20:1-19*

<sup>33</sup> Bangnuenae lawk alouke heh thai awh haw. Imkung buet touh ni misur takha buet touh a tawn. Khoup a tumdum teh, misur katinnae tangkom a tai. Imrasang buet touh a sak. Takhakatawkkungnaw koe a hlai sak teh alouke ram dawk a cei. <sup>34</sup> A paw tue a pha toteh, a paw khi sak hanlah a sannaw hah takhakatawkkungnaw onae koe a patoun. <sup>35</sup> Hahoi takhakatawkkungnaw ni a sannaw hah a man awh teh buet touh hah a hem awh. Buet touh hah a thei awh. Buet touh hah talung hoi a dei awh. <sup>36</sup> Ahmaloe e hlak kapap lah takha katawnkung ni bout a patoun. Takha ka ring e naw ni ahmaloe e patetlah bout ati awh. <sup>37</sup> A hnukteng vah takha katawnkung ni, hotnaw ni ka capa hah a bari awh han doeh ati dawkvah, amae capa hah a patoun.

<sup>38</sup> Takhakatawkkungnaw ni capa hah a hmu aw h toteh het hateh râw kacoekung doeh. Tho aw h, thei aw h vaiteh, a râw hnonaw hah lat a sei telah a kapan aw h teh, <sup>39</sup> Takha katawnkung e Capa hah a man aw h teh takha alawilah a thei aw h. <sup>40</sup> Takha katawnkung, a tho toteh, hote takhakatawkkungnaw hah bangtelamaw ati han telah a pacei.

<sup>41</sup> Tamimaya ni hote tami kahawihoehnaw hah, ka patawpoung lah a raphoe vaiteh, a paw paw tue nah a paw ka poe hanelah, alouke takhakatawkkungnaw a hlai sak han atipouh aw h. <sup>42</sup> Jisuh ni im kasaknaw ni a hnoun aw h e talung ni im takin a rasang poungnae koe bout a pha. Hot hateh kahring Cathut ni a sak e doeh. Maimae mithmu hai kângairu hanlah ao tie lawk hah Cakathoung daw k na touk boi aw h hoeh maw.

<sup>43</sup> Hatdawkvah na dei pouh aw h. Cathut uknaeram hah nangmouh koehoi lat vaiteh, ram e a paw kapaw hane naw koevah poe lah kaawm han. <sup>44</sup> Apipatethai hote talung van kabaw t e teh ka rek han. Apipatethai a van vah hote talung ni a bosin e teh vitkatip lah ao han atipouh. <sup>45</sup> Hote bangnuenae hah vaihma bawinaw hoi Farasinaw ni a thai aw h navah kaimouh doeh na dei sin nah tie hah a panue aw h. <sup>46</sup> Bawipa man hanlah a tawng aw h ei, tamimaya hah a taki aw h, ahnimouh ni profet patetlah khak a pouk aw h daw kvah.

*Yu paluennae pawî bangnuenae  
Luk 14:16-24*

<sup>1</sup> Jisuh ni kamkhuengnaw koe, bangnuenae lawk bout a dei pouh. <sup>2</sup> Kalvan uknaeram teh siangpahrang buet touh ni, a capa hanlah yu paluennae ka sak pouh e hoi a kâvan. <sup>3</sup> Yu paluennae buven hanlah a sannaw hah, a patoun teh a coun tangcoung e naw, akawsak ei teh ahnimouh ni tho laipalah ao aw. h.

<sup>4</sup> Alouke a sannaw hah bout a patoun teh ka coun tangcoung e naw koevah hettelah dei pouh aw. h. Buven hane kawî teh coungkacoe koung kalawng toe. Maito hoi alouke saring kathâw kathâwnaw hai ka thei teh hnopai pueng teh atangcoungcalah ao toe. Yu paluennae koe tho a leih tet pouh aw. h. atipouh. <sup>5</sup> Hatei, ahnimouh ni banglahai pouk a laipalah a tangawn ni law a ceitakhai aw. h., a tangawn ni hno yonae koe a ceitakhai aw. h. <sup>6</sup> Kaawm rae naw ni a sannaw hah a man aw. h. teh a rektap aw. h., a thei aw. h. <sup>7</sup> Hote siangpahrang ni a thai navah a lungkhuek, amae ransanaw a patoun teh a tuk sak dawkvah tami ka thet e hotnaw hah koung a thei sak. Ahnimae kho hai hmai a sawi pouh aw. h.

<sup>8</sup> Hathnukkhu siangpahrang ni amae a sannaw hah a kaw teh kaie yu paluennae bu teh coungkacoe lawng lah ao. Ka coun e naw ni a kamcu aw. h. hoeh dawkvah, <sup>9</sup> cet aw. h. nateh lamsalun, lamcawngket koe na hmu aw. h. e pueng hah yu paluennae buven hanlah kaw aw. h. nateh coun aw. h., atipouh. <sup>10</sup> A sannaw ni hai lam tangkuem daw. k. a cei aw. h. teh tami kahawî, kahawîhoeh, a hmu aw. h. e pueng hah a pâkhueng aw. h. toteh

yu paluennae bu hah kakawi lah a ven awh.  
<sup>11</sup> Siangpahrang ni ka tho e naw khet hanlah a kâen navah, Yu paluennae khohna ka kho hoeh e tami buet touh a hmu. <sup>12</sup> Ka hui, yu paluennae khohna laipalah bangkongmaw na kâen, atipouh. Ahni ni lawk tho thai laipalah ao.

<sup>13</sup> Hattoteh siangpahrang ni a sannaw koe, ahnie a kutkhok katek awh nateh khuika hâ katanae, alawilah hmonae koe tâkhawng awh.  
<sup>14</sup> Hot patetvanlah, ka kaw e apap eiteh ka rawi e a youn ca atipouh.

*Cathut hoi Sizar*

*Mrk 12:13-17; Luk 20:20-26*

<sup>15</sup> Hattoteh Farasinaw a tâco awh. Bangtelah hoi maw a lawk dei e lahoi maimouh ni a yon man thai awh han titeh a kâdei awh. <sup>16</sup> Ama e hnukkâbangnaw hoi Herod e hnukkâbangnaw hah a patoun awh teh, Bawipa, nang teh lawkkam na cak. Apihai na taket hoeh, apie minhmai hai na khen laipalah Cathut e lamthung lawkkatang hah na pātu tie hah ka panue awh.  
<sup>17</sup> Hatdawkvah bangtelamaw na pouk. Sizar koe tamuk poe kawi maw, poe hoeh han kawi maw, na dei a pouh haw, telah a pacei awh.

<sup>18</sup> Jisuh ni ahnimae hawihoehnae hah a panue dawkvah, a lai kathoutnaw, bangdawkmaw kai heh na tanouk cak awh. <sup>19</sup> Tamuk tangka buet touh ma na patue awh, atipouh teh rahum tangka phek touh a sin pouh awh. <sup>20</sup> Hete mei, hete a ka pâphonae heh apie maw telah a pacei. <sup>21</sup> Sizar e mei, Sizar e ka pâphonae atipouh awh. Jisuh ni Sizar e hno teh Sizar koe

poe awh. Cathut e hno teh Cathut poe awh, atipouh. <sup>22</sup> Hote lawknaw hah a thai awh navah, a kângairu awh teh alouklah a cei awh.

*Sadusinaw hoi boutthawnae*

*Mrk 12:18-27; Luk 20:27-40*

<sup>23</sup> Hat hnin vah bout thaw hringnae awm hoeh ka tet e Sadusinaw ateng vah a tho awh teh a pacei awh. <sup>24</sup> Saya, Mosi nihaiyah tongpa teh ca sak laipalah dout pawiteh catoun a pout hoeh nahanlah a nawngaha ni hote napui hah a yu lah a la han telah a dei. <sup>25</sup> Kaimouh thung dawkhmaunawngaha sari touh kaawm e ao. Apasueke ni a yu a la teh ca khe laipalah a due dawkvah a yu hah a nawngaha hanlah a ceitakhai pouh. <sup>26</sup> Hot patetvanlah buet touh hnukkhu buet touh, hmaunawngaha sari touh ni hote napui hoi ao awh hnukkhu a due awh. <sup>27</sup> A hnukteng vah hote napui hai a due van. <sup>28</sup> Hottelah ao dawkvah boutthawnae hnin dawkhah hote napui hah hmaunawngaha sari touh thung dawkhah apie yu lah maw ao han. Ahnimouh ni be bout a yu na awh, telah atipouh awh. <sup>29</sup> Jisuh ni, nangmouh teh Ca Kathounge lawk hah na thai panuek awh hoeh, Cathut e bahu hai na panue awh hoeh dawkvah na tawm payon awh. <sup>30</sup> Boutthawnae hnin dawkhah yuvânae awm mahoehtoe, yu paluennae hai awm mahoehtoe. <sup>31</sup> Kalvan tami, Cathut e taminaw patetlah doeh o awh han. <sup>32</sup> Hothloilah, kadout tangcoungnaw boutthawnae dawkhah teh, Cathut ni kai teh Abraham e Cathut, Isak e Cathut, Jakop e Cathut lah ka o telah nangmouh koe a dei e hah na touk boi awh hoeh maw.

Cathut teh kadoutnaw e Cathut nahoe. Kahring-naw e Cathut doeh telah atipouh. <sup>33</sup> Rangpui ni hote cangkhae lawk hah a thai aw h toteh a kângairu aw h.

*Kalenpoung e kâlawk*

*Mrk 12:28-31*

<sup>34</sup> Sadusinaw hah lawk tho sak thai hoe h toe tie hah Farasinaw ni a thai aw h toteh cung-talah a kamkhueng aw h. <sup>35</sup> Ahnimouh thung daw k kâlawk ka cangkhai e buet touh ni a tanouk nahanlah buet touh a pacei. <sup>36</sup> Saya, kâlawk thung daw k bangpatet e kâpoelaw k hah maw kalenpoung atipouh. <sup>37</sup> Jisuh ni, na Cathut, kahring Cathut hah na lungthin abuemlah, na muitha abuemlah, na pouknae abuemlahoi na lungpataw han. <sup>38</sup> Het hateh apasuekpoung e hoi kalenpoung e kâpoelaw k doeh. <sup>39</sup> Hothloilah, nama hoi kâkuen e hah nama hoi kâvan lah na lungpataw han tie apâhni e kâpoelawknaw teh apasuek e hoi a kâtarawi. <sup>40</sup> Hete kâpoelawknaw kahni touh hateh kâlawk puenghoi profetnaw ni dei e pueng e a kung lah ao atipouh.

*Jisuh Khrih teh api capa maw*

*Mrk 12:35-37; Luk 20:41-44*

<sup>41</sup> Farasinaw a kamkhueng aw h navah Jisuh ni a pacei. <sup>42</sup> Khrih heh banglah maw na pouk aw h. Apie Capa lah maw na pouk aw h, atipouh. Ahnimouh ni Devit Capa atipouh aw h. <sup>43</sup> Hat pawiteh Devit ni Khrih hah muitha lahoi Bawipa telah bangkongmaw a kaw. <sup>44</sup> Devit ni a dei e teh, kahring Cathut ni na taran pueng hah na khok

rahim ka ta hoehroukrak kaie aranglah tahung telah Bawipa ni kaie Bawipa koevah atipouh.

<sup>45</sup> Hottelah Devit ni Khrih hah Bawipa telah kaw pawiteh bangtelamaw a capa lah ao han telah atipouh. <sup>46</sup> Api buet touh ni hai lawk kam touh boehai pathung thai aw h hoeh. Hat hnin hoi teh apinihai lawk bout pacei ngam aw h hoeh toe.

## 23

### *Thoebonae sari touh*

*Mrk 12:38-39; Luk 20:45-46; 13:34-35*

<sup>1</sup> Hathnukkhu Jisuh ni a hnukkâbangnaw hoi tamimaya koe lawk a dei pouh.

<sup>2</sup> Cakathutkungnaw hoi Farasinaw teh Mosi e tahungnae daw k a tahung aw h. <sup>3</sup> Hatdawkvah ahnimouh ni a dei aw h e pueng hah tarawi a nateh sak pouh aw h. Ahnimae sak e patetlah teh sak aw h hanh. Bangkongtetpawiteh, a dei aw h e patetlah a sak aw h hoeh daw k doeh. <sup>4</sup> Ahnimouh ni ka ri ni teh phu ka ru e hnonaw hah a roup aw h teh taminaw e loung daw k ouk a patue aw h. Amamouh ni hote hnonaw teh a kutdawn ca hoi boehai takhoe ngai aw h hoeh. <sup>5</sup> A sak aw h e hno pueng hah ayâ ni hmu nahanlah doeh a sak aw h. A tampa daw k a kawm sin aw h e akana a len sak aw h teh, khohna daw k e akana a saw sak aw h. <sup>6</sup> Buvenna e hoi sinakoknaw koe kahawi e tahungnae hah a lungpataw aw h, <sup>7</sup> hno yonae koe barinae, kacangkaikung telah kawnae hah a ngai aw h.

<sup>8</sup> Nangmouh teh Rabbi telah kawnae hah dâw aw h hanh. Khrih buet touh dueng doeh

nangmouh na kacangkhaikung na tawn awh. Nangmouh pueng teh hmaunawnggha lah na o awh. <sup>9</sup> Talai van vah apihai apa telah kaw awh hanh. Kalvan kho vah nangmae na Pa buet touh dueng doeh kaawm. <sup>10</sup> Saya telah kawnae hai dâw awh hanh. Khrih dueng doeh nangmouh na kacangkhaikung lah ka awm. <sup>11</sup> Nangmouh thung dawk kalenpounge tami teh nangmae patoun patang e lah ao han. <sup>12</sup> Apipatethai amahoima kârasang e teh a rahim vah pabo lah kaawm han. Apipatethai amahoima kârahnoum e teh tawm lah kaawm han.

<sup>13</sup> A laikathout e cakathutkungnaw hoi Farasinaw yawthoe lah na o awh. Kalvan uknaeram teh ayânaw hanlah na khan awh teh namamouh hai na kâen awh hoeh, kâen han kangainaw haiyah na ngang awh. <sup>14</sup> A laikathout e cakathutkungnaw hoi Farasinaw yawthoe lah na o awh. Lahmainu e im hah na lawp awh teh a kamphawng hoeh nahanlah kasaw poug lah na ratoum awh. Hatdawkvah hoe kalen e yonphukhangnae hah na khang awh han.

<sup>15</sup> A laikathout e cakathutkungnaw hoi Farasinaw, yawthoe lah na o awh. Bangkongtetpawiteh, tami buet touh hai namamae bawknae daw kâen sak hanlah talí hoi a oung pheng na katin awh teh, na kâen sak hnukkhu teh namamouh hlak lêt hni e hell ca lah na o sak awh.

<sup>16</sup> Kahrawikung mit ka dawnnaw, yawthoe lah na o awh. Bangkongtetpawiteh, Bawkim hah noe lahoi thoe ka bo e teh cak hoeh. Bawkim thung e sui hah noe hoi thoe ka bo e doeh ka cak na ti awh. <sup>17</sup> Tamipathu, mitdawnnaw, nâ e hno

maw ka talue. Sui maw, nahoe h pawiteh sui ka thounsak e Bawkim na ou. <sup>18</sup> Thuengnae khoungroe noe lahoi thoe ka bo e teh cak hoe h, thuengnae khoungroe van kaawm e thuengnae hno hah noe lahoi thoe ka bo e teh a cak na ti awh. <sup>19</sup> Mitdawnnaw, bangpatet e hno maw hoe ka talue. Hote thuengnae hno na ou, Hote thuengnae hno hah ka thounsak e thuengnae khoungroe na ou. <sup>20</sup> Hatdawkvah thuengnae khoungroe hah noe lahoi thoe na bo pawiteh thuengnae khoungroe khuehoi avan e kaawm hno pueng hah mek na noe teh thoe na bo toe. <sup>21</sup> Bawkim hah noe lahoi thoe na bo pawiteh a thung kaawm e khuehoi thoe mek na bo toe. <sup>22</sup> Kalvan kho noe hoi thoe ka bo e teh Cathut e bawitungkhung hoi, a van ka tahung e khuehoi mek na noe teh thoe na bo toe.

<sup>23</sup> A laikathout cakathutkungnaw hoi Farasinaw yawthoe lah na o awh. Nangmouh ni teh anhla a pawhiknaw hoi sawngpam totouh hra touh daw k buet touh na hmoun awh. Hatei, kâlawk thung daw k hoi hoe alawkpui e lanna e, pahrennae yuemnae hah lat na hnoun awh. Hete hnonaw na sak han roeroe lah ao. A lathueng lah dei e hai sak laipalah awm awh hanh. <sup>24</sup> Kahrawikung mitdawnnaw, tui daw k manging buet touh boehai ao hoe h nahanlah na raci awh ei kalauk hah na payawp awh.

<sup>25</sup> A laikathout e cakathutkungnaw hoi Farasinaw yawthoe lah na o awh. Manang hoi tongben hah avanlah na pâle awh ei a thung lah teh lawpnae hoi dumyenna e hoi na kawi awh. <sup>26</sup> Mit ka dawn e Farasinaw, manang hoi tongben hah

a thung lah hmaloe pâle awh. Hottelah na sak pawiteh doeh alawilah hai thoung tih.

<sup>27</sup> A laikathout e cakathutkungnaw hoi Farasinaw yawthoe lah na o awh. Avan ka pangaw dui hluk e tangkom hoi na kâvan awh. Hote tangkom teh alawilah hroung ahawi. Athung teh tami hru, khinnae a cawngca hoi akawi. <sup>28</sup> Hot patetvanlah alawilah, taminaw hmalah teh tamikalan patetlah na o awh, athunglah teh laithoena hoi dумыenna hoi na kawi awh.

<sup>29</sup> A laikathout e cakathutkungnaw hoi Farasinaw, yawthoe lah na o awh. Profetnaw e phuen hah na sak awh teh tami kalannaw e phuen hah na pathoup awh. <sup>30</sup> A mintoenaw e se nah kaawm awh pawiteh profetnaw theinae daw k ka baw k awh mahoe h na ti awh. <sup>31</sup> Hottelah na tet awh pawiteh profetnaw ka thet awh e catoun lah ka o awh tie hah namamouh hoi namamouh ni na kampanghai awh toe. <sup>32</sup> Hatdawkvah mintoenaw e a sakyoe awh e totouh phat awh.

<sup>33</sup> Hrunthoe catounnaw bangtelamaw lawk-cengnae hell thung hoi na hlout a thai han raw vaw. <sup>34</sup> Hatdawkvah thai awh haw, nangmouh koevah, profetnaw, a lungkaang naw, cakathutkungnaw ka patoun han. A tangawn teh na thei awh vaiteh thingpalam daw k na pathout awh han. Atangawn hah sinakoknaw daw k na hem awh teh, kho buet touh hoi buet touh na rektap awh teh na hrek awh han. <sup>35</sup> Hatdawkvah, tamikalan Abel e thi koehoi athung bawkim hoi thuengnae khoungroe rahak na thei awh e Berekhiah capa Zekhariah e a thi totouh talai van daw k rabaw k lah kaawm

tangcoung e tami kalannaw e thi teh nangmae lû dawka bawt han. <sup>36</sup> Atangcalah na dei pouh awh. Hete hno pueng heh, hete catounnaw van vah ka phat han.

*Jisuh ni Jerusalem hanlah a ka*

<sup>37</sup> Oe! Jerusalem, Jerusalem, profetnaw ka-thetkung, nang koe patoun lah kaawm e naw talung hoi kadêikung, Âpuï ni a canaw hah a rathei rahim a pâkhueng e patetlah na canaw hah kamkhueng sak hanlah avai moikapap ngainae ka tawn toe. Hatei, nang ni teh na ngai hoeh. <sup>38</sup> Thai haw, na onae im teh tami kingkadi lah doeh ceitakhai lah ao toe. <sup>39</sup> Na dei pouh awh, Bawipa min lahoi ka tho e hah yawhawinae awm naseh telah na dei awh hoehroukrak, atu hoi teh nangmouh ni ka minhmai hah na hmawt a mahoehtoe atipouh.

## 24

*Jisuh ni bawkim rawk nahan kong sut a dei*  
*Mrk 13:1-37; Luk 21:5-36*

<sup>1</sup> Jisuh ni bawkim dawka hoi a tâco teh alouklah a cei navah, bawkim saknae imnaw hah pátue hanlah a hnukkâbangnaw ni rek a hnai awh. <sup>2</sup> Jisuh ni hete hnonaw pueng hah na hmu awh nahoehmaw. Atangcalah na dei pouh awh. Raphoe laipalah talung buet touh e avan, buet touh kangna hai kamhmung mahoehtoe atipouh.

*Runae kalen a tho nahane sut a dei*

<sup>3</sup> Hathnukkhu, Olive Mon dawka a tahung navah, a hnukkâbangnaw ni alouknaw bawka

laipalah Jisuh koe rek a hnai aw h teh, hote hnonaw teh nâ t uek maw a tho han, let na tho nahane hoi talaivan a pout nahane minoutnaw teh bangtelamaw ao han na dei pouh haw atipouh aw h. <sup>4</sup> Jisuh ni, ahnimouh koevah, apipatet ni hai na dum aw h hoeh nahanlah kâ hrue t c u e t aw h. <sup>5</sup> Tami kapap ni kai doeh Khrih ati vaiteh, Kaie min lahoi haiyah tho a vaiteh, tami kapap hah a dum aw h han. <sup>6</sup> Taran kâ t u k n a e h o i , t a r a n k â t u k n a h a n e k a m t h a n g h a i n a t h a i a w h h a n . H a t e i , n a p u e n a w h h o e h n a h a n e l a h , k â h r u e t c u e t a w h . H o t e h n o n a w t e h k a a w m h a n . H a t e i a p o u t n a e n a h o e h r a h . <sup>7</sup> Miphun buet touh hoi buet touh, uknaeram buet touh hoi buet touh a kâ t a r a n a w h h a n . K h o t a n g k u e m a t a k a n g v a i t e h , l a c i k a p u n g h a n , t â l i a n o h a n . <sup>8</sup> Hotnaw hateh runae kamtawngnae doeh.

*Rektap khang nahan kong sut a dei*

<sup>9</sup> Hat torei teh taminaw ni rektap hanlah, thei hanlah na man aw h han. Ka min kecu daw k t a m i p u e n g n i n a p a h n a w t a w h h a n . <sup>10</sup> Hat torei teh tami kapap ni lawkkam raphoe vaiteh, buet touh hoi buet touh a kâ p a h n a w t a w h v a i t e h , b u e t t o u h h o i b u e t t o u h a k â m a i t h o e a w h h a n . <sup>11</sup> Profet kaphawk pap vaiteh tami kapap a dum aw h han. <sup>12</sup> Hounlounnae apap han, lungpatawnae a roum han. <sup>13</sup> Apipatethai apout ditouh ka khang e teh hloutnae a hmu han. <sup>14</sup> Uknaeram kamthang kahawi heh miphun pueng koe lawkpanuesaknae lah ao na hanlah, talaivan pueng daw k p â p h o l a h k a a w m h a n . H a h o i , t e h p o u t n a e a p h a h a n .

### *Rucatnae kalenpoung*

<sup>15</sup> Hatdawkvah profet Daniel ni a dei e patetlah panuethopoung karaphoekung kathoung hmuen dawk kangdue e na hmu awh toreih teh, Cakathoung ka touk e ni thai panuek naseh. <sup>16</sup> Hottelah hmu lah awm pawiteh, Judea ram kaawm e naw ni monsom lah yawng awm naseh. <sup>17</sup> Lemphu kaawm e ni imthungkhu e hno la hanlah kum hanh naseh. <sup>18</sup> Laikawk koe kaawm e ni hai a khohna la hanlah hnuklah kamlang hanh lawiseh. <sup>19</sup> Hot na hnin toteh camo ka neng e napui hoi camosen kaawm e napuinaw teh puenghoi a ru awm han. <sup>20</sup> Na yawng awm nahane teh pading tue hoi sabbath hnin dawk a kâvoe hoeh nahanlah ratoum awm. <sup>21</sup> Bangkongtetpawiteh, talaivan pek a kamtawng hoi atu totouh kaawm boihoe hane, ao hnukkhu hoi hai bout kaawm hoeh hane puenghoi runae teh hatnae tueng nah a tâco han. <sup>22</sup> Hote tueng teh saw pawiteh apipatet ni hai hlout thai mahoe h. Rawi e taminaw hane kecu daw hote tueng hah a duem sak han. <sup>23</sup> Hattoteh apipatet ni hai hi doeh Khrih ao, haw doeh Khrih ao ka tet nakunghai yuem awm hanh. <sup>24</sup> Bangkongtetpawiteh, khrihkaphawknaw hoi profetkaphawknaw tâcawt vaiteh, rawi tangcoung e naw patenghai dum thai pawiteh dum thai nahanelah, kalenpoung mitnout hoi kângairunae hnonaw hah a kamnue sak awm han. <sup>25</sup> Thai awm haw, sut na dei pouh awm.

<sup>26</sup> Hatdawkvah, ahnimouh ni Khrih teh thingyeiyawn doeh ao ka tet awm nakunghai tâcawt awm hanh. Imthung doeh ao ka tet

nakunghai yuem awh hanh. <sup>27</sup> Sumpa teh kanîtho koehoi apalik nah kanîloum totouh a ang e patetlah tami Capa teh ka tho han. <sup>28</sup> Ro aonae koe langtanaw ni a kamkhueng han.

*Tami Capa bout a tho han*

<sup>29</sup> Hatnae tueng runae hnukkhu, kanî teh vaitalahoi a hmo han. Thapa teh ang mahoe. Âsinaw teh kalvan hoi a bo awh han. Kalvannaw e bahu teh a kahuet awh han. <sup>30</sup> Hattoteh tami Capa e mitnout teh kalvan vah a kamnue han. Talai van tami pueng ni a khuika awh vaiteh, tami Capa ni kalenpounge bahu hoi kalenpounge bawilennae tâmai kâcui vaiteh a kum e hah na hmu awh han. <sup>31</sup> Hahoi a kalvantaminaw hah kacaipounge mongka lawk hoi patoun vaiteh, talai takin pali touh koe e kalvan apoutnae koehoi avanglae apoutnae koe totouh, a rawi tangcoung e taminaw hah a pâkhueng awh han.

*Thaibunglung kung bangnuenae*

<sup>32</sup> Thaibunglung kung hoi bangnuenae hah pâkuem awh. Thaibunglung kung ni a dawn a cawn teh a hnanaw a naw toteh, kompawi a hnai toe tie hah na panue awh. <sup>33</sup> Hot patetlah hote a konglam abuemlah na hmu awh toteh, tami Capa teh takhang koe totouh a tho toe tie hah panuek awh. <sup>34</sup> Atangcalah na dei pouh awh. Atu e catounnaw be a due awh hoehnahlan hote konglam pueng ka tâcawt han. <sup>35</sup> Kalvan hoi talai teh a rawk han, hatei ka lawk teh a kangning han.

*Atueng teh apinihai panuek hoeh  
Luk 17:26-27*

<sup>36</sup> Hote tueng teh apinihai panuek hoeh. Kalvan e kalvantaminaw ni hai panuek hoeh. Apa ni dueng doeh a panue. <sup>37</sup> Tami Capa a kum toteh Noah senae patetlah kaawm han. <sup>38</sup> Noah ni tuikamuem hoehnahlan hoi long thung a kâen ditouh tami pueng ni a canei awh, a kâpaluen awh, a kâhâ awh. <sup>39</sup> Tui kamuem a tho toteh taminaw pueng koug raphoe ditouh a thada e patetlah tami Capa a kum toteh hotpatetlah ka tâcawt han. <sup>40</sup> Hattoteh law kaawm e tami kahni touh dawc buet touh a la vaiteh buet touh a ceitakhai han. <sup>41</sup> Cakang ka phawm roi e napui kahni touh dawc buet touh a la vaiteh buet touh a ceitakhai han.

<sup>42</sup> Nangmae Bawipa teh nâtuek maw a tho han ti na panue awh hoeh dawkvah ring awh. <sup>43</sup> Tamru a tho nahane tueng heh imkung ni panuek pawiteh a paru thai hoeh nahanlah a ring han doeh tie teh na panue awh. <sup>44</sup> Hatdawkvah coungkacoe awm awh. Bangkongtetpawiteh na poukhoehnae tueng dawc tami Capa teh ka tho han.

*Yuemkamcu e hoi kâhruetcuete e san*

<sup>45</sup> Bawipa ni amae imthungnaw hah atueng a pha toteh rawcanaw poe sak hanlah kaukung lah a rawi e yuemkamcunae hoi lungangnae hoi kakuep e san kahawi teh apimaw . <sup>46</sup> Bang patet e san hai hottelah a sak e hah a Bawipa ni a hmu pouh e teh a yawhawi. <sup>47</sup> Atangcalah na dei pouh awh. Bawipa ni hot patet e san koevah a hnopai kaawm e pueng hah a poe han. <sup>48</sup> Hatei, san kathout ni teh a lungthin dawc hoi ka Bawipa heh tho hnai mahoehtelah a pouk

laihoi, <sup>49</sup> a huinaw hah a hem a bo teh hounloun, yamuhrinaw hoi a canei awh. <sup>50</sup> A bawipa teh a poukhoehnae hoi a panuehoehnae tueng dawk a tho teh, <sup>51</sup> hote san hah puenghoi yue vaiteh khuikanae, hâ katanae hmuen koe ka kâsak e naw hoi cungtalah hmuen a hmoun pouh awh han.

## 25

### *Tanglakacuem hra touh bangnuenae*

<sup>1</sup> Kalvan uknaeram teh yupaluenkung dawn hanlah hmaiim patuep hoi ka cet awh e tanglakacuem hra touh hoi a kâvan. <sup>2</sup> Hote tanglanaw thung dawk panga touh teh a lungang awh. Hatei, panga touh e teh a pathu awh. <sup>3</sup> Ka pathu e naw teh, hmaiim dueng a sin awh teh, atui sin awh hoeh. <sup>4</sup> A lungkaangnaw teh, hmaiim hoi, satuium dawk, atui khuehoi a sin sin awh rah. <sup>5</sup> Yupaluenkung a tho hoeh navah, hote tanglanaw ni a ngam awh teh, muet a i awh.

<sup>6</sup> Karumsaning toteh, kenhaw! yupaluenkung a tho toe, tâcawt awh nateh, dawn a leih, telah a oung. <sup>7</sup> Hote tanglakacuemnaw ni a thaw awh teh hmaiimnaw hah a kârakueng awh.

<sup>8</sup> A lungkaang hoeh e naw ni kaimae hmaiim hmai a due toe. Nangmae satui hah youn touh na poe awh haw telah a lungkaangnaw koe a hei awh. <sup>9</sup> A lungkaang e naw van ni hai nangmouh hane khuehoi atui khout hoeh. Hatdawkvah na hno awh hanelah atui kâyawt e koe na ran awh pawiteh bet kahawi han telah atipouh awh.

<sup>10</sup> Hotnaw ni atui ran hanelah a cei awh lahun navah, yupaluenkung a tho toteh, coundkaco

kaawm e tanglanaw teh yupaluenkung hoi cung-talah pawî thung a kâen a hnukkhu takhang hah a khan awî. <sup>11</sup> Hathnukkhu alouknaw a tho awî. Bawipa, Bawipa kaimouh han tho paawng ei telah a kâhei awî. <sup>12</sup> Bawipa ni atangcalah na dei pouh awî, nangmouh na panuek awî hoeh, telah atipouh. <sup>13</sup> Hatdawkvah tami Capa a tho nahane hnin hoi atueng teh na panue awî hoeh dawkvah ring awî.

*Talen hoi bangnuaenae*

*Luk 19:12-27*

<sup>14</sup> Kalvan uknaeram teh ahlanæ ram koe kahlawng ka cet e hoi a kâvan. Ahni ni, kho louk lah cei hane pouknae a tawn dawkvah, a kut rahim e naw hah a kaw teh a hnonaw hah a hnawng. Ahnimouh teh amamae a coung thai awî e patetlah buet touh koe talen panga, <sup>15</sup> buet touh koe kahni, buet touh koe buet touh a poe hnukkhu a ceitakhai (Talen buet touh heh Deinari 6,000 hoi a kâvan ). <sup>16</sup> Talen panga touh ka dâw e ni a cei teh a yoran dawkvah alouke apung talen panga touh a hmu. <sup>17</sup> Hote patetvanlah talen kahni touh ka dâw e van nihai, alouke apung talen kahni touh a hmu. <sup>18</sup> Talen buet touh ka dâw e niteh, Bawipa e talen hah talai a tai teh talai thungvah a hro. <sup>19</sup> A hnin a tha moi a saw hnukkhu hotnaw e Bawipa a tho teh, tangka e a kong hah a dei. <sup>20</sup> Talen panga touh ka dâw e ni yah, apung e talen panga touh a sin teh, Bawipa nang ni kai koe talen panga touh na pâkuem sak. Alouke talen panga touh ka pung sak atipouh. <sup>21</sup> Bawipa ni, ahawi nang teh kahawi e hoi yuemkamcu e san., nang teh titca

e hno dawk yuemkamcu dawkvah, kapap e hno hai na kuem sak han. Na Bawipa lunghawinae thungvah kâen van leih atipouh.

<sup>22</sup> Talen kahni touh ka dâw e nihai, Bawipa talen kahni touh na kuem sak teh, alouke talen kahni touh ka pung sak atipouh. <sup>23</sup> Bawipa ni, ahawi. Yuemkamcu e san kahawi. Hno titca e dawk yuemkamcu toe. Hno kapap e hai na kuem sak han. Na Bawipa lunghawinae thung kâen van haw, atipouh.

<sup>24</sup> Talen buet touh ka dâw e nihai, Bawipa nang teh pacipali lah na kaawm e na tho dawkvah, na patuehoehnae hmuem koe na ka a niteh, na heihoehnae hmuem koe na ka pâkhueng e na tho tie hah ka panue. <sup>25</sup> Hatdawkvah, ka taki teh, nange talen buet touh hah talai thung ka hro toe. Atu na talen roup ao atipouh. <sup>26</sup> A bawipa ni, ka pangak pasa e san kathout, atipouh. <sup>27</sup> Ka heihoehnae koe ka pâkhueng tie hah na panuek katang pawiteh kaie talen hah bangkongmaw hno yorannaw kut dawk na hruék hoeh vaw. Hottelah na hrueng pawiteh kai bout ka tho toteh, tangka a manu hoi apung hah ka hmu han ei.

<sup>28</sup> Hatdawkvah, talen buet touh e hah a kut dawk hoi lawmh awh. Talen hra touh ka tawn e hah poe sin awh. <sup>29</sup> Bangkongtetpawiteh, apipatet hai ka tawn e teh, hoe kapap a tawn nahanlah rek poe sin han rah. Apipatethai ka mathoe e teh a tawn e ca patenghai he lawp pouh lah ao han. <sup>30</sup> Cungkeihoehe hote san hah, khuikanae hoi hâ katanae aonae koe, alawilah hmonae thungvah tâkhawng awh, atipouh.

*Tu hoi hmae*

<sup>31</sup> Tami Capa teh a Bawilennae hoi kalvantami kathoungnaw hoi a tho toteh, a bawilennae bawitungkhung dawkvah a tahung han. <sup>32</sup> A hmalah miphun pueng a kamkhueng sak vaiteh, tukhoumkung ni tu hoi hmae a kapek e patetlah tami pueng hah a kapek han. <sup>33</sup> Tunaw hah aranglah, hmaenaw hah avoilah a ta han.

<sup>34</sup> Hat toteh, siangpahrang ni aranglah kaawm e koevah, tho awh, a Pa e yawhawinae ka-coenaw, talaivan sak pasuek hoi nangmouh hanlah sut pathoup e uknaeram hah pang awh. <sup>35</sup> Bangkongtetpawiteh, ka vonhlan nah na paca awh. Tui kahran nah nei han tui na poe awh. Imyin lah ka o nah na khetyawt awh. <sup>36</sup> Caici lah ka o nah na khohna sak awh. Ka patawpanat nah na khetyawt awh. Thongim ka bo nah na hloe awh, ati pouh.

<sup>37</sup> Hat torei teh tami kalannaw niyah, Bawipa nâduek maw na vonhlan e hah ka hmu awh teh na paca awh. Tui na kahran e hah nâduek maw ka hmu awh teh na nei hanlah tui na poe a vaw. <sup>38</sup> Imyin lah na o e hah nâduek maw na hmu awh teh na khetyawt awh. Caici lah na o e hah nâduek maw na hmu awh teh, na khohna sak awh. <sup>39</sup> Na patawpanat nah nâduek maw na hloe awh teh, nang koe ka tho awh, telah ati awh han. <sup>40</sup> Hattoteh siangpahrang ni atangcalah na dei pouh awh. Nangmouh ni hete ka nawngghanaw thung dawkvah katoengpounge koevah na sak awh e pueng hateh, kai koe na sak awh e doeh toe telah bout ati pouh awh han.

<sup>41</sup> Hat toteh, siangpahrang ni, avoilah kaawm-naw koevah, nangmouh thoebouh lah na kaawm-naw, kahraimathout hoi amae a hunaw hanlah sut rakueng pouh e a yungyoe hmai thungvah kai koehoi kâatakhoeh awh. <sup>42</sup> Bangkongtetsapawiteh, ka von a hlam nah ca han rawca na poe awh hoeh, tui kahran navah nei hane tui na poe awh hoeh. <sup>43</sup> Imyin lah ka o navah na khen na yawn awh hoeh, caici lah ka o navah na kho na hnath sak awh hoeh, ka patawpanat nahai thoseh, thongim thung ka o nahai thoseh, na tho na awm sin awh hoeh.

<sup>44</sup> Hotnaw ni vah, Bawipa, na vonhlan e, tui na kahran e, imyin lah na o e, caici lah na o e, na patawpanat e, thongim thung na onae hah nâtuék maw na hmu awh teh na khenyawn laipalah, na paca laipalah ka o awh, ati awh han. <sup>45</sup> Hattoteh siangpahrang ni, atangcalah na dei pouh awh. Nangmouh ni hete ka nawngghanaw thung dawh, ka thoung poung e koe na sak awh hoeh e pueng teh kai koe na sak awh hoeh toe, ati pouh awh han. <sup>46</sup> Hotnaw teh a yungyoe reknae koe cet awh vaiteh, tami kalannaw teh a yungyoe hringnae koe a cei awh han a ti.

## 26

*Jisuh thei hanlah a kâcai awh*

*Mrk 14:1-2; Luk 22:1-2*

<sup>1</sup> Jisuh ni hete lawknaw koung a dei hnukkhu, a hnukkâbangnaw koevah, <sup>2</sup> Hnin hni touh a loum hnukkhu teh, ceitakhai pawihnin ao han toe titeh na panue awh. Hattoteh tami Capa hah

thingpalamnae dawk thei sak hanlah, poe e lah kaawm han atipouh.

<sup>3</sup> Hatnavah, vaihma bawinaw, cakathutkung-naw hoi kho thung e kacuenaw teh vaihma kacue Kaiaphas e toeim vah a kamkhueng aw hah teh, <sup>4</sup> Jisuh hah huenghai hoi bangtelah ne man thai vaiteh thei thai aw hah han tie hah a kâpankhai aw hah. <sup>5</sup> Hatei, paw i na hnin vah man aw hah hanh ei sei. Tami pueng ruengrueng tet a langvaih ati aw hah.

*Napui buet touh ni Jisuh hah hmuitui a aw i*  
*Mrk 14:3-9; Luk 7:37-38; Jhn 12:1-8*

<sup>6</sup> Bethani khovah ka hrikbei e Simon im Jisuh ao navah, <sup>7</sup> napui buet touh ni hmuitui ap hu kaawm poung e talungpangaw bom a sin teh bu a ca lahun nah a lû daw k a aw i pouh.

<sup>8</sup> A hnukkâbangnaw ni a hmu aw hah navah, bangkongmaw a kaseikasak ati aw hah teh a lungkhuek aw hah. <sup>9</sup> Hote hmuitui hah ap hu moikap pap lah yo vaiteh karoedengnaw poe hanelah ao ati aw hah. <sup>10</sup> Jisuh ni a panue toteh hote napui hah bangkongmaw na taraw k aw hah. Ahni ni kai koe hnokahawi a sak toe. <sup>11</sup> Karoedengnaw teh nangmouh koe doeh pou ao aw hah. Kai teh nangmouh koe pou kaawm mahoe hah. <sup>12</sup> Hete hmuitui hah ka tak daw k a aw i e teh, ka ro pakaw p nahanlah a rakuengnae doeh toe. <sup>13</sup> Atangcalah na dei pouh aw hah. Talaivan kamthang kahawi deinae hmuen pueng koevah, hete napui pou pouk nahanelah, a hnosak e heh dei lah kaawm van han atipouh.

*Judah Isakarot ni Jisuh a yo*  
*Mrk 14:10-11; Luk 22:3-6*

<sup>14</sup> Hatnavah a hnukkâbang hlaikahni touh thung dawk e Judah Isakarot ni vaihma bawinaw koe a cei teh, <sup>15</sup> Jisuh hah nangmae kut dawk na poe thai pawiteh, nangmouh ni kai hah tangka nâyittouh maw na poe awh han atipouh. Ahnimouh ni ngun tangka 30 touh na poe han atipouh awh. <sup>16</sup> Hahoi teh, Bawipa hah pahnawt thai nahanelah, Judah ni atueng kanhlongnae hah sut a ring.

*Tangmin buvennae*

*Mrk 14:12-16; Luk 22:7-13*

<sup>17</sup> A hnukkâbangnaw ni tonphuenhoehe paw i apasuek hnin vah, ceitakhai paw i ca nahane hmuen hah nâ e koe maw rakueng sak hanlah na ngai atipouh awh. <sup>18</sup> Bawipa ni, khotung tami buet touh e im vah cet awh nateh, Bawipa ni lawk na thui e teh, a tue a hnai toe, a hnukkâbangnaw hoi cungtalah ceitakhai paw i heh nangmouh im vah ka hno awh han ati tet pouh awh, atipouh. <sup>19</sup> A hnukkâbangnaw ni a dei pouh e patetlah a sak awh teh, ceitakhai paw i hah atangcungcalah a rakueng pouh awh. <sup>20</sup> Tangmin lavah, a hnukkâbangnaw hlaikahni touh hoi bu cungtalah a ven awh.

<sup>21</sup> A ca awh lahun navah Bawipa ni, atangcalah na dei pouh awh. Nangmouh thung daw k buet touh ni kai hah na pahnawt awh han atipouh. <sup>22</sup> Hat torei teh, a hnukkâbangnaw a lung puenghoi a mathoe awh teh, Bawipa kai maw telah lengkaleng a pacei awh. <sup>23</sup> Bawipa ni kawlung daw k kai hoi rei ka tapu e ni kai na pahnawt han. <sup>24</sup> Cakathoung daw k thut e

patetlah tami Capa teh ka cet han. Hatei, tami Capa ka pahnawt e teh a yawthoe. Ahni teh khe hoeh ngala pawiteh bet ahawihnawn atipouh. <sup>25</sup> Bawipa ka pahnawt e Judah Isakarot ni hai Rabbi kai maw telah a pacei navah, na dei e patetlah oe nang doeh atipouh.

*Bawipa e bu apasuek venna*

<sup>26</sup> A ca awh lahun navah, Jisuh ni vaiyei a la teh, lunghawi lawk a dei hnukkhu, a raen teh, hete vaiyei teh ka tak doeh. Lat awh nateh cat awh, telah a hnukkâbangnaw koe atipouh.

<sup>27</sup> Manang hai a la teh lunghawi lawk a dei hnukkhu ahnimanaw hah a poe teh, nangmouh pueng ni net awh. <sup>28</sup> Hete manang teh lawkkam katha doeh. Taminaw hlout nahanlah ka rabawk e ka thi doeh. <sup>29</sup> Na dei pouh awh. Hete misurtui patet e a katha e misurtui nangmouh hoi cungtalah a Pa e uknaeram dawak bout ka nei hoehroukrak, atu hoi bout ka net mahoe toe. <sup>30</sup> Hahoi teh la a sak awh teh Olive Mon lah a luen awh.

*A hnukkâbangnaw paringparang a yawng awh*

*Mrk 14:27-31; Luk 22:31-34*

<sup>31</sup> Hat toteh, Cakathoung dawak a thut e teh, tukhoumkung hah hem awh vaiteh, a tunaw ni paringparang lah ao awh han ati e patetlah, sahnin tangmin lah nangmouh pueng ni kai kecu dawak na lung a pout awh han.

<sup>32</sup> Hatei, bout ka thaw hnukkhu nangmouh hmalah, Galilee ram lah ka cei han, telah Jisuh ni atipouh. <sup>33</sup> Hetnaw ni nang kecu dawak a lung

ka pout awh nakunghai kai teh ka lung khoeroe pout mahoe, telah Piter ni a ti. <sup>34</sup> Jisuh ni, atangcalah na dei pouh. Sahnin tangmin ahlui a khawng hoehnahlan kai hah vai thum touh na pahnawt han atipouh. <sup>35</sup> Piter ni, nang hoi rei due han nakunghai kai ni na pahnawt mahoe, bout atipouh. Alouke a hnukkâbangnaw ni hai hot patetvanlah a dei awh.

*Gethsemani takha thung ratoumnae*

*Mrk 14:32-42; Luk 22:40-46*

<sup>36</sup> Hatnavah Jisuh ni Gethsemani hmuen koe ahnimouh hoi rei a pha toteh, kai teh hote hmuen koe ratoum hanlah ka cei han, hete hmuen koe la tahung awh lah a, telah a hnukkâbangnaw koe atipouh. <sup>37</sup> Piter hoi Zebedee e a capa roi a hrawi. Hatnavah Bawipa teh a lungmathoe, lungpuen hoi ao dawkvah, <sup>38</sup> Jisuh ni due han totouh ka lungreithai. Hie a hmuen koe awm awh nateh kai hoi cungtalah ring awh, telah a hnukkâbangnaw kathum touh koe a dei pouh.

<sup>39</sup> Hathnukkhu hmalah hrawt bout a cei teh, a tabo laihoi oe a Pa coung thai pawiteh hete manang na takhoe pouh haw. Hatei, kaie ka ngainae patetlah tho laipalah, na ngainae patetlah tho lawiseh telah a ratoum. <sup>40</sup> A hnukkâbangnaw aonae koe a pha navah, ahnimouh ni di a i takhai e a hmu navah, nangmouh ni suimilam buet touh kangna hai kai hah na ring thai awh hoe haw. <sup>41</sup> Tacueknae koehoi na hlout thai awh nahan ratoum laihoi ring awh. Muitha ni teh

a ngai poug ei, takthai ni teh coung thai hoeh telah Piter koe atipouh.

<sup>42</sup> Hahoi bout a cei teh Oe a Pa hete manang hah ka net laipalah roun thai hoehpawiteh, na ngainae patetlah phat lawiseh telah bout a ratoum. <sup>43</sup> Hat hnukkhu a hnukkâbangnaw onae koe bout a tho teh, ahnimanaw teh muet bout a i aw h e a hmu navah, <sup>44</sup> a ceitakhai teh ahmaloe a ratoum e patetlah apâthum lah bout a ratoum.

<sup>45</sup> A hnukkâbangnaw onae koe bout a tho teh, atuteh duem ip aw h lawih. Tami Capa teh tamikayonnaw e kut daw k pah naw t nahane tueng teh a pha toe. <sup>46</sup> Thaw aw h, cet a lei sei. Kai na kapahnawtkung teh a tho toe atipouh.

### *Jisuh mannae*

*Mrk 14:45-50; Luk 22:47-53*

<sup>47</sup> Hottelah a dei lahun navah a hnukkâbang hlaikahni touh daw k ka baw k van e Judah Isakarot teh a tho. Vaihma bawinaw hoi khothung e tami kacuenaw ni a patoun aw h e naw teh tahloi hoi bongpainaw a sin aw h teh a tho aw h. <sup>48</sup> Bawipa kapahnawtkung niyah, kai ni ka paco e teh Jisuh doeh, ahni hah man aw h telah hote taminaw koe noutnae a poe e patetlah, <sup>49</sup> Bawipa koe rek a hnai teh, kacangghaikung yawhawinae awmseh ati teh a paco. <sup>50</sup> Jisuh ni ka hui bang panki e daw k maw na tho atipouh navah, hote taminaw a tho aw h teh Jisuh hah a man aw h. <sup>51</sup> Hatnavah Jisuh hnukkâbang e buet touh ni a kut a dâw teh tahloi a rasa hnukkhu, vaihma kacue e a san buet touh hah a bouk navah a hnâ thouk a pet.

<sup>52</sup> Jisuh ni na tahloi hah amae tabu dawk bout tat leih. Tahloi ka patuem e tami pueng teh tahloi hoi a due aw hah. <sup>53</sup> Atu roeroe vah a Pa koe kahei thai tie hai thoseh, kâhet pawiteh kalvan ransahuipui aphu hlaikahni touh hlak kapap lah Kai koe a patoun han tie hah nang ni na pouk hoeh maw. <sup>54</sup> Hat pawiteh, Cakathoung dawk a thut e patetlah, hettelah o han tie hnonaw hah bangtelavai a kuep thai telah a ti. <sup>55</sup> Hatnavah Jisuh ni Dingca man e patetlah kai man hanlah rama, bongpainaw na sin aw hah teh na tho a bo vaw. Kai ni Bawkim thung hnin ka due na cangkhai eiteh, nangmae rahak ka tahung navah nangmouh ni kai hah na man aw hah hoeh. <sup>56</sup> Hot hateh, Cakathoung akuep nahane doeh telah tami kamkhuengnaw hah a dei pouh. Hattoteh a hnukkâbangnaw pueng ni Bawipa hah parang a yawng takhai aw hah.

*Lawkcengnae koe a phanae*

*Mrk 14:53-65*

<sup>57</sup> Jisuh ka man e naw ni Bawipa hah, cakathutkungnaw hoi kacuenaw a kamkhuengnae vaihma kacue Kaiaphas koe a ceikhai aw hah. <sup>58</sup> Piter hai vaihma kacue e toeim totouh, Bawipa hoi kahlat lah a kâbang. A hnukteng bangtelamaw ati aw hah tie a panue nahanlah athung a kâen teh ka ring e naw hoi reirei a tahung.

<sup>59</sup> Vaihma bawinaw hoi kacuenaw, sanhedrin lawkcengkungnaw pueng ni Jisuh thei thai nahanlah laithoe kampangkhae a tawng aw hah ei hmawt aw hah hoeh. <sup>60</sup> Laithoe kampangkhai

hanelah moi a tho aw h ei, Bangpatete kapanuekkhaikung hai tawn aw h hoeh. A hnuk-teng vah laithoe kampangkhaikung kahni touh a tho roi teh, <sup>61</sup> ahni ni, kai ni Cathut e Bawkim hah ka raphoe vaiteh hnin thum touh hoi bout ka cum thai han telah a dei titeh kapanuekkhaikung lah a kangdue roi. <sup>62</sup> Vaihma kacue ni a kangdue teh, kam touh boehai bout na dei mahoe h maw. Hetnaw ni bangtelamaw kapanuekkhaikung lah a kangdue aw h, atipouh navah Jisuh teh lawkkamuem lah ao. <sup>63</sup> Vaihma kacue ni nang teh Cathut e Capa, Khrih hoi Khrih hoeh e hah kaimouh koe na dei nahanlah kahring Cathut noe lahoi kâ na poe atipouh.

<sup>64</sup> Hatnavah, Jisuh ni na dei e patetlah atueng. Hothloilah ka dei e teh, hmalae atueng daw k tami Capa ni bawilennae aranglah a tahung teh kalvan e tâmainaw daw k tahung lahoi a tho e hah na hmu aw h han atipouh.

<sup>65</sup> Hatnavah vaihma kacue ni amae angki a phi teh hete tami ni Cathut ka tapuet lah a dei toe. Bangpatet e kapanuekkhaikung maw bout a ngai rah. Cathut ka tapuet lah a dei e hah atu roeroe vah nangmouh ni na thai aw h toe. <sup>66</sup> Bangtelamaw na pouk aw h, atipouh navah, hotnaw ni ahni teh due han a kamcu telah bout a dei aw h.

<sup>67</sup> Hattoteh a minhmai hah tamtui hoi a tamthawi aw h. <sup>68</sup> Kut hoi a thaw aw h, tangawn ni a tambei aw h, oe Khrih nang hah apinimaw na tambei tie hah profet lahoi dei leih, atipouh aw h.

*Piter ni Jisuh a pahnawt**Mrk 14:66-72; Luk 22:55-62; Jhn 18:25-27*

<sup>69</sup> Piter ni toeim alawilah longkha koe a tahung navah sannu buet touh ni a tho teh nang haiyah Galilee tami Jisuh hoi cungtalah e doeh atipouh navah, <sup>70</sup> Piter ni na dei e hah ka panuek hoeh telah taminaw e hmalah a oun. <sup>71</sup> Hathnukkhu Piter ni im longkha alawilah a tâco navah alouke napui buet touh ni bout a hmu teh haw kaawm e naw koe, het haiyah Nazareth tami Jisuh hoi cungtalah e doeh atipouh. <sup>72</sup> Piter ni ahni hah ka panuek hoeh telah thoe a ka bo teh bout a oun.

<sup>73</sup> Hathnukkhu moung ao teh hote hmuen koe kangdoutnaw ni Piter e a teng a tho aw haw teh, atangcalah nang haiyah hotnaw koe na ka baw koe e doeh. Na lawk ni ma a pâpho toe telah atipouh aw haw. <sup>74</sup> Piter ni ahni hah ka panuek hoeh ati teh thoe a kâbo. Hat nah tahma vah ahlui a khawng.

<sup>75</sup> Jisuh ni Ahlui a khawng hoehnahan, vai thum touh kai hah na pahnawt han ati e lawk hah Piter ni hlawt a pouk navah alawilah a tâco teh khawngsauek laihoi a ka.

**27***Jisuh teh Pailat hmalah a tâcokhai aw haw*

<sup>1</sup> Amom vah vaihma bawinaw hoi tamimaya daw koe e kacuenaw ni Jisuh thei hanelah a kâpankhai aw haw. <sup>2</sup> Hahoi Bawipa hah a katek aw haw teh Pailat siangpahrang kut daw koe tawngtang a poe aw haw.

*Judah a kaithinae*

<sup>3</sup> Hatnavah, Bawipa ka pahnavt e Judah Isakarot ni Bawipa a dum e hah a hmu navah, pan a kângai teh, tangka 30 touh hah vaihma bawinaw, bawknae koelah kacuenaw koevah bout a poe. <sup>4</sup> Ka payon toe, yon ka tawn hoeh e tami e a thi hah ka pahnavt payon toe telah ati. Ahnimouh van ni hai kaimouh hoi bangtelamaw kâkuet a vaw. Nama e hno hah nama ni khen lawih atipouh awh.

<sup>5</sup> Ahni ni hote tangka hah Bawkim dawk vu a tâkhawng teh alouklah a cei hnukkhu a kaithi. <sup>6</sup> Vaihma bawinaw ni hote tangka a la awh teh a thi phu doeh. Hno kuemnae dawk pâseng kawi nahoe telah a kapan awh teh, <sup>7</sup> Hlaam ka bo e talai hmuen hah Jentelnaw e phuen hanelah hote tangka hoi a ran awh. <sup>8</sup> Hote kecu dawkvah atu totouh hote talai hmuen hah 'thi talai telah a kaw awh. <sup>9</sup> Profet Jeremiah ni a dei e teh, Isarelnaw ni aphu khoe e tami e aphu tangka 30 touh hah a la awh teh Cathut ni lawk na thui e van patetlah, <sup>10</sup> Hlaam ka bo e talai hmuen hah ka ran awh tie lawk hah, hatnavah a kuep.

*Pailat koe Jisuh a phanae*

*Mrk 15:2-15; Luk 23:2-3*

<sup>11</sup> Jisuh teh ram kaukkung hmalah a pha navah, ram kaukkung ni nang teh Judah siang-pahrang katang maw telah a pacei. Jisuh ni na pacei e patetlah atang doeh atipouh. <sup>12</sup> Vaihma bawinaw hoi kacuenaw ni yon a pen awh navah kam touh boehai pathung hoeh. <sup>13</sup> Pailat bawi ni nange avanglah moikapap ni a kampangkhai e hah na thai hoeh maw atipouh nakunghai,

<sup>14</sup> Kam touh boehai a pathung hoeh e hah ram kaukung ni a ka ngai lah a ru.

<sup>15</sup> Hote paw i dawkvah ram kaukung ni thongkabawtnaw thung daw k hoi tami kapap ni a ngai e tami buetbuet touh hah ouk tha e lah ao. <sup>16</sup> Hatnavah paung e naw thung daw k Barabas tie min kamthang e tami buet touh ao. <sup>17</sup> Taminaw a kamkhueng awh toteh Pailat bawi ni nangmouh ni apimaw hlout sak hanlah na ngai awh, Barabas maw hoehpawiteh Khrih tie Jisuh hah maw, telah taminaw hah a pacei. <sup>18</sup> Hettelah a paceinae teh ahnimouh ni a ut awh dawkvah Jisuh a man sak ati e hah Pailat bawi ni a panue daw k doeh.

<sup>19</sup> Hothloilah, lawkcengnae tungkhung daw k a tahung navah a yu ni tami a patoun teh, hote tamikalan hah bang telah hai tet hanh. Sahnin roeroe vah kai ni ahni kecu daw k ka mang lah puenghoi ka khang toe, telah lawk a thui. <sup>20</sup> Tami ka kamkhuengnaw ni Barabas hlout sak vaiteh Jisuh thei sak hanlah vaihma bawinaw hoi kacuenaw ni taminaw hah a uen awh.

<sup>21</sup> Hatdawkvah ram ka uk bawi ni het tarawi thung daw k, nangmouh ni api hah maw hlout sak han na ngai awh telah bout a pacei navah; 'Barabas doeh hlout sak ka ngai awh telah a dei awh. <sup>22</sup> Pailat bawi ni 'hah pawiteh Khrih tie Jisuh hah te bangtelamaw ti han telah bout a pacei navah; ahnimouh pueng ni 'ahni hateh thingpalam daw k hetnae khang seh telah ati awh. <sup>23</sup> Ram kaukung bawi ni hai 'bangkong-maw, bangmaw a sakpayon telah a pacei navah,

ahni teh thingpalam dawk het lah awmseh telah hoe a hram awh.

<sup>24</sup> Pailat bawi ni tâ laipalah taminaw ni hoehoe a coukdouk awh e hah a hmu toteh, tui a la teh taminaw e a hmalah a kut a kamsin teh, hete tamikalan e a thi hoi kai teh ka bet hoeh, na ngai e patetlah sak a lawih a ti. <sup>25</sup> Hote tami pueng ni, ahni e a thi teh kaimae lû dawk, ka catounnaw e a lû dawk bawt lawiseh ati awh. <sup>26</sup> Pailat bawi ni hai Barabas hah a tha pouh. Jisuh hah a hem hnukkhu thingpalam dawk thei hanelah a poe.

*Jisuh pacekpahleknæ*

*Mrk 15:16-20*

<sup>27</sup> Hat torei teh ram kaukung e a ransanaw ni Jisuh hah bawi imthung lah a hrawi awh teh, ransahu abuemlah a kamkhueng sak. <sup>28</sup> A khohna hah a rading pouh awh, hni paling a kâkhu sak awh. <sup>29</sup> Pâkhinglukhung a kâmuk sak awh. Sonron buet touh aranglah a sin sak awh teh, a hmalah khokcuengkhuem sin awh teh, Judah siangpahrang, nang koe yawhawinae awm naseh ti hoi a pacekpahlek awh. <sup>30</sup> Tamtui hoi a tamthawi awh sonron hah a la pouh awh teh a lû dawk a hem pouh awh. <sup>31</sup> Hottelah a pacekpahlek awh hnukkhu, a kâkhu e hah a rading pouh awh teh, amae kâkhu e hah bout a kâkhu sak awh teh, thingpalam dawk het hanlah a tâcokhai awh.

*Jisuh pathoutnæ*

*Mrk 15:22-32; Luk 23:33-43; Jhn 19:17-24*

<sup>32</sup> A cei awh lahun nah Simon tie Sairen tami, buet touh a hmu awh teh, thingpalam hah hmatara a hrawm sak awh. <sup>33</sup> Luhru hmuen tie

Galgotha a pha awh toteh, <sup>34</sup> tâsi kakhat hoi a kalawt awh e misurtui kathut poung e hah nei sak hanlah a poe awh. A patek teh nei han ngai hoeh. <sup>35</sup> Thingpalam dawk a pathout awh hnukkhu cungpam a rayu awh teh a kâkhu e hni hah a kâravei awh. <sup>36</sup> Hote hmuen koe tahung laihoi a ring awh. <sup>37</sup> Yon pâphonae ca a vo pouh e teh, 'het e tami teh Judah siangpahrang Jisuh doeh, telah a thut awh teh a lû lathueng a vo pouh awh. <sup>38</sup> Hatnavah Bawipa hoi cungtalah dingca kahni touh aranglah buet touh, avoilah buet touh thingpalamnae dawk a pathout awh. <sup>39</sup> Lam dawk ka cet kaawm e naw ni Bawkim hah ka raphoe vaiteh hnin thum touh hoi bout ka sak han e, namahoima kâhloutsak haw. <sup>40</sup> Cathut e Capa katang lah na awm pawiteh namahoima rungngang nateh, thingpalamnae dawk hoi kum leih telah a lû kahek awh teh pacekpahleknae lawk a dei awh.

<sup>41</sup> Hot patetvanlah vaihma bawinaw, cakathutkungnaw, tami kacuenaw niyah ayânaw teh a rungngang thai, <sup>42</sup> Amahoima teh kârungngang thai hoeh bo. Judah siangpahrang katang na tetpawiteh thingpalamnae dawk hoi atu kum naseh. Kum pawiteh ka yuem awh han. <sup>43</sup> Ahni teh Cathut a kâuep toe. Kai teh Cathut Capa doeh ati toe. Hatdawkvah Cathut ni ahni dawk a ngainae awm pawiteh atu roeroe vah kârungngang na seh telah a dudam awh teh a dei awh. <sup>44</sup> Hot patetlah Bawipa hoi cungtalah thingpalamnae dawk a het awh e dingcanaw ni hai a pathoe awh teh yon a pen awh.

*Jisuh a duenae**Mrk 15:33-41; Luk 23:44-49*

<sup>45</sup> Kanî tuengtalueng a thunnae koehoi suimilam kathum totouh talai van pueng dawk kho a hmo. <sup>46</sup> Tangmin lah suimilam kathum navah Jisuh ni 'Eli, Eli, Lama Sabakhthani. telah a hram. Hot hateh, Ka Cathut, ka Cathut bangkongmaw na pahnawt tinae doeh. <sup>47</sup> Hote hmuen koe kangdout e a tangawn ni a thai aw h navah Elijah doeh a kaw ati aw h.

<sup>48</sup> Tami buet touh ni tang a yawng teh, napon a sin teh, misurtui kathut e hoi a kalawt hnukkhu rayung daw k a takei teh nei sak hanlah a poe. <sup>49</sup> Alouknaw ni tat yawkaw, Elijah ni ahni rungngang hanlah a tho ou, tho hoeh ou tie heh khen a haw sei ati aw h.

<sup>50</sup> Jisuh ni tha hoi bout a hram teh hringnae a thouk. <sup>51</sup> Hattoteh Bawkim thung e yaphni a lû hoi a khok totouh a kâphi. Talai a kâhu et. Lungsongnaw a kâbawng. <sup>52</sup> Tangkom pueng a kamawng teh, ka ip tangcoung e tami kathoungnaw moikapap a thaw aw h teh, <sup>53</sup> Bawipa a thaw hnukkhu, ahnimanaw teh tangkom thung hoi a tâco aw h teh khopui kathoung thungvah a kâen aw h, tami moikapap koe a kamnue aw h.

<sup>54</sup> Jisuh ka ring e ransabawi hoi ransahu ni talai a kâhu et e a hmu aw h toteh a taki aw h dawkvah Cathut e Capa tangngak doeh ati aw h. <sup>55</sup> Galilee kho e Jisuh khetyawt hanlah a hnukkâbang e napuinaw ni hote hmuen koe vah ahlanae koehoi a khet aw h. <sup>56</sup> Hote napuinaw dawkvah Meri Magdalin, Jem hoi Joseph e a

manu Meri hoi Zebedee e capanaw e manu tinaw a bawk awh.

*Jisuh pakawpnae*

*Mrk 15:42-47; Luk 23:50-56*

<sup>57</sup> Tangmin lah a pha toteh Arimathea kho e kabawipounge Joseph, a hnukkâbang van e buet touh a tho teh, <sup>58</sup> Pailat bawi koe a kâen teh Jisuh e ro hah a hei. Pailat ni a ro hah poe lah awmseh telah kâ a poe. <sup>59</sup> Joseph ni a ro hah a la teh lukkarei ka pangaw e hoi a kayo hnukkhu, <sup>60</sup> ama hanelah lungsong dawk thuk e tangkom katha thung vah a ta. Lungphenpui hoi takhang a teng teh a ceitakhai . <sup>61</sup> Meri Magdalin hoi alouke Meri teh hote tangkom hmalah a tahung roi.

*Phuen a ringnae*

<sup>62</sup> Atangtho toteh vaihma bawinaw hoi Farasinaw ni Pailat bawi koe a kamkhueng awh teh, <sup>63</sup> 'hot e kadumyengkung ni kai teh apâthum hnin kathâw han telah a due hoehnahlan a dei e hah ka panue awh rah. <sup>64</sup> Hatdawkvah a hnukkâbangnaw ni tangmin vah a ro hah a la awh teh, ahni teh duenae koehoi a thaw toe telah tami pueng koe dei awh pawiteh ahmaloe e payon e hlak a hnukkhu e payon e hoe kalen han telah ngaihrinae a tawn awh dawkvah, tangkom hah hnin thum touh thung ring hanlah kâ na poe haw atipouh awh.

<sup>65</sup> Pailat ni 'nangmouh koe ka ring e tamiu touh ao. Cet awh nateh a coung thai totouh a uep thai nahanlah ring awh atipouh. <sup>66</sup> Ahnimouh ni a cei awh teh talung hah mitnoutnae tacik a

kin awh hnukkhu ka ring e naw a ta awh teh, tangkom hah kahawicalah a ring awh.

## 28

### *Duenae koehoi Jisuh boutthawnae*

*Mrk 16:1-8; Luk 24:1-10*

<sup>1</sup> Sabbath aloum hnukkhu, hnin sari touh dawk apasuek hnin amom kho meimei dai nah Magdalin hoi alouke Meri tinaw hai, tangkom khet hanlah a cei awh. <sup>2</sup> Hatnavah puenghoi Tâlî a no. Cathut e kalvantami ni kalvan hoi a kum teh tangkom khannae talung a paawng teh hote talung van a tahung. <sup>3</sup> A minhmai teh sumpapalik e patetlah a kamnue. A khohna e hai tâmai patetlah a pangaw. <sup>4</sup> Karingnaw ni kalvantami hah a taki awh lawi a pâyaw awh teh meimei a due awh.

<sup>5</sup> Kalvantami niyah taket awh hanh. Thing-palamnae dawk thei e Jisuh doeh na tawng awh, tie ka panue. <sup>6</sup> Hete hmuen koe awm hoeh toe. A dei tangcoung e patetlah a thaw toe. Tho awh nateh Bawipa a yanna hah kenhaw. <sup>7</sup> Karang poung lah ban awh nateh duenae koehoi a thaw toe tie hah a hnukkâbangnaw koe dei pouh awh. Nangmouh hmalah Galilee ram vah a kamnue han. Hawvah nangmouh ni Bawipa hah na hmu awh han ka ti toe telah kalvantami ni napuinaw koe a dei.

<sup>8</sup> Hote napuinaw ni a taki awh eiteh, a lung-hawi awh dawkvah, tangkom koehoi karanglah a ban awh teh a hnukkâbangnaw koe hote kamthang hah dei pouh hanelah a yawng awh.

<sup>9</sup> A cei awh lahun nah Jisuh ni sut a dawn teh,

na konawm awh atipouh. Hote napuinaw ni rek a hnai awh teh a khok hah a tapam awh laihoi a tabo awh teh a bawk awh. <sup>10</sup> Jisuh ni takinae tawn awh hanh. Cet awh nateh, hete kamthang lawk hah dei pouh awh. Hote ram dawkvah ahnimouh ni kai hah na hmu awh han atipouh.

### *Ransanaw a tadawng awh*

<sup>11</sup> Hote napuinaw ni a cei awh navah ka ring e atangawnnaw ni khothung a kâen awh teh kaawm e hno pueng hah vaihma bawinaw koe a thaisak awh. <sup>12</sup> Hahoi vaihma bawinaw ni kacue-naw hoi pouknae kapoenaw hoi a kamkhueng awh teh, a kâpan awh. Ka ring e ransanaw hah tangka moikapap a poe awh teh, <sup>13</sup> tangmin ka i awh lahun navah a hnukkâbangnaw a tho teh a ro hah a paru awh, telah a dei awh. <sup>14</sup> Hote kong hah siangpahrang ni bout thai pawiteh kaimouh ni ka dum awh vaiteh nangmouh koe a lungkhuek hoeh nahanlah ka sak awh han, telah atipouh awh. <sup>15</sup> Hatdawkvah ransanaw ni tangka a la awh teh a dei pouh e patetlah a sak awh. Hettelah hoi hote kamthang teh Judahnaw rahak vah sahnin ditouh a kamthang.

### *Kalenpounge kâpoelawk*

<sup>16</sup> Hlaibun touh e a hnukkâbangnaw ni Galilee ram lah a cei awh. Bawipa ni lawk a thui e mon dawk a luen awh navah Bawipa hah a hmu awh teh a bawk awh. <sup>17</sup> Atangawnnaw teh a lunghring awh. <sup>18</sup> Jisuh ni ahnimouh koe rek a hnai teh kalvan hoi talai van e kâtawanna pueng teh kai koe poe lah ao toe. <sup>19</sup> Nangmouh ni cet awh nateh miphun pueng hah ka hnuk kâbang

lah coung sak awh. Pa, Capa, Kathoung Muitha e min dawk Baptisma poe awh.

<sup>20</sup> Kai ni nangmouh koe kâ na poe e pueng hah a tarawi awh nahanlah cangkhai awh. Kai teh talai van a pout totouh nangmouh hoi cungtalah pou ka o telah a hnukkâbangnaw koe atipouh.

**Thai Phum Holy Bible**  
**The Holy Bible in the Thaiphum Chin language of**  
**Myanmar**

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

---

PDF generated using Haiola and XeLaTeX on 1 May 2024 from source files dated 1 May 2024

84c7fe95-3b68-5ab6-b17e-a642d33ac078